



Lesona e te  
a'oa'oina mai i le **Tusi Paia**



‘Na e iloa tusitusiga paia talu ona e la’itiiti,  
lea e mafai ona faapotoina ai oe mo le faaolataga.’

—2 TIMOTEO 3:15



**E lē faatauina lenei tusi. Ua saunia e a'oa'o'ina ai le Tusi Paia i le lalolagi aoao, ma ua lagolagoina e ala i foa'i tauofo.**

**Mo le faia o foa'i tauofo, taga'i i le [donate.jw.org](http://donate.jw.org).**

Se'i vaganā ua faailoa atu, ae o mau uma o loo i lenei tusi ua sii mai i le faaliliuga  
*O le Tusi Paia—O le Faaliliuga a le Lalolagi Fou.*

*Lesona E te A'oa'o'ina Mai i le Tusi Paia  
Lessons You Can Learn From the Bible  
Lomia iā Setema 2021*

Samoan (*lfb-SM*)

© 2017  
Watch Tower Bible and Tract Society  
of Pennsylvania

O E Lomia  
Watchtower Bible and Tract Society of  
New York, Inc., Wallkill, New York, U.S.A.

Made in Japan  
Lomia i Iapani







Lesona e te a'oa'oina mai i le **Tusi Paia**

O le tusi lenei a \_\_\_\_\_



Uso Pele e:

*I le avea ai ma tagata tapua'i o leova, e tatou te naunau i lana Afioga le Tusi Paia. E matou te talitonu o loo iai talafaasolopito e sa'o a'ia'i, ta'ita'iga maufaatuatuaina mo le olaga, faamaoniga faamāfanafanaloto o le alofa o leova mo tagata. (Salamo 119:105; Luka 1:3; 1 Ioane 4:19) E matou te matuā naunau e fesoasoani i isi ina ia a'oa'oina upu moni tautele o loo iai i le Afioga a le Atua. O lea, ua matou fiafia ai e faailoa atu lenei tusi, "Lesona E te A'oa'oina Mai i le Tusi Paia." Se'i o matou faamatala puupuu atu lenei tusi.*

*O le tele o faamatalaga o loo i lenei tusi ua saunia mo tamaiti. Peita'i, e mafai fo'i ona faaaogā e fesoasoani ai i tagata matutua o ē e naunau e a'oa'o atili nisi mea e faatatau i le Tusi Paia. Talu ai o le Tusi Paia o se tusi mo tagata uma, e mautinoa o le a aogā iā i tatou uma le iloiloina o nei lesona, lea e fesoasoani ina ia tatou maua ai le fiafia moni.*

*O loo faamatalaina i lenei tusi tala mai i le Tusi Paia e faatatau i tagata, mai lava i le taimi na foafoaina ai ma faasolo mai ai. Na faia taumafaiga uma ina ia faamatalaina nei tala o le Tusi Paia i se auala manino ma faigofie, ma taumafai i le tele e mafai ai e faamatala nei tala e tusa ai ma le faasologa o mea na tutupu.*

*Peita'i, o lenei tusi e lē na o le tau ina faamatala o tala o le Tusi Paia. Ua tusia faamatalaga ma ata i se auala e pei o loo tutupu moni mea o loo i tala o le Tusi Paia, ma iloa tonu ai faalogona o i latou o loo faamatalaina i na tala.*

*Ua fesoasoani lenei tusi iā i tatou e iloa ai o le Tusi Paia o se tusi e faatatau i tagata, o ē na usiusita'i iā leova ma i latou e le'i usiusita'i iā te ia. E uuna'ia ai fo'i i tatou ina ia a'oa'oina ni lesona mai i a latou faaa'oa'oga. (Roma 15:4; 1 Korinito 10:6) Ua vaevaeina lenei tusi i vaega*



e 14. I le amataga o vaega ta'itasi, o loo iai se autaluga o nisi o lesona e mafai ona tatou a'oa'oina.

Pe afai o oe o se matua, atonu e mafai ona e faitau faatasi ma lau tama se lesona ma talanoa e faatatau i ata o loo iai. Ona oulua faitau faatasi lea i mau o le Tusi Paia o loo faavae mai ai lenā lesona. Fesoasoani i lau tama ina ia iloa pe faapefea ona fesoota'i le mau o loo ia faitau i ai i le Tusi Paia, ma le lesona o loo i le tusi. E ono aogā fo'i lenā auala pe a fesoasoani i se tagata matua, ina ia maua se aotelega o le fe'au o le Tusi Paia.

E matou te faamoemoe o le a fesoasoani lenei tusi i tagata lotofaamaoni uma, o ē lāiti ma ē matutua, e a'oa'oina ni lesona mai i le Afioga a le Atua ma faatatau i o latou olaga. O le i'uga, o le a mafai fo'i ona latou tapua'i iā te ia o ni sui o lona aiga pele.

O outou uso,

*Vaega Pule o Molimau a Ieova*

# Lisi o Mataupu

|   |  |                                     |           |
|---|--|-------------------------------------|-----------|
| 1 | <b>Fofoaga</b>   | ITULAU                              | <b>6</b>  |
|   | 1 Na Faia e le Atua le Lagi ma le Lalolagi                             |                                     | 8         |
|   | 2 O le Tamāloa ma le Fafine Muamua na Faia e le Atua                   |                                     | 10        |
| 2 | <b>Mai iā Atamu e Oo i le Lolo</b>                                     |                                     | <b>12</b> |
|   | 3 Na Lē Usiusita'i Atamu ma Eva i le Atua                              |                                     | 14        |
|   | 4 Amata Mai i le Ita ae l'u i le Fasioti Tagata                        |                                     | 16        |
|   | 5 Le Vaa o Noa   |                                     | 18        |
|   | 6 E To'avalu na Sao Atu i se Lalolagi ua Faamamāina Mai i Tagata Leaga |                                     | 20        |
|   |  | <b>Mai i le Lolo e Oo iā Iakopo</b> |           |
| 3 | 7 Le 'Olo o Papelu   |                                     | 24        |
|   | 8 Sa Usiusita'i Aperaamo ma Sara i le Atua                             |                                     | 26        |
|   | 9 Ua l'u Ina Maua se La Tama   |                                     | 28        |
|   | 10 Ia Manatua le Avā a Lota  |                                     | 30        |
|   | 11 Se Tofotofoga o le Faatuatua  |                                     | 32        |
|   | 12 Na Maua e Iakopo le Tofi  |                                     | 34        |
|   | 13 Na Toe Faalelei Iakopo ma Esau                                      |                                     | 36        |
| 4 | <b>Mai iā Iosefa e Oo i le Sami Ulaula</b>                             |                                     | <b>38</b> |
|   | 14 Se Pologa na Usiusita'i i le Atua                                   |                                     | 40        |
|   | 15 E Le'i Galo Iosefa iā leova   |                                     | 42        |
|   | 16 O Ai Iopu?  |                                     | 44        |
|   | 17 Na Filifili Mose e Tapua'i iā leova                                 |                                     | 46        |
|   | 18 Le Laau na Mumū   |                                     | 48        |
|   | 19 O Mala Muamua e Tolu  |                                     | 50        |
|   | 20 O Mala e Ono na Sosoo Ai  |                                     | 52        |
|   | 21 Le Mala Lona Sefulu   |                                     | 54        |
|   | 22 Se Vavega i le Sami Ulaula  |                                     | 56        |

|                                     |   |  |           |            |
|-------------------------------------|---|--|-----------|------------|
| 5                                   | <b>I le Toafa</b>                                   |  | <b>58</b> |            |
|                                     | 23 Se Folafolaga na Faia iā leova                   |  | 60        |            |
|                                     | 24 E Le'i Tausisi i la Latou Folafolaga             |  | 62        |            |
|                                     | 25 Se Fale'ie Paia e Tapua'i Ai                     |  | 64        |            |
|                                     | 26 O Tagata Vāai e To'asefulu Lua                   |  | 66        |            |
|                                     | 27 Na Latou Fouvale iā leova                        |  | 68        |            |
|                                     | 28 Ua Tautala le Asini a Palaamo                    |  | 70        |            |
| 6                                   | <b>O Faamasino</b>                                  |  | <b>72</b> |            |
|                                     | 29 Na Filifilia e leova Iosua                       |  | 74        |            |
|                                     | 30 Na Faalafi e Raava Tagata Vāai                   |  | 76        |            |
|                                     | 31 Iosua ma Tagata Kipeona                          |  | 78        |            |
|                                     | 32 Se Ta'ita'i Fou ma Fafine Lototetele e To'alua   |  | 80        |            |
|                                     | 33 Ruta ma Naomi                                    |  | 82        |            |
|                                     | 34 Faato'ilalo e Kitiona Tagata Mitiana             |  | 84        |            |
|                                     | 35 Tatalo Hana Ina ia Maua Sana Tama                |  | 86        |            |
|                                     | 36 Le Tautoga a Iefata                              |  | 88        |            |
|                                     | 37 Ua Talanoa Mai leova iā Samuelu                  |  | 90        |            |
|                                     | 38 Foa'i e leova le Malosi iā Samasoni              |  | 92        |            |
|                                     | 7   | <b>Tavita ma Saulo</b>                 |           | <b>94</b>  |
|                                     |   | 39 Le Tupu Muamua o Isaraelu           |           | 96         |
| 40 Tavita ma Koliata                |   |  | 98        |            |
| 41 Tavita ma Saulo                  |   |  | 100       |            |
| 42 Sa Lototele ma Faamaoni Ionatana |   |  | 102       |            |
| 43 Le Agasala a le Tupu o Tavita    |   |  | 104       |            |
| 8                                   |   | <b>Mai iā Solomona e Oo iā Elia</b>    |           | <b>106</b> |
|                                     |   | 44 Se Malumalu mo leova                |           | 108        |
|                                     |   | 45 Se Malo ua Vaeluaina                |           | 110        |
|                                     |   | 46 Se Tofotofoga i le Mauga o Karamelu |           | 112        |
|                                     | 47 Na Faamalosia e leova Elia                       |  | 114       |            |
|                                     | 48 Toe Ola Mai le Tama a se Fafine ua Oti Lana Tane |  | 116       |            |
|                                     | 49 Ua Faasalaina se Masiofo Leaga                   |  | 118       |            |
|                                     | 50 Puipuia e leova Iosefatu                         |  | 120       |            |



## 9

**Mai iā Elisaia e Oo iā Iosia 122**

|  |     |
|--|-----|
| 51 Se Toa Malosi ma se Teineitiiti         | 124 |
| 52 O Kariota Afi a Ieova                   | 126 |
| 53 Le Lototele o Ioiata                    | 128 |
| 54 Sa Onosa'i Ieova iā Iona                | 130 |
| 55 Puipuia e le Agelu a Ieova Esekia       | 132 |
| 56 Sa Naunau Iosia i le Tulafono a le Atua | 134 |

## 10

**Mai iā Ieremia e Oo iā Neemia 136**

|  |     |
|--|-----|
| 57 Auina Atua e Ieova Ieremia e Tala'i       | 138 |
| 58 Ua Faaumatia Ierusalem                    | 140 |
| 59 Ni Tama se To'afā na Ususita'i iā Ieova   | 142 |
| 60 Se Malo e Tumau e Faavavau                | 144 |
| 61 E Latou te Le'i Ifo                       | 146 |
| 62 Se Malo e Pei o se Laau Telē              | 148 |
| 63 Tusitusiga i le Puipui                    | 150 |
| 64 Tanielu i le Lua o Leona                  | 152 |
| 65 Lavea'iina e Eseta Ona Tagata             | 154 |
| 66 A'oa'o Atua e Esera le Tulafono a le Atua | 156 |
| 67 Pā o Ierusalem                            | 158 |

## 11

**Ioane le Papatiso ma Iesu 160**

|   |     |
|---|-----|
| 68 Fanau se Pepe a Elisapeta              | 162 |
| 69 Asiasi Atua Kaperielu iā Maria         | 164 |
| 70 Faalauiloa e Agelu le Fanau Mai o Iesu | 166 |
| 71 Na Puipuia e Ieova Iesu                | 168 |
| 72 A o La'itiiti Iesu                     | 170 |
| 73 Ua Saunia e Ioane le Ala               | 172 |

## 12

**Le Faiva a Iesu 174**

|   |     |
|---|-----|
| 74 Avea Iesu ma Mesia                           | 176 |
| 75 Tofotofoina e le Tiapolo Iesu                | 178 |
| 76 Faamamā e Iesu le Malumalu                   | 180 |
| 77 Le Fafine i le Vaipuna                       | 182 |
| 78 Tala'i Atua e Iesu le Fe'au o le Malo        | 184 |
| 79 Faia e Iesu Vavega e Tele                    | 186 |
| 80 Filifilia e Iesu Aposetolo e To'asefulu Lua  | 188 |
| 81 Le Lauga i Luga o le Mauga                   | 190 |
| 82 A'oa'o e Iesu Ona Soo i le Auala e Tatalo Ai | 192 |
| 83 Fafaga e Iesu le Faitau Afe                  | 194 |
| 84 Savali Iesu i Luga o le Vai                  | 196 |
| 85 Faamālōlō e Iesu Tagata i le Sapati          | 198 |
| 86 Faatūina e Iesu Lasalo                       | 200 |

## 13

**Le Vaiaso Mulimuli o Iesu i le Lalolagi 202**

|   |     |
|---|-----|
| 87 Talisuaga Mulimuli a Iesu            | 204 |
| 88 Ua Pu'ea Iesu                        | 206 |
| 89 Faafitia e Peteru Iesu               | 208 |
| 90 Maliu Iesu i Kolokota                | 210 |
| 91 Ua Toetū Iesu                        | 212 |
| 92 Ua Faaali Atua Iesu i le 'Aufaifaiva | 214 |
| 93 Toe Afio Iesu i le Lagi              | 216 |

## 14

**Salalau Atua le Faa-Kerisiano 218**

|  |     |
|--|-----|
| 94 Ua Maua e Soo le Agaga Paia                       | 220 |
| 95 E Le'i Mafai Ona Taofia i Latou                   | 222 |
| 96 Filifilia e Iesu Saulo                            | 224 |
| 97 Ua Maua e Konelio le Agaga Paia                   | 226 |
| 98 Ua Oo Atua le Faa-Kerisiano i le Tele o Atunuu    | 228 |
| 99 A'oa'oina e se Leoleo o le Falepuipui le Upu Moni | 230 |
| 100 Paulo ma Timoteo                                 | 232 |
| 101 Auina Atua Paulo i Roma                          | 234 |
| 102 Le Faaaliga na Vaaia e Ioane                     | 236 |
| 103 "Ia Oo Mai Lou Malo"                             | 238 |



1

O loo amata le faamatalaga a le Tusi Paia i le foafoaga, ma ua tatou iloa ai mea matagofie na faia e leova i le lagi ma le lalolagi. Pe afai o oe o se matua, ia fesoasoani i lau tama e iloa vala mata'ina o le foafoaga. Ia faamatala pe na faapefea ona foafoaina e le Atua le tagata ina ia sili atu i lo o manu, i le tuuina mai iā i tatou o le tomai o tautala, fefulifulisa'i, fausia ai mea, pese ma tatalo ai. Ia atia'e le lototalisapaia mo le mana ma le atamai o leova, aemaise lona alofa mo ana foafoaga uma e aofia ai i tatou ta'ito'atasi.



## LESONA AUTŪ

- Na foafoaina e le Atua ma lona Alo le lalolagi e tatou te nonofo ai
- Na amata e leova le faatulagaga o le aiga e ala i le faia o le tamāloa ma le fafine ma tuuina iā i la'ua le tomai e maua ai fanau
- O le finagalo o leova ia nonofo i le filemu ma le autasi tagata se'ia oo i le faavavau



# 1 Na Faia e le Atua le Lagi ma le Lalolagi

O leova le Atua o Lē na faia i tatou. Na ia faia mea uma, o mea e mafai ona tatou vaai atu i ai, ma mea e lē mafai ona tatou vaai atu i ai. A o le’i faia e leova mea e mafai ona tatou vaaia, na ia faia le tele o agelu. E te iloa o ā nei mea e ta’ua o agelu? O agelu, e iai ni o latou tino agaga lea na faia e leova, e pei o ia. E lē mafai ona tatou vaai atu iā i latou, e pei fo’i ona lē mafai ona tatou vaai atu i le Atua. O le agelu muamua na faia e leova, na avea ma ona fesoasoani. Na fesoasoani lenā agelu iā leova ina ua ia faia fetu, o paneta ma isi mea uma lava. O se tasi o na paneta o le lalolagi, o se nofoaga matagofie lea o loo tatou nonofo ai.

Ona saunia lea e leova o le lalolagi ina ia ola ai manu ma tagata. Na ia faasusulu mai le malamalama o le lā i le lalolagi. Na ia faia mauga, le sami ma vaitafe.

**“Na foafoaina e le Atua le lagi ma le lalolagi i le amataga.”**  
—Kenese 1:1

O ā isi mea e sosoo ai na faia e leova? Na faapea ane o ia: ‘O le a ou faia le vao ma laau.’ Na amata ona ola a’e le tele o ituaiga o fualaau ‘aina ma fugālaau eseese. Ona faia lea e leova o manu uma, o manufelegei, o manu e fetolofi, ma meaola i le sami. Na ia faia manu lāiti e pei o lapiti, ma manu lapopo’a e pei o elefane. O le ā le manu e sili ona e fiafia i ai?

Ona faapea atu lea o leova i le agelu na ia faia muamua: “Se’i o ta faia le tagata.” O le a ese tagata mai i manu. E mafai e tagata ona fausia mea fou. E mafai ona latou tautatala, taliē, ma tatalo. E latou



te tausia manu ma le  
lalolagi. E te iloa o ai le  
tagata na muamua faia e  
le Atua? Se'i o tatou vaai.

**Fesili:** O ai leova le Atua?  
O ā mea na faia e leova?

**Kenese 1:1-26;** Faataoto 8:30, 31;  
Ieremia 10:12; Kolose 1:15-17

## 2 O le Tamāloa ma le Fafine Muamua na Faia e le Atua

Na faia e leova se faato'aga i se nofoaga e ta'ua o Etena. Na tumu lenei faato'aga i fugālaau, laau tetele ma manu. Ona faia lea e le Atua o le tagata muamua o Atamu mai i le efuefu, ma feula i ona poga'iisu le mānava ola. E te iloa le mea na tupu? Na maua mai ai se tagata ola. Na faaaogā e leova Atamu e vaaia le faato'aga, ma faatonu o ia e faaigoa manu uma.

Na ta'u atu e le Atua iā Atamu se tulafono tāua e faapea: 'E mafai ona e 'ai i laau uma, ae e iai se laau faapitoa e tasi e aua e te 'ai ai. Pe afai e te 'ai i le fua o lenā laau, o le a e oti ai.'

Mulimuli ane na faapea ane leova: 'O le a ou faia se fesoasoani mo Atamu.' Na faamoegase Atamu e leova, ona faaaogā lea e leova o se tasi o ivi 'aso'aso o Atamu e faia ai se fafine e avea ma avā a Atamu. O lona igoa o Eva. Na avea Atamu ma Eva ma aiga muamua na iai i le



lalolagi. O ā ni faalogona o Atamu e faatatau i lana avā? Na matuā fialia o ia ma faapea atu: ‘O le tagata lenei ua faia e leova mai i lo’u ivi ‘aso’aso. O ia o se tagata e pei o a’u.’

Na faapea atu leova iā Atamu ma Eva ia maua ni a la fanau ma faatumu ai le lalolagi. Na finagalo leova ina ia latou galulue faatasi ma le fialia e faia le lalolagi atoa e avea o se parataiso, po o se paka matagofie e pei o le faato’aga o Etena. Ae e lē o le mea lenā na tupu. Aiseā? O le a tatou iloaina le tali i le tala o loo sosoo mai.

**Fesili:** O le ā le galuega na faatonu e leova Atamu e fai? O le ā e tupu iā Atamu ma Eva pe afai na la aai i le laau na fai atu le Atua e aua le aai ai?

**Kenese 1:27-31; 2:7-9, 15-23; Salamo 115:16; Mataio 19:4-6**

**“O lē na foafoaina i la’ua i le amataga,  
na ia faia i la’ua o le tane ma le fafine.”  
—Mataio 19:4**





2

Aiseā na aumaia ai e leova se lolo na faaumatia ai tagata i lenā taimi? I le amataga lava o le talafaasolopito o tagata, na amata ai se feteena'iga i le va o le lelei ma le leaga. Na filifilia e nisi e pei o Atamu, Eva, ma la la'ua tama o Kaino le leaga. Ae e to'a itiiti na filifilia le lelei, e pei o Apelu ma Noa. E toetoe o tagata uma na matuā leaga, o lea na faaumatia ai e leova na tagata amioleaga. O le a fesoasoani lenei vaega iā i tatou e a'oa'oina ai o loo silasila mai leova po o lē fea itu e tatou te filifilia, ma e na te lē faatagaina le leaga e faato'ilaloina le lelei.





## LESONA AUTŪ

- E tatau ona tatou faatupuina le filemu, nai lo o le faia o faiga sauā e pei o le Tiapolo ma ē lagolagoina o ia
- Pe afai e tatou te faalogo i le Atua ma ususita'i iā te ia e pei ona faia e Noa, e mafai ona tatou ola e faavavau ma le fialia
- E silafia e leova mea uma o loo tutupu. E fialia o ia i le amiotonu, ae faanoanoa i le amioleaga

### 3 Na Lē Usiusita’i Atamu ma Eva i le Atua

I se tasi aso a o iai na o Eva, na faapea atu se gata iā te ia: ‘Pe e moni na faapea atu le Atua e lē mafai ona lua aai i laau uma?’ Na tali atu Eva: ‘E mafai ona ma aai i laau uma, ae e iai le laau e tasi e aua ma te aai ai. Pe afai e ma te aai i le fua o lenā laau, o le a ma feoti.’ Ua fai atu le gata: ‘E lua te lē feoti. Pe a lua aai i le fua o lenā laau, ona pei ai lea o oulua o le Atua.’ Pe e sa’o lenā tala? E leai, e pepelo. Ae na talitonu i ai Eva. O le umi na tilotilo ai Eva i le fua o le laau, o le tele fo’i lenā o lona mana’o i ai. Na ‘ai e Eva le fua o le laau ma avatu iā Atamu. Na iloa e Atamu o le a la feoti pe afai e la te lē usiusita’i i le Atua. Ae na ‘ai lava e Atamu le fua o le laau.

Ina ua oo i le afiafi, na fesili atu leova iā Atamu ma Eva, i le māfuaaga ua la lē usiusita’i ai iā te ia. Na tali mai Eva o le gata le māfuaaga, ae faapea mai Atamu o Eva na māfua ai. O lo la lē usiusita’i iā leova, na tuliese ai e leova i la’ua mai i le faato’aga o Etena. Ina ia faamautinoa e la te lē toe ō atu i totonu o le faato’aga, na tuu ai e leova ni agelu ma se pelu afi mumū i le pito e ulu atu ai i totonu o le faato’aga.

Na faapea atu leova o le a faasala fo’i lē na pepelo iā Eva. O le mea moni, e lē o le gata na tautala atu iā Eva, auā e le’i faia e leova gata ina ia tautatala. Ae o se agelu leaga, lea na ia faaaogā le gata e tautala atu ai ina ia faasesē ai Eva. O lenā agelu leaga e igoa iā Satani le Tiapolo. I le lumana’i, o le a faaumatia ai e leova Satani, ina ia lē mafai ai ona ia toe faasesēina tagata e faia mea leaga.

**Fesili:** Aiseā na ‘ai ai e Eva le fua o le laau? O le ā na tupu iā Atamu ma Eva ina ua la lē usiusita’i iā leova? O ai Satani le Tiapolo?

**Kenese 3:1-24;** loane 8:44; 1 loane 3:8; Faaaliga 12:9




**‘O le Tiapolo o le fasioti tagata talu le amataga, e le’i tumau lava o ia i le upu moni, auā e lē o i totonu iā te ia le upu moni.’—Ioane 8:44**

## 4 Amata Mai i le Ita ae I'u i le Fasioti Tagata

Ina ua tuliese Atamu ma Eva mai i le faato'aga, e tele ni a la fanau na fananau mai. O le la tama muamua o Kaino, o se faifaato'aga. O le la tama lona lua o Apelu, o se leoleo mamoe.

I se tasi aso, na ofo atu ai e Kaino ma Apelu ni taulaga iā leova. E te iloa le uiga o le taulaga? O le taulaga, o se ituaiga o meaalofa faapitoa. Sa fiafia leova i le taulaga a Apelu, ae e le'i fiafia i le taulaga a Kaino. O le māfuaaga lea na ita tele ai Kaino. Na faapea atu leova iā Kaino ina ia faaeteete, auā o lona ita e mafai ona i'u atu ai i lona faia o se mea leaga. Ae e le'i faalogo Kaino.

Nai lo o lea, na fai atu Kaino iā Apelu: 'Se'i o ta o i le fanua.' A o iai na o i la'ua i le fanua, na osofa'i ai e Kaino





lona uso ma fasiotia o ia. O le ā o le a faia e leova i le mea ua tupu? Na faasala e leova Kaino, e ala i le tuli o ia i se nuu e mamao ese mai i lona aiga. E le'i toe faatagaina Kaino e toe fo'i mai ai i le mea sa iai lona aiga.

**“Ia e alu e mua’i faalelei ma lou uso, ona e sau ai lea ma avatu lau taulaga.”  
—Mataio 5:24**

Pe e iai se mea e tatou te a’oa’oina mai iinei? Atonu e amata ona tatou lagona le ita, pe afai e lē taunuu mea e tatou te manana’o i ai. Pe afai la e amata ona tuputupu a’e lo tatou ita, pe iloa mai fo’i e nisi ua tatou feita ma lapata’ia ai i tatou, e tatau ona tatou vave gaoioi ma pulea o tatou faalogona. O le faia faapea, o le a lē pulea ai i tatou e o tatou faalogona.

E manatua pea e leova Apelu, talu ai sa alofa Apelu iā leova ma faia le mea sa’o. O le a toe faatū mai e leova Apelu mai i le oti, pe a toe faia e leova le lalolagi e avea o se parataiso.

**Fesili:** O ai le fanau muamua e to’alua a Atamu ma Eva?

O le ā le faalogona sa iā Kaino na māfua ai ona ia fasiotia lona uso?

**Kenese 4:1-12; Eperu 11:4; 1 Ioane 3:11, 12**

## 5 Le Vaa o Noa

Mulimuli ane, na amata ona to'atele tagata i le lalolagi, ma e toetoe o i latou uma na leaga. Na avea fo'i nisi o agelu i le lagi ma agelu leaga. Na latou o ese mai i lo latou nofoaga i le lagi ae o mai i le lalolagi. E te iloa le māfuaaga? Ina ia mafai ai ona liua o latou tino i tino o tagata ma faaipoipo ai i fafine.

Na maua ni atalii o nei agelu ma fafine. Na feola a'e i latou ma avea o ni tagata e matuā malolosi ma sauā i isi tagata. E le'i finagalo leova e tutupu pea na mea. O lea, na ia filifili ai e faaumatia tagata leaga i se lolo.

**“E pei lava o aso o Noa, o le a faapena fo'i le faatasi mai o le Atalii o le tagata.”  
—Mataio 24:37**

Ae na iai se tagata na ese mai ai ona uiga. O lona igoa o Noa, ma na alofa o ia iā leova. Sa iai lana avā ma ona atalii e to'atolu o Semu, Hamo ma lafeta ma a latou avā. Na faatonuina e leova Noa ina ia fau se vaa telē, ina ia mafai ai ona faasaoina o ia ma lona aiga i le Lolo. O lenei vaa e pei o se pusa telē e mafai ona opeopea i luga o le vai. Na faatonuina fo'i Noa e ave le tele o manu i totonu o le vaa, ina ia faasaoina ai fo'i.

Na amata loa ona fau e Noa le vaa. Pe tusa ma le 50 tausaga na fau ai e Noa ma lona aiga le vaa. Na latou fausia i le auala tonu lava na finagalo i ai leova. A o fau le vaa, na faailoa atu e Noa i tagata le Lolo, ae e leai se tasi na faalogo iā te ia.

Ua oo nei i le taimi e o ai i totonu o le vaa. Se'i o tatou faitau i le tala e sosoo ai e iloa ai po o le ā le mea na tupu.

**Fesili:** Aiseā na filifili ai leova e aumai le Lolo? O ā mea na faatonu e leova Noa e fai?

**Kenese 6:1-22; Mataio 24:37-41; 2 Peteru 2:5; Iuta 6**





## 6 E To'avalu na Sao Atu i se Lalolagi ua Faamamāina Mai i Tagata Leaga

Na ō i totonu o le vaa Noa, o lona aiga ma manu. Na tapuni e leova le faitoto'a o le vaa ma ua amata ona timu. O le mamafa tele o timuga na amata ai ona opeopea le vaa i luga o le vai. E le'i umi ae ufitia le lalolagi atoa i le vai. O tagata uma sa i fafo o le vaa, na feoti uma i latou. E na o Noa ma lona aiga na faasaoina ma saogalemu i totonu o le vaa. Se'i mafaufau i le fiafia o Noa ma lona aiga ona na latou usiusita'i iā leova.

E 40 ao, 40 pō na matuā mamafa ai timuga, ona uma lea. Na faasolosolo ona māui atu le vai, ma i'u ai ina tū le vaa i luga o se mauga. Ae sa iai pea vaega o le laueleele na ufitia i le vai, ma e le'i mafai ai e Noa ma lona aiga ona ō i fafo o le vaa i le taimi lenā.

**'Na ulu atu Noa i le vaa; ma e le'i ano i ai tagata se'ia oo mai le lolo ma tafieseā ai i latou uma.'**  
—Mataio 24:38, 39

Na faasolosolo lava ona māui atu le vai. E sili atu i le tasi le tausaga na iai Noa ma lona aiga i totonu o le vaa. Ona fai atu lea o leova ua mafai ona latou ō i fafo o le vaa, ma ō atu i se lalolagi ua faamamāina mai i tagata leaga. Na latou matuā lotofaafetai na faasaoina i latou e leova. O lea na latou faia ai se taulaga iā leova e faaalua ai lo latou lotofaafetai.

Sa fiafia leova i lenā taulaga. Na ia folafola mai e na te lē toe faaumatia mea uma i le lalolagi e ala i se lolo. Ina ia faamautinoa lenā folafolaga, na faaali mai e leova le nuanua. O le nuanua muamua lava lea. Po ua e vaai i se nuanua?

Na faapea atu fo'i leova iā Noa ma lona aiga, ia fanafanau ma faatumu ai le lalolagi.

**Fesili:** O le ā na tupu ina ua tapuni e leova le faitoto'a o le vaa?  
O le ā e tatau ona tatou manatua pe a vaaia se nuanua?

**Kenese 7:1-9:17**







3

I tausaga mulimuli ane ina ua mavae le Lolo, e to'aitiiti i latou o loo ta'ua i le Tusi Paia na auaua ia leova. O se tasi o i latou o Aperamo o le na ta'ua o le uo a leova. Aisea na ta'ua ai o ia o le uo a leova? Pe afai o oe o se matua, ia fesoasoani i lau tama ina ia iloa o loo manatu mamafa mai leova ia te ia, ma e finagalo e fesoasoani ia te ia. E pei o Aperamo ma isi tane faamaoni e pei o Lota ma lakopo, e mafai ona tatou sa'oloto e talosaga atu ia leova mo lana fesoasoani. E tatou te mautinoa e faataunuu e leova so o se folafolaga na te faia.



## LESONA AUTŪ


- la e faia so o se mea e talosaga mai ai leova e tusa pe e lē faigofie
- E sili atu ona tāua le faauōga ma le Atua nai lo o se isi lava mea
- E tāua iā leova lo tatou faamagalo o isi ma toe faalelei i le vave e mafai ai

## 7 Le ‘Olo o Papelu

Ina ua uma le Lolo, na maua e atalii o Noa ma a latou avā ni fanau se to’atele. Na faasolo ina to’atele tagata o o latou aiga, ma ua ō atu ma nonofo i itu esee se o le lalolagi, e pei lava ona faatonu i latou e leova e fai.

Ae na iai o latou tauaiga e le’i usiusita’i iā leova. Na latou faapea ane: ‘Se’i o tatou faia se aai ma nonofo ai. O le a tatou faia se ‘olo e sili ona umī, e oo i le lagi lona maualuga. Ona avea ai lea o i tatou ma tagata ta’uta’ua.’


**“O le fia sili, ma le faamaualuga,  
ma le ala leaga, ma le gutu  
faapi’opi’o, ou te ‘ino’ino i ai.”  
—Faataoto 8:13**



E le'i fiafia leova i le mea na faia e na tagata. O lea, na ia filifili ai e taofia i latou mai i le faia o le aai ma le 'olo. E te iloa le auala na taofia ai i latou e leova? Na faafuase'i lava ona ia suia le gagana na tautatala ai na tagata. O lea na lē toe malamalama ai le isi tagata i le gagana o loo tautala ai le isi, ma taofia ai loa le galuega na latou faia. Na ta'ua le aai lea na amata ona latou fausia o Papelu, o lona uiga o le "Fenunumia'i." Na amata ona ō tagata ma nonofo i isi vaega o le lalolagi. Ae na latou faia pea mea leaga. Pe na iai ni tagata na alolofa pea iā leova? O le a tatou iloa le tali i le tala o loo sosoo mai.

**Fesili:** O le ā na faia e tagata sa i le aai o Papelu?  
O le ā le auala na taofia ai e leova le galuega sa latou faia?

**Kenese 11:1-9**



## 8 Sa Usiusita'i Aperaaamo ma Sara i le Atua

E lē mamao mai i Papelu, sa tu ai se aai e ta'ua o Uro. Na tapua'i tagata o lenā aai i le tele o atua e ese mai iā leova. Ae e iai se tamāloa i Uro e na o leova lava na tapua'i i ai. O lona igoa o Aperaaamo.

Na faapea atu leova iā Aperaaamo: 'Ia e tuua lou nuu ma ou tauaiga, ae alu i le nuu o le a ou faasino atu iā te oe.' Ona folafola atu lea e le Atua: 'O le a avea oe ma nuu tele, ma o le a ou faia mea lelei mo le to'atele o tagata i le lalolagi ona o oe.'

E le'i iloa e Aperaaamo po o fea o le a faasino atu e leova e alu i ai, ae na ia talitonu pea iā leova. O lea na usiusita'i ai Aperaaamo, o lana avā o Sara, o lona tamā o Tara ma Lota le atalii o lona uso, ma tapena a latou mea, ma amata loa la latou malaga umi.



Na taunuu Aperaaamo ma lona aiga i le nuu sa faasino i ai e le Atua, ua 75 ona tausaga. O lenā nuu o Kanana. O i inā na fetalai atu ai le Atua iā Aperaaamo, ma fai atu le folafolaga lenei: ‘O le a ou avatu i lau fanau le laueleele o loo e vaai atu i ai.’ Ae ua matutua Aperaaamo ma Sara ma e le’i iai fo’i sa la fanau. O le ā la le auala o le a faataunuu ai e leova lana folafolaga?

**Fesili:** O le ā na faatonu e leova Aperaaamo e fai?  
O le ā na folafola atu e leova iā Aperaaamo?

**Kenese 11:29–12:9;** Galuega 7:2-4; Kalatia 3:6; Eperu 11:8

**‘O le faatuatua na usiusita’i ai  
Aperaaamo, ma alu i se nofoaga  
na folafola atu e fai ma ona tofi;  
ona alu lea o ia, e ui lava e lē iloa  
le mea o loo alu i ai.’—Eperu 11:8**





## 9 Ua I'u Ina Maua se La Tama

Ua tele tausaga talu ona faaipoipo Aperaaamo ma Sara. Na la tuua lo la fale manaia i Uro, ae nonofo i se fale'ie. Peita'i e le'i tomumu ai Sara, talu ai sa ia iloa o le faia o le mea na faatonuina e leova, e mo lo latou lelei.

O le mana'o tele o Sara i se pepe, na ia fai atu ai ia Aperaaamo: 'Pe a fanau mai se pepe a Akara, o le a avea o ia ma a'u tama.' Mulimuli ane na maua se tama a Akara, ma o lona igoa o Isamaeli.

I le tele o tausaga mulimuli ane, ina ua 99 tausaga o Aperaaamo ae 89 tausaga o Sara, na asiasi atu ai ni tagata se to'atolu ia i la'ua. Na valaaulia e Aperaaamo i latou e malolō i lalo o se laau ma fai ai se latou mea'ai. Pe e te iloa po o ai nei tagata na asiasi atu? O i latou o agelu. Na latou fai atu ia Aperaaamo: 'I le taimi faapenei i le tausaga fou, o le a maua ai sa oulua tama.' O le taimi lenā o loo faalogologo mai Sara i totonu o le fale'ie. Na 'ata'ata o ia ma faapea ane: 'Pe mafai ona ou fanau mai se tama, a o lenei ua ou loomatua?'

I le tausaga na sosoo ai, na fanau ai e Sara se tama tama e pei lava ona sa folafola atu e le agelu a leova. Na faaigoa e Aperaaamo le tama ia Isaako, o lona uiga o le "Ata'ata."



**“O le faatuatua na maua ai e Sara le malosi e afuafua ai se fanau, . . . auā na manatu o ia e faamaoni lē na faia le folafolaga.”—Eperu 11:11**

Pe tusa o le lima o tausaga o Isaako, ae vaai atu Sara o loo taufaailili Isamaeli iā Isaako. Na mana’o Sara e puipui lana tama, o lea na ia talosaga atu ai iā Aperamo e tuliese Akara ma Isamaeli. I le taimi muamua, e le’i mana’o Aperamo e fai lenā mea. Ae na finagalo fo’i leova e puipuia Isaako. O lea na ia faapea atu ai iā Aperamo: ‘Ia faalogo iā Sara. O le a ou tausia Isamaeli. Ae e ala mai iā Isaako, o le a faataunuuina uma ai a’u folafolaga.’

**Fesili:** O le ā na faalogo atu Sara o ta’u e agelu iā Aperamo? O le ā le auala na puipuia ai e leova Isaako?

**Kenese 16:1-4, 15, 16; 17:25-27; 18:1-15; 21:1-14; Eperu 11:11**





## 10 Ia Manatua le Avā a Lota

Sa nonofo faatasi Lota ma Aperaaamo le uso o lona tamā, i le nuu o Kanana. E le'i umi ae tele manu a Aperaaamo ma Lota, ma ua lē lava ai le fanua e nonofo faatasi ai i la'ua. O lea na fai atu ai Aperaaamo iā Lota: 'E lē mafai ona ta toe nonofo faatasi i se nofoaga e tasi. Faamolemole filifili po o lē fea itu e te alu i ai, ona ou alu ai lea i le isi itu.' E le'i mafaufau Aperaaamo mo sona lava lelei, a ea?

Na iloa atu e Lota se vaega matagofie o le laueleele, lea e lata i se aai e ta'ua o Sotoma. Sa maua ai vai faapea le tele o vao. O lea, na ia filifilia ai lenā nofoaga ma na ō atu loa ma lona aiga ma nonofo ai i le aai o Sotoma.

Na matuā leaga tagata o Sotoma ma le aai na lata ane o Komoro. O le leaga tele o nei tagata na filifili ai leova e faaumatia nei aai. Ae na finagalo le Atua e faasaoina Lota ma lona aiga. O lea na ia auina atu ai ni agelu se to'alua e lapata'i i latou e faapea: 'Ia faavave! Ia ō ese mai i lenei aai, auā o le a faaumatia e leova.'

E le'i vave ona alu ese Lota, ae na faifaiaga pea o ia. O lea, na fetagofi atu ai agelu e to'alua i lima o Lota, lana avā ma ona afafine e to'alua ma aveese i latou mai i le aai. Na faapea atu nei agelu: 'Ia sosola, ma aua ne'i outou toe tilotilo i tua. Pe afai e tou te toe tilotilo i tua, o le a outou feoti.'

O le taimi lava na latou oo atu ai i le aai o Soara, na faatotō ifo ai loa e leova le teiō ma le afi i aai o Sotoma ma Komoro. Na matuā

**“Ia outou manatua le avā a Lota.”  
—Luka 17:32**

faaumatia na aai. Ina ua lē usiusita’i le avā a Lota ma toe tilotilo i tua, na liu tupua masima ai o ia. Ae na saogalemu pea Lota ma ona afafine, talu ai sa latou usiusita’i iā leova. E mautinoa na matuā faanoanoa i latou ona e le’i usiusita’i le avā a Lota. E mafai ona tatou a’oa’oina mai iinei, le tāua o le usiusita’i i faatonuga a leova.

**Fesili:** Aiseā na faaumatia ai e leova aai o Sotoma ma Komoro?  
Aiseā na liu tupua masima ai le avā a Lota?

**Kenese 13:1-13; 19:1-26; Luka 17:28, 29, 32; 2 Peteru 2:6-9**



## 11 Se Tofotofoga o le Faatuatua

Sa a'oa'oina e Aperaaamo lona atalii o Isaako, ina ia alofa iā leova ma talitonu i ana folafolaga uma. Ae pe tusa o le 25 tausaga o Isaako, na talosagaina ai e leova Aperaaamo e fai se mea e sili ona faigatā. O le ā lenā mea?

Na faapea atu le Atua iā Aperaaamo: 'Faamolemole ave lou atalii e to'atasi, ma faaaogā o ia e ofo atu ai se taulaga i luga o se mauga i le nuu o Moria.' E le'i iloa e Aperaaamo le māfuaaga na faatonu ai o ia e leova e fai lenā mea, ae na ia ususita'i pea iā leova.

I le taeao o le aso na sosoo ai, na ave ai e Aperaaamo lona atalii o Isaako ma ana auauna e to'alua ma latou o atu i Moria. Ina ua mavae aso e tolu, na mafai ona latou iloa mamao atu ai mauga. Na fai atu Aperaaamo i ana auauna e faatali atu, ae se'i o la o ma Isaako e ofo atu se taulaga. Na avatu e Aperaaamo iā Isaako ni fafie, ae ia ave se naifi. Na fesili atu Isaako i lona tamā: 'O fea le manu o le a faaaogā e fai ai le taulaga?' Na tali mai Aperaaamo: 'Lo'u atalii e, e aumaia lava e leova le manu.'

Ina ua la taunuu i le mauga, ona la faia ai lea o se fata e fai ai i luga le taulaga. Ona saisai lea e Aperaaamo o lima ma vae o Isaako ma tuu o ia i luga o le fata.

Na tago Aperaaamo i le naifi. O le taimi lava lenā na valaau mai ai le agelu a leova mai i le lagi: 'Aperaaamo, aua ne'i oo lou lima i le tama. O lea ua ou iloa nei e te faatuatua i le Atua, auā na e lotomalie e ofo atu



lou atalii o se taulaga.’ Ona iloa atu lea e Aperaaamo o se mamoe po’a, o loo lavelavea ona seu i se laau. Na tago atu Aperaaamo ma tatala lima ma vae o Isaako na saisai, ae aumai le mamoe po’a ma tapē e fai ai le taulaga.




Na amata mai lava i lenā aso ona ta’ua e leova Aperaaamo o lana uō. Pe e te iloa le māfuaaga? Sa faia e Aperaaamo so o se mea na finagalo i ai leova, e tusa pe na te le’i iloa le māfuaaga na faatonu ai o ia e leova e fai lenā mea.

Na toe fai atu e leova lana folafolaga iā Aperaaamo: ‘O le a ou faamanuia iā te oe, ma o le a ou faato’ateleina lau fanau.’ Na folafola atu fo’i e leova o le a ia faamanuiaina tagata lelei uma, e ala mai i le aiga o Aperaaamo.

**Fesili:** O le ā na faia e Aperaaamo e iloa ai lona talitonuina o leova? O le ā le folafolaga na fai atu e leova iā Aperaaamo?

**Kenese 22:1-18;** Eperu 11:17-19; Iakopo 2:21-23

“O le alofa tele o le Atua i le lalolagi, na ia foa’i mai ai lona Atalii e to’atasi, ina ia lē fano tagata uma e faatuatua iā te ia, a ia maua le ola e faavavau.”  
—Ioane 3:16



## 12 Na Maua e lakopo le Tofi

Na faaipoipo Isaako iā Repeka ina ua 40 ona tausaga. Na alofa tele o ia iā Repeka. Mulimuli ane, na maua se la fanau e to'aluā, o le masaga tama.

O le tama matua o Esau, a o le tama la'itiiti o lakopo. Sa fiafia Esau e alu i le fanua, ma sa lelei o ia i le tuli manu. Ae o lakopo sa fiafia o ia e nofo i le fale.

I na aso, o le tama matua e na te mauaina le tele o le vaega o fanua ma tupe a lona tamā pe a oti. O le mea lenā e ta'u o le tofi. I le aiga o Isaako, na aofia ai fo'i i le tofi folafolaga na fai atu e leova iā Aperamo. E le'i popole tele Esau i na folafolaga, ae na iloa e lakopo e tāua tele na folafolaga.

I se tasi aso, na sau Esau i le fale ua matuā lēlavā lava ona ua alu le aso o tuli manu. Na sasala atu le manogi manaia o le mea'ai a lakopo sa fai. O lea na fai atu ai Esau iā lakopo: 'Ua ou fia 'ai. Aumai sina sitiū mūmū lenā se'i o'u 'ai ai.' Na tali mai lakopo: 'E avatu sau sitiū mūmū, pe afai e te tautō muamua mai e aumai ma a'u lou tofi.' Na fai atu Esau: 'Ou te lē popole i lo'u tofi, avatu ma oe. Pau le mea ia aumai sa'u mea'ai, ua ou fia 'ai.' Po o se gaoioiga poto na faia e Esau? E leai. Na lafoa'i e Esau se mea e sili ona tāua, ina ia maua ai se ipu mea'ai o le sitiū mūmū.

Ua toeaina lava Isaako, ma ua oo nei i le taimi e faamanuia atu ai i lona atalii



ulumatua. Ae na fesoasoani Repeka iā lakopo le uii, ina ia maua lenā faamanuiaga. Ina ua iloa e Esau lenā mea, na matuā ita o ia ma taumafai ai e fasioti lona uso masaga. Na manana’o Isaako ma Repeka e puipui lakopo. O lea na la fai atu ai iā te ia: ‘Ia e alu ma nofo iā Lapana le tuagane o lou tinā, se’ia tau te’a le ita o Esau.’ Na usita’i lakopo i ona mātua, ma sola ese ai ina ia faasaoina lona ola.

**Fesili:** O le ā le ituaiga o tagata sa iai Esau? O le ā le ituaiga o tagata sa iai lakopo? Aiseā na maua ai e lakopo le faamanuiaga nai lo o Esau?

**Kenese 25:20-34; 27:1-28:5; Eperu 12:16, 17**

**“O le ā le aogā i le tagata pe afai na te maua le lalolagi uma ae ma’imau ai lona ola? O le ā fo’i se mea o le a avatu e le tagata e sui a’i lona ola?”—Mareko 8:36, 37**



## 13 Na Toe Faalelei lakopo ma Esau

Sa folafola atu e leova iā lakopo o le a ia puipuia o ia, e pei lava ona ia puipuia o Aperaamo ma Isaako. Sa nofo lakopo i le nuu o Karana, ma o i inā sa faaipoipo ai. Na to’atele lana fanau, ma sa mau’oa fo’i o ia.

Ina ua mavae se taimi, ona faapea atu lea o leova iā lakopo: ‘Ia e toe fo’i i le nuu sa e fanau ai.’ O lea na toe fo’i ai lakopo ma lona aiga, ma e umi le taimi na alu ai la latou malaga. A o latou iai i luga o le auala, na ō atu auaina a lakopo ma fai atu iā te ia: ‘O loo sau lou uso o Esau, ma e 400 tamāloloa o loo latou ō mai faatasi.’ Na fefe lakopo ona sa mafaufau o ia o loo sau Esau e osofa’i o ia ma lona aiga. O lea na ia tatalo atu ai iā leova: ‘Faamolemole ia e faasaoina a’u mai i lo’u uso.’ I le aso na sosoo ai, na auina atu ai e lakopo meaalofa e tele mo Esau, e pei o mamoe, ‘oti, povi, kamela ma asini.

Ina ua pō le aso, sa vaaia ai e lakopo se agelu. Na amata ona tauivi le agelu ma lakopo mai i lenā taimi, se’ia oo lava i le taeao o le aso na sosoo ai. E ui lava sa manu’a ai lakopo, ae e le’i fiu ai o ia. Na fai atu le agelu: ‘Tuu mai a’u se’i o’u alu.’ Ae na tali mai lakopo: ‘E leai, se’iloga lava ua e faamanuia mai iā te a’u ona ou tuu atu lea o oe e te alu.’

O lea, na faamanuia atu ai le agelu iā lakopo. Ua iloa nei e lakopo e lē faataga e leova Esau e faia se mea leaga iā te ia.

**“Ia alolofa atu pea i o outou fili  
ma tatalo pea mo ē ua sauāina  
outou; ina ia avea ai outou ma  
atalii o lo outou Tamā o i le lagi.”  
—Mataio 5:44, 45**





I lenā lava taeao, na iloa mamao atu ai e lakopo Esau ma tamāloloa e 400 o loo faatasi ma ia. Na muamua atu lakopo ma ifo faafitu i lona uso. Ae ua tamo'e mai Esau ma fusi atu lakopo. Na fetagisi lenei 'auso e to'alua ma toe faalelei. O le ā sou iloa, o ā faalogona o leova i le auala na faaleleia ai e lakopo le mea na tupu?

I se taimi mulimuli ane i lenā aso, na toe fo'i ai Esau i lona nuu ae faaaau le faigāmalaga a lakopo. E to'a 12 atalii o lakopo. O o latou igoa o Reupena, Simeona, Levi, Iuta, Tanu, Nafatali, Kato, Asera, Isakara, Sepulona, Iosefa, ma Peniamina. Na faaaogā e leova Iosefa, e faasaoina Ona tagata. E te iloa le auala na faia ai e leova lenā mea? Se'i o tatou vaai.

**Fesili:** Na faapefea ona maua e lakopo le faamanuiaga?  
Na faapefea ona toe faalelei e lakopo lo la va ma lona uso?

**Kenese 28:13-15; 31:3, 17, 18; 32:1-29; 33:1-18; 35:23-26**





# 4

O le a talanoaina i lenei vaega Iosefa, Iopu, Mose, ma tagata Isaraelu. Na tele mafatiaga na latou onosa'ia ona o faiga a le Tiapolo. O nisi o i latou sa feagai ma faiga lē tonu, faafalepuipuiina, nofo pologa, faapea le maliliu faafuase'i o ni ē pele. E ui i lea, e tele auala na puipuia ai i latou e leova. Afai o oe o se matua, ia fesoasoani i lau tama e malamalama pe na faapefea i na auauna a leova ona faatumauiina pea lo latou faatuatua e ui na feagai ma faiga leaga.

Na faaaogā e leova Mala e Sefulu e faailoa mai ai e sili atu lona malosi nai lo o atua uma o Aikupito. Ia faamatilatila auala na puipuia ai e leova ona tagata i le taimi ua te'a faapea aso nei.



## LESONA AUTŪ

- Na teena e Iosefa faiga lē mamā ona sa alofa iā leova
- E le'i faatagaina e Iopu mafatiaga ogaoga e fulitua ai iā leova
- Po o fea lava na iai Mose, ae e le'i galo ai o ia o se auauna a le Atua

## 14 Se Pologa na Usiusita‘i i le Atua

O Iosefa o se tasi lea o atalii la‘itiiti o Iakopo. Na iloa e uso matutua o Iosefa e sili ona alofa Iakopo iā Iosefa. O le ā sou iloa, o ā ni o latou faalogona i lenā mea? Na latou lotoleaga iā Iosefa ma ‘ino‘ino iā te ia. Sa faia e Iosefa ni miti e lē masani ai, ma na ia ta‘u atu i ona uso na miti. Na latou manatu o le uiga o miti a Iosefa, e iai le aso o le a latou ifo ai iā te ia. O lea, na atili ai ona latou feita iā Iosefa.

I se tasi aso a o vaaia e uso o Iosefa mamoe e lata i le aai o Sekema, na auina atu ai e Iakopo Iosefa e vaai po o ā mai ona uso. Na latou iloa mamao atu Iosefa ma faapea ane le tasi i le isi: ‘Lea ua sau le tama faimiti. Se‘i o tatou fasioti o ia.’ Na latou pu‘e o ia ma lafo i

totonu o se lua. Ae na faapea atu Iosefa o se tasi o uso o Iosefa: ‘Aua le fasiotia o ia, ae ia tatou faatau atu o ia o se pologa.’ O lea na latou faatauina ai Iosefa mo tupe siliva e 20, i tagata Mitiana faatau‘oa ia na o i Aikupito.

Na latou ave le ofu talaloa o Iosefa ma fufui i le toto o se ‘oti ma avatu i lo latou tamā, ma faapea atu: ‘Pe e lē o le ofu lenei o lou atalii?’ Na manatu Iakopo ua ‘aina e se manufe‘ai Iosefa ma oti ai. Na matuā faanoanoa Iakopo, ma e leai se tasi na mafai ona faamāfanafanaina o ia.

Na faatauina atu Iosefa o se pologa i Aikupito, i se tamāloa tāua e igoa iā Potifara. Ae na fesoasoani pea leova iā Iosefa. Na vaai Potifara i le galue mamafa o Iosefa, ma o ia o se tagata e mafai ona talitonuina. E le‘i umi ae tofia loa Iosefa e vaaia mea uma a Potifara.

Sa vaavaai atu le avā a Potifara, o Iosefa o se tama aulelei ma malosi. O aso uma lava e na te fai atu ai iā Iosefa e la te momoe.



O le ā le mea o le a faia e Iosefa? Na ia tetee atu i le avā a Potifara ma faapea atu: ‘Leai, e sesē lenei mea. E talitonuina a’u e lo’u matai, ma o oe o lana avā. Pe a ta momoe, o le a ou agasala ai i le Atua.’

I se tasi aso, na taumafai ai le avā a Potifara e faamalosi Iosefa e la te momoe. Na ia tago atu i le ofu o Iosefa ae na sola ese Iosefa. Ina ua toe fo’i mai Potifara i le fale, na ta’u atu e lana avā se pepelo iā te ia e faapea, na faia e Iosefa se mea leaga iā te ia. Na matuā ita Potifara ma ia aveina ai Iosefa i le falepuipui. Ae e le’i galo Iosefa iā leova.

**Fesili:** O le ā sa faia e uso o Iosefa iā te ia?  
Aiseā na ave ai Iosefa i le falepuipui?

**Kenese 37:1-36; 39:1-23; Galuega 7:9**

**“Ia faamaulalo ai outou i lalo o le aao malosi o le Atua, ina ia faaeaina e ia outou i le taimi e tatau ai.”—1 Peteru 5:6**





## 15 E Le'i Galo Iosefa iā leova

A o iai Iosefa i le falepuipui, sa fai ai ni miti a Farao le tupu o Aikupito, ma e leai se tasi na mafai ona faamatalaina le uiga o na miti. Na fai atu se tasi o auuana a Farao iā te ia, e mafai e Iosefa ona faamatala le uiga o ana miti. O lea, na faavave ai loa ona auina atu Iosefa i luma o Farao.

Na fesili atu Farao iā Iosefa: 'Pe e mafai ona e faamatalaina mai le uiga o a'u miti?' Na faapea atu Iosefa: 'E fitu tausaga o le a iai le tele o mea'ai i Aikupito. I le isi fitu tausaga e sosoo ai, o le a matuā leai ni mea'ai. Ia filifili se tagata poto e faaputu mea'ai, ina ia aua ai ne'i fia aai tagata.' Na tali mai Farao: 'Ou te filifilia oe. O le a avea oe ma tagata lona lua e sili ona malosi i Aikupito.' Na faapefea ona iloa e Iosefa le uiga o miti a Farao? Na fesoasoani leova iā Iosefa.

I le fitu tausaga na sosoo ai, sa faaputu ai e Iosefa mea'ai. Ona matuā leai ai lea o ni mea'ai i atunuu na lata ane, e pei lava ona faamatalaina e Iosefa. Na ō mai tagata mai i so o se vaipanoa e faatau atu a latou mea'ai mai iā Iosefa. Na faalogo lona tamā o lakopo o loo iai mea'ai i Aikupito, o lea na ia auina atu ai ona atalii e to'asefulu e faatau mai ni mea'ai.

Ina ua latou ō atu iā Iosefa, na vave lava ona iloa e Iosefa i latou, ae e latou te le'i iloa Iosefa. Na latou ifo atu iā te ia, e pei lava o le miti a Iosefa i le taimi a o la'itiiti. Na fia iloa e Iosefa po o feita pea ona uso. O lea na ia fai atu ai iā i latou: 'O outou o sipai. Na outou ō mai e vaavaai i se mea e faigofie ona osofa'ia ai lo matou atunuu.' Ua latou tali mai: 'E leai. O i matou o se 'auso e to'a 12 mai i Kanana. O se tasi o o matou uso ua oti, ae o le uii o loo nonofo faatasi ma lo matou tamā.' Ona fai atu lea

o Iosefa: ‘Ia outou aumai lo outou uso la’itiiti iā te a’u ona ou talitonu ai lea iā te outou.’ O lea, na latou toe fo’i ai loa i lo latou tamā.

Ina ua toe leai fo’i ni mea’ai i le aiga o Iakopo, na ia toe auina atu fo’i ona atalii e ō i Aikupito. O le taimi lea na latou ō ai loa ma ave Peniamina lo latou uso la’itiiti. Ina ia tofotofoina ona uso, na nanā ai e Iosefa lana ipu siliva i le ato na iai saito a Peniamina ma fai atu ua gaoia e se tasi o ona uso lana ipu. Na tete’i uso o Iosefa ina ua maua e auauna le ipu i le ato a Peniamina. Na latou talosaga atu iā Iosefa e faasala i latou, ae aua le faasalaina Peniamina.

O lea na iloa ai e Iosefa ua suia uiga o ona uso. Na lē mafai ona toe taofi ona loimata ma ua tagi o ia ma faapea atu: ‘O a’u o Iosefa lo outou uso. Po o soifua pea lo’u tamā?’ Na matuā tete’i ona uso. Na fai atu Iosefa iā i latou: ‘Aua tou te faanoanoa ona o le mea sa outou faia iā te a’u. Na auina mai a’u e le Atua iinei ina ia faasaoina ai o outou ola. O lea ia faavave ma toe fo’i e aumai lo’u tamā iinei.’

Na latou toe fo’i ma ta’u atu i lo latou tamā lea tala lelei ma ave o ia i Aikupito. Ua mavae le tele o tausaga, ae o lea ua i’u ina toe faatasi Iosefa ma lona tamā.

**Fesili:** Na faapefea ona fesoasoani leova iā Iosefa?  
Na faapefea ona iloa ua faamagalalo e Iosefa ona uso?

**Kenese 40:1–45:28; 46:1-7, 26-34; Salamo 105:17-19; Galuega 7:9-15**

**“Afa’i tou te lē faamagaloina mea sesē e fai mai e tagata, e lē faamagaloina fo’i e lo outou Tamā a outou mea sesē.”—Mataio 6:15**



## 16 O Ai lopu?

I le nuu o Usa, sa iai se tamāloa na tapua'i iā leova. O lona igoa o lopu. O ia o se tamāloa mau'oa ma e to'atele fo'i lona aiga. E lotoalofa, ma na fesoasoani i tagata matitiva, o fafine ua feoti a latou tane, ma tamaiti e leai ni o latou mātua. Sa faia e lopu le mea sa'o. Ae po o lona uiga la e le'i oo lava iā te ia ni faafitauli?

E le'i iloa e lopu, ae sa vaavaai mai pea Satani le Tiapolo iā te ia. Na faapea atu leova iā Satani: 'Po ua e mafaufau ea i la'u auauna o lopu? E leai se tasi e pei o ia i le lalolagi. E usiusita'i o ia iā te a'u ma faia le mea sa'o.' Ua tali mai Satani: 'E tatau ona usiusita'i lopu iā te oe, auā ua e puipui ma faamanuia iā te ia. Ua e foa'i atu i ai laueleele ma manu. Ae e te aveesea loa na mea uma mai iā te ia, ona ia lē toe tapua'i atu lea iā te oe.' Na faapea atu leova: 'E mafai ona e tofotofoina lopu. Ae aua ne'i e fasiotia o ia.' Aiseā na faataga ai e leova Satani e tofotofoina lopu? Na mautinoa lelei e leova e tumau pea ona faamaoni atu lopu iā te ia.

Na amata ona tofotofoina e Satani lopu e ala i le aumaia o le tele o mea leaga. Muamua, na ia auina atu tagata Sepa e gaoui povi ma asini a lopu. Ona sosoo ai lea ma le afi na susunu uma ai mamoe a lopu. Na ō mai tagata Kaletaia ma gaoui ana kamela. Na fasiotia auauna na vaaia nei manu. Ona sosoo ai lea ma se mea e sili ona leaga. Na feoti uma le

fanau a lopu, ina ua pa'ū i o latou luga le fale sa latou aai ai. Na matuā faanoanoa lava lopu, ae e le'i taofia ai o ia mai i le tapua'i atu iā leova.

Na mana'o Satani e toe faaopopo atu isi tigā iā lopu. O lea, na ia taia ai lopu i se ma'i papala





**“Ua outou faalogo i le tumau o lopus i lona faamaoni, ma ua outou iloa fo’i le i’uga mai iā leova.”  
—lakopo 5:11**

leaga na sosolo i lona tino atoa, ma sa matuā tigāina ai lava lopus. E le’i iloa e lopus pe aiseā ua tutupu ai nei mea uma iā te ia, ae sa ia tapua’i pea iā leova. Na silasila mai le Atua i mea uma na tutupu iā lopus, ma sa matuā fiafia o ia iā lopus.

Ona sosoo ai lea ma le auina atu e Satani o ni tamāloloa se to’atolu e tofotofoina lopus. Na latou fai atu iā lopus: ‘Atonu sa e faia se agasala ma taumafai e nanā, ma o lenā ua faasala ai oe e le Atua.’ Na tali mai lopus: ‘E leai se mea sesē na ou faia.’ Peita’i, na amata ona ia mafaufau o leova le māfuaaga o nei faafitauli. Na ia faapea mai fo’i e lē tonu le mea o loo faia e le Atua iā te ia.

O le taimi lenā, o loo faalogologo ane se alii talavou e igoa iā Eliu i le talanoaga a lopus ma tamāloloa e to’atolu. Ona fai atu lea o Eliu iā i latou: ‘E sesē uma a outou faamatalaga. E sili atu leova nai lo o mea e tatou te iloa. E lē mafai ona ia faia se mea leaga. E silafia e ia mea uma, ma fesoasoani i faafitauli o tagata.’

Ona faapea mai lea o leova iā lopus: ‘O fea sa e iai ina ua ou faia le lagi ma le lalolagi? Aiseā ua e fai mai ai e lē tonu le auala ou te faia ai mea? Ua e faia na faamatalaga ae e te lē iloa māfuaaga e tutupu ai mea.’ Na ta’utino atu lopus: ‘Ua ou sesē. Sa ou faalogo i tala e uiga iā te oe, ae o lea ua ou iloa lelei oe. E te mafaia mea uma. Ou te faamalie atu i a’u faamatalaga na fai atu.’

Ina ua uma na tofotofoga, ona toe maua lea e lopus o le malosi mai iā leova, ma sa tele atu mea na foa’i mai e leova iā te ia nai lo o le taimi muamua. Na umi le taimi na ola ai lopus ma sa fiafia lona olaga. Sa faamanuia leova iā lopus ona o lona ususita’i iā te ia e ui sa iai taimi na faigatā ai. Po o le a pei oe o lopus e faauau pea ona tapua’i iā leova, e tusa po o le ā le mea e tupu?

**Fesili:** O ā auala na tofotofoina ai e Satani lopus?

O ā auala na faamanuia ai leova iā lopus?

lopus 1:1–3:26; 4:7; 32:1-5; 34:5, 21; 35:2; 36:15, 26; 38:1-7; 40:8; 42:1-17



## 17 Na Filifili Mose e Tapua'i iā leova

Na ta'ua le aiga o lakopo i totonu o Aikupito, o tagata Israelu. Ina ua maliliu lakopo ma losefa, ona pule lea o se isi Farao. Sa popole o ia ona ua amata ona malolosi atu tagata Israelu nai lo o tagata Aikupito. O lea na ia faia ai tagata Israelu ma pologa. Na ia faamalosia i latou e faia piliki, ma faia galuega mamafa i le fanua. Ae o le tele lava e faamalosia ai e tagata Aikupito ia tagata Israelu e faia galuega mamafa, o le atili to'atele fo'i lenā o tagata Israelu. O le lē fiafia o Farao i lenā mea, na ia faatonuina ai le fasiotia o pepe tama uma faato'ā fananau mai a Israelu. Se'i mafaufau i le fefefe o tagata Israelu i lenā faatonuga.

Sa iai se fafine Israelu e igoa iā lokapeta, ma na iai sana pepe tama aulelei. Ina ia puipuia lana pepe, sa ave ai e lenei tinā lana tama ma tuu i se ato ma nanā i laau o ū i le vaitafe o le Naila. E latalata ane i inā o loo tūtū ai Miriama le tuafafine o le pepe. Na ia vaavaai ane po o le ā se mea o le a tupu.

Na alu atu le afafine o Farao e ta'ele i le



vaitafe ae ia vaaia ai le ato. I totonu o le ato na ia maua ai se pepe o loo tagi, ma na ia alofa i ai. Na fesili atu Miriama: ‘Po ou te alu e su’e mai se fafine e tausia le pepe mo oe?’ Ina ua fai atu le afafine o Farao e alu e su’e mai se fafine, ona alu ai lea o Miriama ma aumai lona tinā o lokapeta. Na faapea atu le afafine o Farao iā lokapeta: ‘Ia e ave lenei pepe ma tausi o ia mo a’u, ma o le a ou totogiina oe.’

Ina ua matua le tamaitiiti, ona ave lea o ia e lokapeta i le afafine o Farao, o lē na faaigoaina le tamaitiiti iā Mose ma tausi a’e o ia e pei o sana lava tama. Na ola a’e Mose o se perenise, ma na mafai ona ia maua so o se mea lava na ia mana’o ai. Ae e le’i galo iā te ia leova. Na iloa e Mose o ia moni o se tagata Isaraelu ae lē o se tagata Aikupito. Na ia filifili fo’i e auuuna iā leova.

I le 40 o tausaga o Mose, na ia filifili ai e fesoasoani i ona tagata. Ina ua ia iloa atu se tagata Aikupito o loo fasia se pologa Isaraelu, ona matuā tā ai lea e Mose o le tagata Aikupito ma oti ai. Ona ia nanāina lea o le tino o le tagata Aikupito i le oneone. Ina ua iloa e Farao le mea na tupu, ona ia taumafai lea e fasioti Mose. Ae na sola Mose ma alu atu i le nuu o Mitiana, ma na tausia o ia e leova a o iai i inā.

**Fesili:** O ā faiga sa fai i tagata Isaraelu i totonu o Aikupito? Aiseā na sola ese ai Mose mai i Aikupito?

**Kenese 49:33; Esoto 1:1-14, 22; 2:1-15; Galuega 7:17-29; Eperu 11:23-27**

**‘O le faatuatua na musu ai Mose e ta’ua o ia o le tama a le afafine o Farao, na ia filifili fo’i e faileagaina faatasi ma tagata o le Atua.’  
—Eperu 11:24, 25**



## 18 Le Laau na Mumū

E 40 tausaga na nofo ai Mose i Mitiana. Sa faaipoipo o ia ma maua sana fanau. I se tasi aso a o leoleo ana mamoe e lata i le mauga o Sinai, na ia vaaia ai se mea e ofoofogia. Na ia iloa atu se laau tuitui o loo mumū mai ai le afi, ae e lē o mū ai le laau. Ina ua faalatalata atu Mose e vaai pe aiseā ua mumū ai le laau, ae ia faalogoina ai se leo o sau mai i totonu o le laau o loo faapea mai: ‘Mose, aua e te sōsō mai iinei. Aveese ou seevae, auā e paia le eleele o loo e tū ai.’ O leova e ona le leo lenā, ae o loo ia tautala mai e ala i se agelu.

Na fefe Mose ma pupuni ona mata. Na faapea mai le leo: ‘Ua ou vaaia le sauāina o tagata Isaraelu. O le a ou faasaoina i latou mai i tagata Aikupito ma ave i latou i se nuu lelei. O le a e aveesea o’u tagata mai i Aikupito.’ O le ā sou manatu, pe na te’i Mose i lenā faatonuga?

**“Aua tou te popole pe faapefea ma po o ā fo’i upu tou te tautatala atu ai; auā o le a tuuina atu i lenā lava taimi upu tou te tautatala atu ai.”**  
—Mataio 10:19

Na fesili Mose: ‘O le ā la’u tala e fai i tagata pe a fesili mai po o ai na auina atu a’u?’ Na faapea mai le Atua: ‘Ia e fai i ai na auina atu oe e leova, le Atua o Aperamo, le Atua o Isaako, ma le Atua o lakopo.’ Ona fai atu lea o Mose: ‘Ae faapefea pe a lē faalogo mai tagata iā te a’u?’ Na aumai e leova iā Mose se faamaoniga o le a la fesoasoani mai iā te ia. Na ia faapea mai iā Mose e togi lona tootoo i le palapala, ona avea ai lea o le tootoo ma gata. Ina ua tago atu Mose i le si’usi’u o le gata, ae toe liu i le tootoo. Na faapea mai leova: ‘Pe a e faia lenei mea, o le a faamaonia atu ai o a’u na auina atu oe.’

Na tali atu Mose: ‘E lē lelei sa’u failauga.’ Na folafola mai e leova: ‘O le a ou ta’u atu le tala e fai i tagata, ma o le a ou auina atu lou uso o Arona e fesoasoani iā te oe.’ O le iloaina e Mose o le a fesoasoani leova iā te ia, na ia ave ai loa lana avā ma ona atalii ma toe fo’i i Aikupito.

**Fesili:** O le ā le mea na iloa atu e Mose a o leoleo ana mamoe?  
O le ā na finagalo leova e faia e Mose?

**Esoto 3:1–4:20; Galuega 7:30-36**





## 19 O Mala Muamua e Tolu

Na faamalosia tagata Isaraelu e galulue mamafa o ni pologa. Na auina atu e leova Mose ma Arona e ta'u atu le fe'au lenei: 'Ia tuu mai lo'u nuu e o, ina ia mafai ona latou tapua'i mai ia te a'u i le toafa.' Ae na faamaualuga Farao ma tali mai: 'Ou te le popole i le mea ua fai mai ai leova, ou te le tuuina atu tagata Isaraelu e o.' Ona atili ai lava lea ona faapologa e Farao tagata Isaraelu. O lea na faia ai e leova se mea ina ia a'oa'oina ai e Farao se lesona. Pe e te iloa po o le a lena mea? Na faaoo e leova Mala e Sefulu i Aikupito. Na faapea atu leova ia Mose: 'E le o faalogo mai Farao ia te a'u. I le taeao, o le a iai o ia i le vaitafe o le Naila. Ia e alu ma ta'u atu i ai talu ai ua ia le tuuina mai o'u tagata e o, o le a liu toto le vai atoa o le Naila.' Na usita'i Mose i lena faatonuga ma alu atu ia Farao. Na vaavaai atu Farao a o ta e Arona le vaitafe o le Naila i lona tootoo, ma liu toto ai le vaitafe. Na amata ona manogi leaga le vaitafe, pepē i'a, ma ua le toe maua se vai mamā e feinu ai tagata. Ae e le'i mana'o lava Farao e faasa'oloto tagata Isaraelu.



**‘Ou te faailoa atu iā i latou lo’u lima ma lo’u malosi, ma e latou te iloa ai o lo’u igoa o leova.’—Ieremia 16:21**

I le fitu aso na sosoo ai, na toe auina atu e leova Mose iā Farao e ta’u atu i ai le fe’au lenei: ‘Pe a e lē tuuina mai lo’u nuu e ō, o le a tumu Aikupito i rane.’ Na faaloaloa i luga e Arona lona tootoo, ma amata ai ona tele rane i Aikupito. Na iai rane i so o se mea, o totonu o fale, luga o moega ma totonu o a latou ipu mea’ai. O lea na fai atu ai Farao iā Mose ina ia talosaga atu iā leova e taofi lenei mala. Na ia folafola atu o le a ia tuu atu tagata Isaraelu e ō. O lea na taofi ai loa e leova le mala. Na faaputu e tagata Aikupito rane na pepē, ma na amata ona manogi leaga ai le nuu. Ae e le’i faatagaina lava e Farao tagata Isaraelu e ō.

Ona faapea atu lea o leova iā Mose: ‘E tatau iā Arona ona tā le eleele i lona tootoo, ona avea ai lea o le efuefu o le laueleele ma namu po o manu ninii e taufeū.’ E le’i umi ae iai namu i so o se mea. E oo lava i isi tagata Aikupito na latou faapea atu iā Farao: ‘O lenei mala e mai i le Atua.’ Ae e le’i faatagaina lava e Farao tagata Isaraelu e ō.

**Fesili:** O ā mala muamua e tolu?  
Aiseā na aumai ai e leova nei mala?  
**Esoto 5:1-18; 7:8-8:19; Neemia 9:9, 10**



## 20 O Mala e Ono na Sosoo Ai

Na ō atu Mose ma Arona e ta'ū atu iā Farao le fe'au lenei a le Atua: 'Pe afai e te lē tuu mai lo'ū nuu e ō, o le a ou faaoo atu lago taufeū i le atunuu.' Na mumu atu le tele o lago taufeū i fale o tagata Aikupito mau'oa ma matitiva. Na matuā tele lago taufeū i le atunuu atoa. Ae e le'i iai ni lago taufeū i le nuu o Kosena lea sa nonofo ai tagata Isaraelu. Na amata atu i le mala lona fā lenei ona aafia ai na o tagata Aikupito. Na talosaga atu Farao: 'Ia 'ai'oi atu iā leova e aveese nei lago taufeū. O le a ou tuuina atu le nuu e ō.' Ae ina ua aveese e leova na lago taufeū, na toe sui fo'i le mafaufau o Farao. Po o le a a'oa'oina ea e Farao se lesona?

Na faapea atu leova: 'Pe afai e lē tuu mai e Farao lo'ū nuu e ō, o le a mama'i ma pepē manu a tagata Aikupito.' I le aso na sosoo ai, na amata ona pepē manu a tagata Aikupito, ae e le'i pepē manu a tagata Isaraelu. Ae na faauamaaa pea ma lē ususita'i Farao, ma e le'i tuuina atu tagata Isaraelu e ō. Ona faapea atu lea o leova iā Mose e toe alu iā

Farao, ma togi faasalalau i luga o le 'ea le lefulefu. Ona avea ai lea o le lefulefu ma pauta na māfua ai ma'i sua matuā leaga, lea na aafia ai tagata uma o Aikupito ma a latou manu. Ae na musu pea Farao e tuu atu tagata Isaraelu e ō.

Na toe auina atu e leova Mose iā Farao ma Lana fe'au: 'E te lē o mana'o lava e tuu mai lo'ū nuu e ō? I le aso a taeao, o le a to'ulu ai le uato'a i le laueleele atoa.' O le mea lenā na tupu. I le aso

**“O le a outou toe iloa ai lava le eseesea o le tagata amiotonu ma le tagata amioleaga, o le eseesea fo'i o lē o loo auauna i le Atua ma lē e lē o auauna iā te ia.”—Malaki 3:18**





na sosoo ai, na faaoo mai ai e leova le uato‘a, faititili ma le afi. O se matagi pito sili ona malosi lea ua vaaia e tagata Aikupito. Na matuā faaleagaina laau ma meatotō a tagata Aikupito, ae e le‘i iai se mea na faaleagaina i le nuu o Kosenā. Na fai atu Farao: ‘Talosaga atu iā leova e taofi lenei mala, ona tuu atu lea o outou e ō.’ Ae o le taimi lava na uma ai le uato‘a ma timuga, na toe sui fo‘i le mafaufau o Farao.

Ona fai atu lea o Mose: ‘O le a ‘aina e sē akerise so o se laau na totoe mai i mea na faaleagaina i le matagi.’ Na ‘aina e le faitau miliona o sē akerise mea uma sa totoe i fanua ma luga o laau. Na talosaga atu Farao: ‘Ia ‘ai‘oi atu iā leova e aveese nei sē akerise.’ Ae ina ua aveese fo‘i e leova sē akerise, sa faauamaaa pea Farao.

Na faapea atu leova iā Mose: ‘Ia faaloaloa lou lima i le lagi.’ E le‘i umi ae pogisa atoa le lagi. E tolu aso na pogisa ai le atunuu atoa, ma e le‘i mafai e tagata Aikupito ona iloa se mea po o se tagata. E na o tagata Isaraelu lava sa malamalama o latou fale.

Na fai atu Farao iā Mose: ‘E mafai ona outou ō ma lou nuu, ae tuu na o a outou manu iinei.’ Na tali atu Mose: ‘E tatau ona ave a matou manu, ina ia mafai ona fai ai a matou taulaga i lo matou Atua.’ Na matuā ita Farao i lenei mea ma faapea atu ma le leotele: ‘Ia alu ese loa mai iā te a‘u. O le taimi lava ou te toe vaai ai iā te oe, o le a ou fasiotia oe.’

**Fesili:** O ā isi mala na aumai e leova?  
O le ā le eseese o na mala mai i mala muamua e tolu?

**Esoto 8:20–10:29**

## 21 Le Mala Lona Sefulu


Na fai atu Mose iā Farao o le a lē toe sau iā te ia. Ae a o le'i alu ese Mose, na ia fai atu iā Farao: 'I le tā o le sefulu lua i le pō, o le a feoti ai ulumatua uma o Aikupito, mai lava i le atalii o Farao e oo i atalii o pologa.'

Na faatonuina e leova tagata Israelu ina ia faia se 'aiga faapitoa. Na ia faapea atu: 'Ia tapē se tama'i mamoe po o se tama'i 'oti e tasi le tausaga le matua, ona ave lea o lona toto ma sausau ai luga o le faitoto'a e ulu atu ai i totonu o lou fale. Ia tunu le aano, ona 'ai lea faatasi ma le falaoa e lē faafefeteina. Ia fai outou ofu ma seevae, ma sauni e ō. O le pō lenei o le a ou faasa'olotoina ai outou.' Se'i mafaufau i le matuā fiafia o tagata Israelu i lenā tala!

I le tā o le sefulu lua i le pō, na alu atu ai le agelu a leova i fale uma i Aikupito. O fale uma e le'i sausauina i le toto luga o faitoto'a, na fasiotia a latou ulumatua uma. Ae na pāsia e le agelu fale sa sausauina i le toto luga o faitoto'a. Na fasiotia ulumatua a aiga uma lava i Aikupito, e tusa pe mau'oa pe matitiva. Ae e le'i iai ma se tamaitiiti Israelu na oti.

E oo lava i le atalii o Farao na fasiotia. Ua lēlavā e Farao onosaia nei mea. O lea na ia fai atu ai loa iā Mose ma Arona: 'Ia

**“O le mea tonu lea ua ou lē faaumatiaina ai oe, ina ia faaalua ai lo'u mana e ala iā te oe, ma faailoa atu ai lo'u igoa i le lalolagi uma.”—Roma 9:17**





tula'i ma o ese loa. O e tapua'i i lo outou Atua. Ave a outou manu ma o ese loa.'

Na o ese tagata Isaraelu mai i Aikupito, a o atoa le masina. Na faamaopoopo i aiga ma ituaiga. E to'a 600,000 tamaloloa Isaraelu na iai, faapea le to'atele o fafine ma tamaiti. E to'atele fo'i isi tagata sa o faatasi ma tagata Isaraelu, ina ia latou tapua'i fo'i ia leova. Ua i'u lava ina faasa'olotoina tagata Isaraelu!

O tausaga ta'itasi uma lava, sa tatau ona faia ai e tagata Isaraelu lena 'aiga faapitoa, ina ia manatua ai le auala sa faasa'olotoina ai i latou e leova. Na ta'ua lena 'aiga faapitoa o le Paseka.

**Fesili:** O le a le mala lona sefulu?

O le a na tatau ona faia e tagata Isaraelu, ina ia faasaoina ai i latou mai i lena mala?

**Esoto 11:1-12:42;13:3-10**

## 22 Se Vavega i le Sami Ulaula

O le taimi lava na faalogo ai Farao ua ò ese tagata Isaraelu mai i Aikupito, na toe sui ai loa lona mafaufau. Na ia faatonuina ana ‘autau: ‘Ia sauni a’u kariota uma o le taua, ma tatou ò e tuliloa i latou. Sa lē tatau ona tatou tuuina atu i latou e ò.’ O lea na ò ai loa Farao ma ana fitafita e tuliloa tagata Isaraelu.

Sa ta’ita’ia e leova ona tagata, e ala i se ao faaniutū i le ao ma se afi faaniutū i le pō. Na ia ta’ita’ia i latou ma taunuu ai i le Sami Ulaula, ma o i inā na faatonuina e leova e faatutū ai o latou fale’ie.

Ona iloa atu lea e tagata Isaraelu o Farao ma ana ‘autau o loo tuliloa atu i latou. O le taimi lea ua leai se mea e latou te sosola i ai, auā ua latou iai i le va o le sami ma ‘autau a Farao. Na latou alalaga atu iā Mose: ‘O le a matou feoti. Sa tatau ona tuu pea i matou i Aikupito.’ Ae ua tali atu Mose: ‘Aua tou te fefefe. Ia faatalitali ona iloa lea o le auala o le a faasaoina ai i tatou e leova.’ Sa matuā talitonu lava Mose iā leova, a ea?

Na faapea mai leova i tagata Isaraelu e talai o latou fale’ie ma sauni e ò. I lenā lava pō, na siitia ai e leova le ao ma tuu i le va o tagata Aikupito ma tagata Isaraelu. Sa pogisa le itu na iai tagata Aikupito, ae malamalama le itu na iai tagata Isaraelu.

Na faapea atu leova iā Mose e faaloaloa lona lima i le sami. Ona



aumaia lea e leova o se matagi malosi na agi i le pō atoa. Na vaeluaina le sami, ma mātūtū ai le ogatotonu o le sami. O lea na mafai ai e le faitau miliona o tagata Israelu ona savavali i luga o lenei eleele mātūtū, ae ua avea le sami ma pā maualuga i le itu taumatau ma le itu tauagavale.

Na tuliloa atu pea e le ‘autau a Faraο tagata Israelu se’ia oo i le ogatotonu o le sami. O lea na faapogaia ai e leova le fenuminia’i o le ‘autau a Faraο. Na amata ona taavavale ese uili o kariota. Na alalaga atu le ‘autau: ‘Inā tatou sosola ese ia, auā o loo tau leova mo i latou.’

Na faapea atu leova iā Mose: ‘Ia faaloaloa lou lima i luga o le sami.’ O le taimi lava lea na toe fo’i mai ai le sami i luga o le ‘autau a Aikupito, ma feoti ai Faraο ma ana ‘autau uma. E leai se tasi na faasaoina.

I le isi itu o le sami, na usu e se motu o tagata e to’atele pese o viiga i le Atua: “Pese iā leova, auā ua matuā faamamaluina o ia. O le solofanua ma lē ua ti’eti’e ai ua ia lafoina i le sami.” A o pepese tagata, sa sisiva fafine ma tā meafaifaaili tagitagi. Na matuā fiafia tagata uma ona ua faasa’olotoina i latou.

**Fesili:** Aiseā na fefefe ai tagata Israelu ina ua oo i le Sami Ulaula?  
Na faapefea ona faasaoina e leova tagata Israelu?

**Esoto 13:21–15:21;** Neemia 9:9-11; Salamo 106:9-12; 136:11-15; Eperu 11:29

**“Ia tatou lototetele ma faapea atu:  
‘O leova o lo’u fesoasoani ia; ou te  
lē fefe lava. O le ā la se mea e  
mafi ai ona faia e tagata iā te a’u?’”  
—Eperu 13:6**





5

Ina ua mavae le lua masina talu ona sopo'ia e tagata Israelu le Sami Ulaula, ona latou taunuu ai lea i le mauga o Sinai. O i inā na osia ai e leova se feagaiga ma i latou ina ia avea i latou ma ona nuu faapitoa. Na ia pui puia i latou, ma saunia mea uma na latou mana'omia e pei o le manai e aai ai, o ofu e le'i pala ma masaesae, ma nofoaga saogalemu e tolauapi ai. Pe afai o oe o se matua, ia fesoasoani i lau tama ina ia malamalama i le māfuaaga na saunia ai e leova le Tulafono mo tagata Israelu, le fale'ie paia, ma le faiva faaositulaga. Ia faamatilatila le tāua o le tausisi i a tatou upu, ia tumau i le lotomaulalo, ma faamaoni pea iā leova.



## LESONA AUTŪ

- Pe a e faia se folafolaga iā leova, ia faamautinoa e te tausisi i ai
- O le faamaualuga, manatu faapito ma le fouvale, e leaga i'uga e oo i ai
- Na onosa'i leova i tagata Isaraelu, ma tausia i latou e ui sa latou lē faamaoni

## 23 Se Folafolaga na Faia iā leova

Pe tusa ma le lua masina talu ona ō ese tagata Isaraelu mai i Aikupito, ae latou taunuu i le mauga o Sinai ma faatutū ai i inā o latou fale'ie. Na valaauina e leova Mose e alu a'e i luga o le mauga, ma faapea atu iā te ia: 'Na ou faasaoina tagata Isaraelu. Pe afai e latou te usiusita'i iā te a'u ma tausia a'u tulafono, o le a avea i latou ma o'u nuu faapitoa.' Na toe alu ifo Mose mai i le mauga ma faamatala atu i tagata Isaraelu le mea sa faailoa mai e leova iā te ia. O le ā la latou tali atu? Na latou faapea atu: 'E matou te faia mea uma lava e fai mai ai leova.'

Na toe alu Mose i luga o le mauga, ma o i inā na faapea mai ai leova: 'E toe tolu aso ona ou avatu lea o se faatonuga iā te oe. Ia lapata'i tagata e aua ne'i o latou taumafai e ō mai i luga o le mauga o Sinai.' Na alu ifo Mose mai i le mauga ma fai atu i tagata Isaraelu, ina ia nofosauni mo le taimi e fetalai mai ai leova.

I le aso lona tolu, na vaaia ai e tagata Isaraelu le emo o uila ma se ao uliuli i luga o le mauga. Na latou faalogoina fo'i le pāpā leotetele o faititili ma le leo o se pū. Ona alu ifo ai lea o leova i luga o le mauga i le

**“Ia e alofa atu iā leova lou Atua ma lou lotoatoa, ma lou ola atoa, ma lou mafaufau atoa.”—Mataio 22:37**

afi. O le fefefe tele o tagata Isaraelu na latou gatete ai. Na ufitia le mauga atoa i le asu ma na matuā lūlūina fo'i. Na faasolosolo lava ina matuā leotele le leo o le pū. Ona faapea mai lea o le Atua i tagata Isaraelu: 'O a'u o

leova. E lē tatau ona outou tapua'i i nisi atua e ese mai iā te a'u.'

Na toe alu Mose i luga o le mauga. O i inā na avatu ai e leova iā Mose, tulafono mo tagata i le auala e tatau ona latou tapua'i atu ai iā te ia, faapea a latou amioga e tatau ona iai. Na tusi i lalo e Mose na tulafono, ona faitau atu lea i tagata Isaraelu. Na folafola atu e tagata Isaraelu: 'E matou te faia mea uma lava e fai mai ai leova.' Na latou faia se folafolaga i le Atua. Ae po o le a latou tausia lenā folafolaga?

**Fesili:** O le ā na tupu i le mauga o Sinai?

O le ā na folafola atu e tagata Isaraelu e latou te faia?

**Esoto 19:1–20:21; 24:1–8; Teuteronomie 7:6–9; Neemia 9:13, 14**







## 24 E Le'i Tausisi i la Latou Folafolaga

Na faapea atu leova iā Mose: 'Ia e sau iā te a'u i le mauga. O le a ou tusia a'u tulafono i papamaa ma tuu atu iā te oe.' Na alu a'e Mose i le mauga ma nofo ai i inā mo ao ma pō e 40. A o iai o ia i inā, na tusia ai e leova Tulafono e Sefulu i papamaa e lua ma tuu atu iā Mose.

Ina ua mavae sina taimi, na manatu ai tagata Isaraelu ua tuua e Mose i latou. Na latou fai atu iā Arona: 'E matou te manana'o i se tasi e ta'ita'ia i matou. Ia e faia se atua mo i matou.'

Na tali atu Arona: 'Ia aveese a outou auro ma aumai iā te a'u.' Ona faaliusuavai lea e Arona o auro ma faia ai se faatusa o se tama'i povi. Na faapea atu tagata: 'O le tama'i povi lenei o lo matou Atua o lē na ta'ita'ia i matou mai i Aikupito.' Na amata ona latou tapua'i i le tama'i povi auro, ma na latou fiafia, pepese, sisiva ma aai. Pe na sesē le mea na latou faia? Ioe na sesē, auā na latou folafola e na o leova lava e latou te tapua'i i ai. Ae o lea ua latou lē tausia la latou folafolaga.

**"Pe a e faia se tautoga i le Atua, aua e te faatua'i ona avatu, auā e leai se isi e fiafia i ē e valelea. O le mea ua e tautō ai, ia e avatu."  
—Failauga 5:4**



Na silasila mai leova i le mea na tupu ma faapea atu iā Mose: ‘Alu ifo ia i lalo i le mea o loo iai tagata. Ua latou lē usiusita’i iā te a’u, ma ua latou tapua’i atu i se atua sesē.’ Ona alu ifo lea o Mose mai i le mauga ma papamaa e lua.

A o latalata atu o ia i le mea o loo iai tagata, na ia faalogoina leo o tagata o loo pepese. Ona ia vaaia lea o tagata o loo sisiva ma ifo atu i le tama’i povi auro. Na matuā ita Mose. Na ia togi i lalo papamaa e lua, ma na matuā nutililii. Ona ia susunuina loa lea o le tama’i povi auro. Na ia fesili atu iā Arona: ‘O le ā le mea ua faia e lenei nuu iā te oe, ua e faia ai lenei mea matuā leaga?’ Na tali mai Arona: ‘Aua e te ita. Ua e malamalama lelei i nei tagata. Na latou manana’o i se atua, o lea na ou togi ai a latou auro i le afi ma maua mai ai lenei tama’i povi.’ Ae sa lē tatau lava iā Arona ona faia lenā mea. Na toe alu Mose i luga o le mauga, ma talosaga atu iā leova e faamagalo tagata.

Na faamagalo e leova i latou sa malilie e usiusita’i iā te ia. Po ua e iloa nei le māfuaaga na tāua ai i tagata Israelu ona mulimuli i le ta’ita’iga a Mose?

**Fesili:** O le ā na faia e tagata Israelu ina ua alu ese Mose?  
O le ā na faia e Mose ina ua toe alu ifo mai i le mauga?

**Esoto 24:12-18; 32:1-30**



## 25 Se Fale'ie Paia e Tapua'i Ai

A o iai Mose i le mauga o Sinai, na faatonuina ai o ia e leova ina ia fausia se fale'ie faapitoa e ta'ua o le fale'ie paia, ina ia mafai ai e tagata Isaraelu ona tapua'i atu iā te la. Sa mafai ona latou aveina le fale'ie paia, a o latou faimalaga solo.

Na faapea atu leova: 'Ia e fai atu i tagata e foa'i mea e mafai ona latou foa'i, ina ia fesoasoani ai i le fausiaina o le fale'ie paia.' Na foa'i e tagata Isaraelu auro, siliva, 'apamemea, maa tāua ma mea e fai ai teuga. Na latou foa'i fo'i fulufulu mamoe, 'ie lino, pa'u o manu ma isi mea. Na

matuā tele mea na latou foa'i. O lea na faapea atu ai Mose iā i latou: 'Ua lava nei mea. Aua le toe aumaia nisi mea.'

E to'atele tamāloloa ma fafine na popoto e fai galuega, na fesoasoani i le faia o le fale'ie paia. O leova na foa'iina atu le pote iā i latou e faia ai lenā galuega. O isi sa miloina filo, lalagaina ie, pe su'iina fo'i teuteu. O isi sa faamauina maa, faia galuega i auro po o le vaneina fo'i o laau.

Na faia e tagata le fale'ie paia e pei o le auala sa faatonuina i latou e leova e fai ai. Sa latou faia se 'ie pupuni matagofie e

vaeluaina ai le fale'ie paia i vaega e lua, o le Mea Paia ma le Mea e Sili Ona Paia. Sa iai i le Mea e Sili Ona Paia le atolaau o le feagaiga, lea sa faia i le laau o le setima ma le auro. Ae sa iai i le Mea Paia se tuugāmoli auro, se laulau, ma se fata e faamū ai mea manogi. Sa iai i le lotoā se faatanoa e fai mai i le 'apamemea, ma se fata faitaulaga telē. O le atolaau o le feagaiga, na faamanatu atu ai i tagata Isaraelu la latou



“Ona ou faalogo lea i le leotele mai i le nofoālii e faapea: ‘Faauta! Ua iai i tagata le fale’ie o le Atua, e mau o ia ma i latou, e fai fo’i i latou ma ona tagata. E faatasi fo’i le Atua ma i latou.’”—Faaaliga 21:3

folafolaga sa faia e usiusita’i iā leova. E te iloa le uiga o le feagaiga? O le feagaiga o se ituaiga o folafolaga faapitoa.


Na filifilia e leova Arona ma ona atalii, ina ia galulue o ni ositaulaga i le fale’ie paia. Sa tatau ona latou vaavaaia lelei, ma faia ai i inā taulaga iā leova. E na o Arona le ositaulaga sili, sa faataga ona ulu atu i le Mea e Sili Ona Paia. E faatasi i le tausaga ona ia faia lenā mea ina ia ofo atu ai taulaga mo ana agasala, o agasala a lona aiga, ma agasala a le nuu atoa o Isaraelu.

Na mǎe’a ona faia e tagata Isaraelu le fale’ie paia, ina ua mavae le tasi le tausaga talu ona latou ō ese mai i Aikupito. O lea la, ua iai le fale e latou te tapua’i atu ai iā leova.

Na tumu le fale’ie paia i le pupula o leova, ma na iai se ao i luga a’e o le fale’ie paia. Na iloa e tagata Isaraelu pe a tumau pea ona iai le ao i luga o le fale’ie paia, e tatau fo’i ona latou nonofo ai pea i inā. O le taimi lava e alu ese ai le ao, ona latou iloa fo’i lea e tatau ona latou ō i se isi nofoaga. E latou te tatala le fale’ie ma mulimuli atu i le mea e alu i ai le ao.

**Fesili:** O le ā na faatonuina e leova Mose e fai?  
O ā galuega na tuuina atu e leova iā Arona ma ona atalii?

**Esoto 25:1-9; 31:1-11; 40:33-38; Eperu 9:1-7**



## 26 O Tagata Vāai e To'asefulu Lua

Na ō ese tagata Isaraelu mai i le mauga o Sinai ma ui atu i le toafa o Parana, ma aga'i atu ai i se nuu e ta'ua o Katesa. O i inā na faapea atu ai leova iā Mose: 'Ia auina atu ni tamāloloa e to'asefulu lua, e ta'itasi mai i le ituaiga, e ō faalilolilo e vaavaai i le nuu o Kanana, le nuu lea o le a ou foa'iina atu i tagata Isaraelu.' O lea na filifilia ai e Mose ni



tamāloloa e to'asefulu lua ma fai atu iā i latou: 'Ia ō i Kanana ma vaavaai pe lelei le laueleele mo meatotō. Ia vaavaai pe vaivai pe malolosi tagata, ma po o latou nonofo i fale'ie po o aai.' Na ō loa tagata vāai e to'asefulu lua e aofia ai losua ma Kalepo.

Ina ua mavae aso e 40, na toe fo'i mai tagata vāai ma aumai laau o mati, rimoni ma vine. Na latou faapea mai: 'O se nuu e lelei le laueleele. Ae e malolosi tagata ma e maualuluga pā o aai.' Ona faapea mai lea o Kalepo: 'E mafai ona tatou manumalo iā i latou. Tatou ō loa!' Pe e te iloa le māfuaaga na faia ai e Kalepo lenā faamatalaga? Talu ai na la maufaatuatua ma losua leova. Ae na faapea mai isi tagata vāai e to'asefulu: 'E leai. E tetelē tino o tagata e pei o ni sau'ai. E pei i tatou o ni sē akerise pe a faatusatusa iā i latou.'

Na lotovaivai tagata Isaraelu, ma amata ona tomumumu ma faapea atu le tasi i le isi: 'Se'i o tatou filifili se isi ta'ita'i ma tatou toe fo'i i Aikupito. Aiseā e tatou te ō atu ai fua i lenā nuu ma feoti ai?' Na tali atu


losua ma Kalepo: ‘Aua ne’i outou lē usiusita’i iā leova, ma aua ne’i outou fefefe. E puipuia i tatou e leova.’ Ae e le’i usiusita’i tagata Israelu. Na latou manana’o fo’i e fasioti losua ma Kalepo.

O le ā na faia e leova? Na ia faapea atu iā Mose: ‘Ua faaauau pea ona lē usiusita’i tagata Israelu iā te a’u e ui i mea uma na ou faia mo i latou. O lea, o le a latou nonofo ai pea i le toafa mo tausaga e 40, ma feoti ai i inā. E na o a latou fanau ma losua ma Kalepo o le a nonofo i le laueleele na ou folafolaina atu iā i latou.’

**Fesili:** O le ā na tupu ina ua toe fo’i mai tagata e to’a 12 na ō atu faalilolilo e vaai i le nuu o Kanana? E faapefea ona iloa sa maufaatuatuaina e losua ma Kalepo leova?

**Numera 13:1–14:38;** Teuteronome 1:22-33; Salamo 78:22; Eperu 3:17-19

**“Aiseā ua outou fefefe ai, o outou o ē e faatuatua itiiti?”—Mataio 8:26**





## 27 Na Latou Fouvale iā leova

E le'i umi se taimi na iai tagata Isaraelu i le toafa, ae fouvale Koru, Tatano, Apiramo ma isi tagata e to'a 250 iā Mose ma Arona. Na latou faapea atu iā i la'ua: 'Ua matou fiu iā te oulua. Aiseā ua avea ai oe ma o matou ta'ita'i, ae avea Arona ma ositulaga sili? O loo faatasi fo'i leova ma i matou uma, ae e lē na o oulua ma Arona.' E le'i fiafia le finagalo o leova i lea mea. I le silafaga a leova, ua fouvale atu nei tagata iā te ia.

Na faapea atu Mose iā Koru ma tagata na lagolagoina o ia: 'Ō mai taeao i le fale'ie paia, ma aumai mea e tuu ai a outou afi, ma tuu i ai ma mea manogi. O le a faailoa mai e leova po o ai le tagata o le a ia filifilia.'

I le aso na sosoo ai, na ō atu Koru ma tamāloloa e to'a 250 i le fale'ie paia e feiloa'i ai ma Mose. O i inā na latou faamū ai mea manogi, e pei i latou o ni ositulaga. Na faapea atu leova iā Mose ma Arona: 'Ia oulua ō ese mai iā Koru ma tagata o loo lagolagoina o ia.'

E na o Koru sa alu atu iā Mose i le fale'ie paia, ae e le'i ō Tatano, Apiramo ma o la aiga. Na faapea mai leova i tagata Isaraelu ina ia ō ese mai i fale'ie o Koru, Tatano ma Apiramo. O le taimi lava lenā



na ō ese ai tagata Isaraelu. Na ō i fafo Tatano, Apiramo ma o la aiga mai i o latou fale'ie, ma na faafuase'i ona māvaevae le elele ma folo ai i latou. Ae na pa'ū mai se afi mai i le lagi ma susunu ai Koru ma tagata e to'a 250 na lagolagoina o ia, a o latou iai i luma o le fale'ie paia.

Ona faapea atu lea o leova iā Mose: 'Ia e aumai ni tootoo mai i ta'ita'i o ituaiga ta'itasi, ma tusi ai le igoa o le tagata i luga o lona tootoo. Ae o le tootoo o le ituaiga o Levi, ia tusi ai le igoa o Arona. Ia tuu na tootoo i totonu o le fale'ie paia. O le tootoo ou te filifilia, o le a ola mai ai ni fugālaau.'

**“Ia usiusita'i i ē o ta'imua iā te outou ma ia gaua'i iā i latou.”  
—Eperu 13:17**

I le aso na sosoo ai, na aumai e Mose tootoo uma ma faali atu i ta'ita'i o ituaiga ta'itasi. Ae o le tootoo o Arona, sa ola ai fugālaau ma fua mai ai sekati matutua. O le auala lea na faamautinoa mai ai e leova, ua ia filifilia Arona e avea ma ositaulaga sili.

**Fesili:** Aiseā na fouvale ai iā Mose Koru ma tagata na lagolagoina o ia?  
E faapefea ona tatou iloa na filifilia e leova Arona e avea ma ositaulaga sili?

**Numera 16:1–17:13; 26:9–11; Salamo 106:16–18**



## 28 Ua Tautala le Asini a Palaamo

Ua toetoe 40 tausaga o iai tagata Israelu i le toafa. E tele aai malolosi na latou faato'ilaloina. O loo latou nonofo i fanua laugatasi o Moapi i le itu i sasa'e o le vaitafe o loritana, ae o lea ua oo i le taimi e latou te ulu atu ai i le Nuu Folafolaina. Na popole Palako le tupu o Moapi, ina ne'i faoa e tagata Israelu ona laueleele. O lea na ia valaaulia ai se tamāloa e igoa iā Palaamo e alu atu i Moapi, e faamalaia tagata Israelu.

Ae na faapea atu leova iā Palaamo: 'E lē tatau ona e faamalaiaina le nuu.' O lea na musu ai Palaamo e alu i Moapi. Na toe valaaulia fo'i o ia e le tupu o Palako, ma folafola e avatu iā te ia so o se mea lava e mana'o i ai. Ae e le'i mana'o Palaamo e alu. Ona faapea atu lea o le Atua: 'E mafai ona e alu, ae e na o mea lava ou te ta'uina atu e mafai ona e tautala atu ai.'

**'Ia leoleo iā te outou  
i le mana'o tele, aua e  
lē ola se tasi i le tele o  
ana mea ua iā te ia.'**  
—Luka 12:15

Na alu Palaamo i lana asini ma aga'i atu i Moapi. Na fuafua o ia e faamalaia tagata Israelu, e ui na faatonuina o ia e leova e aua le faamalaiaina le nuu. E faatolu ona faaali ane se agelu a leova iā Palaamo i luga o le auala. E le'i iloa atu e Palaamo le agelu, ae na iloa atu e le asini. O lea na liliuese ai

le asini mai i le auala ma taumafai e alu atu i se fanua. Na toe alu atu le asini i se pā maa ma omia ai le vae o Palaamo. Mulimuli ane, ona taoto ai lea o le asini i le ogatotonu o le auala. I na taimi uma, na sasa ai e Palaamo le asini i se laau.

Na faatautala e leova le asini a o taoto i le ogatotonu o le auala. Na fesili atu le asini iā Palaamo: 'Aiseā ua e sasaina ai pea a'u?' Na tali mai Palaamo: 'Ua pei a'u o se vale ona o le mea ua e faia. Pe ana iai sa'u pelu ua ou tapēina oe.' Na fai atu le asini: 'E tele tausaga o e ti'eti'e iā te a'u. Pe na iai se taimi na ou agaleaga ai iā te oe?'


Ona faapupula lea e leova mata o Palaamo ma ia iloa atu ai le agelu. Na faapea mai le agelu: 'Na faatonuina oe e leova ina ia aua ne'i e faamalaiaina Israelu.' Na tali atu Palaamo: 'Ua ou sesē. O le a ou toe

fo'i i lo'u aiga.' Ae na faapea mai le agelu: 'E mafai ona e alu atu i Moapi, ae ia e ta'u atu na o mea e faailoa atu e leova.'

Pe na a'oa'oina e Palaamo se lesona mai i le mea na tupu? E leai. Ina ua mae'a le mea na tupu, na faatolu ona ia taumafai e faamalaia le nuu o Isaraelu, ae o na taimi ta'itasi na uuna'ia o ia e leova e faamanuia i le nuu. E le'i umi ae osofa'ia e tagata Isaraelu Moapi ma fasiotia ai Palaamo. Ma'imau pe ana usita'i Palaamo ia leova i le taimi muamua, a ea?

**Fesili:** Aisea na alu ai Palaamo i Moapi? O le a na tupu a o ia alu atu i inā?

**Numera 22:1–24:25; 31:8; Neemia 13:2; 2 Peteru 2:15, 16; Iuta 11**





6

Ina ua taunuu tagata Israelu i le Nuu Folafolaina, na avea le fale'ie paia ma nofoaga autū o le tapua'iga moni. Na a'oa'o atu e ositaulaga le Tulafono, ma na ta'ita'ia e faamasino le nuu. O loo faaalā i lenei vaega le telē o le aafiaga i isi o filifiliga ma gaoioiga a se tasi. E tatau i tagata Israelu ta'ito'atasi ona faamaoni iā leova faapea isi tagata. Ia faamatilatila le aafiaga o Tepora, Naomi, Iosua, Hana, le afafine o Iefata, ma Samuelu i tagata sa latou ola faatasi. Ia faamatilatila fo'i e oo lava iā i latou e lē o ni Israelu e pei o Raava, Ruta, Iaeli, ma tagata Kipeona, na filifili e lagolagoina tagata Israelu, talu ai sa latou iloa sa fesoasoani le Atua iā i latou.



## LESONA AUTŪ

- Na faaogā e leova faamasino e lavea'iina ona tagata i se auala faavavega
- Na tauia talavou ma ē matutua faamaoni, ona sa latou talitonu atoatoa iā leova
- E lē faailogatagata le Atua; e na te talia tagata mai i so o se atunuu ma talaaga o ē alolofa iā te ia ma faia le mea sa'ō

## 29 Na Filifilia e leova losua

Ua lata ina oti Mose, ina ua mavae le tele o tausaga o ia ta'ita'ia le nuu o Israelu. Na faapea atu leova iā te ia: 'E te lē ta'ita'ia tagata Israelu i le Nuu Folafolaina. Ae o le a ou faatagaina oe e vaai i le nuu.' Ona talosaga atu lea o Mose iā leova ina ia filifili se ta'ita'i fou e tausia tagata. Na faapea mai leova iā te ia: 'Ia e alu iā losua ma faailoa i ai o le a avea o ia ma ta'ita'i.'

Na fai atu Mose i le nuu e lē o toe umi ona maliu lea o ia, ma ua filifilia e leova losua e ta'ita'ia i latou i le Nuu Folafolaina. Ona faapea atu lea o Mose iā losua: 'Aua e te fefe. O le a fesoasoani leova iā te oe.' Mulimuli ane, ona alu ai lea o Mose i le tumutumu o le mauga o Nepo, lea na faaali atu ai e leova iā te ia le nuu na la

folafola atu iā Aperamo, Isaako ma Iakopo. Na maliu Mose ina ua 120 ona tausaga.

Na faapea atu leova iā losua: 'Ia ui atu i le vaitafe o Ioritana ma alu atu i Kanana. O le a ou fesoasoani atu iā te oe e pei ona ou fesoasoani iā Mose. Ia faamautinoa e te faitauina la'u Tulafono i aso uma. Aua e te fefe. Ia e lototele. Ia alu ma fai le mea ua ou faatonuina oe e fai.'



Na auina atu e Iosua ni tagata vāai e ō atu faalilolilo i le aai o Ieriko. I le tala o sosoo mai, o le a tatou a’oa’oina atili ai le mea na tupu i lenā aai. Ina ua toe fo’i mai nei tagata vāai, na latou faapea mai o le taimi lelei lea e ō ai loa i Kanana. I le aso na sosoo ai, na faapea atu ai Iosua i le nuu ina ia tatala fale’ie. Ona ia fai atu lea i ositaulaga o loo aveina le atolaau o le feagaiga e muamua atu i luma ma aga’i atu i le vaitafe o

loritana. Sa tatafe le vaitafe. Ae o le taimi lava na papa’i ai vae o le ‘auositaulaga i le vai, ona lē toe tatafe ai lea ma amata ona tafe ese atu i le isi itu, ma mātūtū ai le mea na tafe ai le vai. Na ō atu le ‘auositaulaga ma tutū i le ogatotonu o le vai, a o savavali atu le nuu o Isaraelu i le isi itu o le vai. E mautinoa na faamanatu atu e lenei vavega iā i latou, le mea na faia e leova i le Sami Ulaula.

O lea ua i’u lava ina taunuu tagata Isaraelu i le Nuu Folafolaina, ina ua mavae le tele o tausaga. Na mafai ona latou fausia ai fale ma aai. Na mafai ona latou totōina ai laau, togāvine ma togālaau ‘aina. O se nuu sa tafe ai le suāsusu ma le meli.

**“O le a ta’ita’iina pea oe e leova ma faamalieina oe e oo lava i le laueleele ua leai ni vai.”  
—Isaia 58:11**

**Fesili:** O ai na ta’ita’ia tagata Isaraelu ina ua malii Mose?  
O le ā le mea na tupu i le vaitafe o loritana?

**Numera 27:12-23; Teuteronomie 31:1-8; 34:1-12; Iosua 1:1-3:17**






## 30 Na Faalafi e Raava Tagata Vāai

Ina ua ō atu tagata vāai Isaraelu i le aai o Ieriko, na la nonofo i le fale o se fafine e igoa iā Raava. Na faalogo i ai le tupu o Ieriko ma na ia auina atu ai ni fitafita i le fale o Raava. Na faalafi e Raava nei tagata vāai i le tauluga o lona fale, ma fai atu i fitafita e lē iloa po o fea ua ō i ai nei tagata. Na fai atu Raava i tagata vāai: ‘O le a ou fesoasoani iā te oulua, ona ou te iloa o loo fesoasoani leova iā te outou, ma o le a outou faato’ilaloina le nuu. Faamolemole ia tautō mai o le a oulua faasoina lo’u aiga.’

Na tali atu tagata vāai: ‘E ma te tautō atu e leai se tasi i totonu o lou fale o le a fasiotia.’ Ona la fai atu lea iā Raava: ‘Ia nonoa se maea mūmū i le faamalama o lou fale, ona faasoina lea o lou aiga.’

Ona tuutuu ifo lea e Raava o tagata vāai i le faamalama e ala i se maea. Na ō atu tagata vāai i mauga ma lalafi ai mo aso e tolu a o le’i toe fo’i iā Iosua. Ona ui atu lea o tagata Isaraelu i le vaitafe o Ioritana, ma sauniuni ai e faoa le laueleele. O Ieriko le aai muamua na latou faato’ilaloina. Na faatonuina i latou e leova ina ia faatasi ona





‘Pe e le’i faapena fo’i ona ta’uamiotonuina Raava i ana galuega, ina ua ia talileleia avefe’au ma aauina atu i la’ua i se isi ala?’—Iakopo 2:25

latou savavali faataamilo i le aai, ma ia faia faapea mo aso e ono. Ae i le aso lona fitu, e faafitu ona latou savavali faataamilo i le aai. Na ili lea e ositaulaga o a latou pū, ma alalaga leotetele fitafita. Ona solo ai lea i lalo o pā o le aai. Ae e le’i solo i lalo le vaega o le pā sa iai le fale o Raava. Na faasaoina Raava ma lona aiga, ona sa latou faatuatua iā leova.

**Fesili:** Aiseā na fesoasoani ai Raava i tagata vāai? Na faapefea ona osofa’ia e tagata Isaraelu le aai o Ieriko? O le ā na tupu iā Raava ma lona aiga?

Iosua 2:1-24; 6:1-27; Eperu 11:30, 31; Iakopo 2:24-26



## 31 Iosua ma Tagata Kipeona

Sa faalogo isi nuu i Kanana e faatatau i le mea na tupu i le aai o Ieriko. Na filifili tupu o na nuu e afaatasi ina ia tau faasaga i tagata Isaraelu. Ae e ese le mea sa mafaufau i ai tagata Kipeona. Na latou ō atu iā Iosua i ofu tuai ma masaesae, ma faapea atu iā te ia: ‘Ua matou ō mai i se nuu mamao lava. Na matou faalogo i tala e faatatau iā leova ma mea uma na ia faia mo outou i Aikupito ma Moapi. Ia tautō mai e tou te lē osofa’ia i matou, ma o le a avea i matou ma a outou auaua.’

Na talitonu Iosua iā i latou ma na lotomalie e aua ne’i osofa’ia i latou. I le tolu aso mulimuli ane, ae iloa e Iosua e latou te lē ō mai i se nuu mamao. Na latou ō mai mai i Kanana. Na fesili atu Iosua i tagata Kipeona: ‘Aiseā na outou pepelo ai iā i matou?’ Na latou tali mai: ‘Na matou fefefe. E matou te iloa o loo tau leova lo outou Atua mo outou. Faamolemole aua ne’i fasiotia i matou.’ Na tausisi Iosua i lana folafolaga ma faasaoina i latou.

E le’i umi ae taumafai tupu e to’alima o Kanana ma a latou ‘autau e osofa’ia tagata Kipeona. Sa savavali Iosua ma lana

**“Ia avea la outou upu o le *loe*, ia *loe*; ma le *Leai*, ia *Leai*; o ni upu e sili i na upu e mai i lē o leaga.”—Mataio 5:37**

‘autau i le pō atoa ina ia faasaoina tagata Kipeona. Na amata le taua i le taeapō o le aso na sosoo ai. E eseese nofoaga na sosola i ai tagata Kanana, ma o so o se mea lava na latou sosola i ai na lafo mai ai e leova maa tetele. Ona talosaga atu lea o losua iā leova ina ia faatumauina pea le lā. Aiseā ua talosaga atu ai losua iā leova i lenei mea, ae e le’i iai lava se taimi muamua na tumau ai le lā? Talu ai na talitonu atoatoa losua iā leova. Na tumau pea le lā i le aso atoa se’ia oo ina fasia e tagata Isaraelu tupu o Kanana ma a latou ‘autau.

**Fesili:** O le ā na faia e tagata Kipeona ina ia puipuia ai i latou? Na faapefea ona fesoasoani leova i tagata Isaraelu?

**losua 9:1–10:15**





## 32 Se Ta'ita'i Fou ma Fafine Lototetele e To'alua

Ina ua mavae le tele o tausaga o ta'ita'ia e losua tagata o leova, ona maliu lea o ia ina ua 110 ona tausaga. A o ola o ia, sa tapua'i tagata Isaraelu ia leova. Ae ina ua maliu o ia, ona amata lea ona latou tapua'i i tupua e pei ona sa faia e tagata Kanana. Talu ai e le'i tapua'i pea tagata Isaraelu ia leova, na faataga ai e leova lapino le tupu o Kanana e faaoo faigata i tagata Isaraelu. Na talosaga atu tagata Isaraelu ia leova mo le fesoasoani. O lea na filifilia ai e leova le ta'ita'i fou o Parako. O le a fesoasoani Parako i tagata Isaraelu e toe fo'i ia leova.

Na aami e le perofeta fafine e igoa ia Tepora ia Parako e sau ina ia faailoa atu i ai le fe'au lenei a leova: 'Ave tane e to'asefulu afe ma o atu e faafeiloa'i le 'autau a lapino i le ala'vai o Kisona. O i ina o le a outou fasiotia ai Sesera, le ta'ita'i o le 'autau a lapino.' Na fai atu Parako ia Tepora: 'Ou te alu pe afai e te sau e ta te o.' Na tali mai Tepora: 'E ta te o lava. Ae ia manatua e le o oe e fasiotia Sesera. Na fetalai mai leova o le a fasiotia o ia e se fafine.'

Na o Tepora faatasi ma Parako ma lana 'autau i le mauga o Tapora e sauni ai mo le taua. O le taimi lava na faalogo ai Sesera i lena mea, ona ia faapotopoto lea o ana kariota o taua ma 'autau i le alia o Kisona. Na

faapea atu Tepora iā Parako: ‘O le aso lenei o le a tuuina atu ai e leova iā te oe le manumalo.’ Na ō ifo Parako ma lana ‘autau e to‘asefulu afe mai i le mauga e tau ma le ‘autau malosi a Sesera.

Ona faapogaia lea e leova o le ālia o Kisona ina ia tatafe, ma i‘u ai ina lē mafai e kariota a Sesera ona toe ō ese ona ua mamau i le palapala. Ua tuu e Sesera lana kariota ae sola ese. Na manumalo Parako ma lana ‘autau i le ‘autau a Sesera, ae o lea ua sola Sesera. Na sola o ia ma lafi i le fale‘ie o se fafine e igoa iā laeli. Na avatu e laeli iā te ia le fagupa‘u o loo iai le susu ina ia inu ai, ma ufiufi iā te ia i se palanikeke. Ona moe ai lea o Sesera ua matuā vaivai o ia. Ona tolotolo lemū atu lea o laeli ma fasioti Sesera, e ala i le tutu‘i o lona ulu i se pine o le fale‘ie.

Na alu atu Parako e sa‘ili Sesera. Ae na sau i fafo laeli mai i lona fale‘ie ma fai atu iā Parako: ‘Sau i totonu, se‘i o‘u faasino atu iā te oe le tagata o loo e sa‘ilia.’ Ua alu atu Parako i totonu o le fale‘ie ma iloa ai ua oti Sesera. Na pepese Parako ma Tepora e viia ai leova mo le tuuina mai o le manumalo i tagata Isaraelu. I le isi 40 tausaga na sosoo ai, sa nonofo filemu tagata Isaraelu.

**“O fafine e folafolaina atu le tala lelei, o le ‘autau e to‘atele i latou.”  
—Salamo 68:11**

**Fesili:** O le ā le auala na fesoasoani ai Tepora i tagata Isaraelu? Na faapefea ona faaalua e laeli le lototele?

**Faamasino 4:1–5:31**



## 33 Ruta ma Naomi

Ina ua leai ni mea'ai i Isaraelu, ona ō lea o se fafine Isaraelu e igoa iā Naomi ma lana tane ma le la fanau tama e to'alua i le nuu o Moapi. Mulimuli ane na maliu le tane a Naomi. Na faaipoipo lana fanau tama iā Ruta ma Orepa o ni fafine Moapi. Ae e faanoanoa ina ua mavae sina taimi, na maliliu fo'i le fanau tama a Naomi.

Ina ua faalogo Naomi ua toe tele mea'ai i Isaraelu, na filifili ai loa o ia e toe fo'i i lona nuu. Na latou malaga faatasi ma Ruta ma Orepa. Ae a o latou iai i luga o le ala, na faapea atu Naomi iā i la'ua: 'Na aveva oulua o ni avā lelei i la'u fanau tama, ma na oulua alolofa fo'i iā te a'u. Ou te mana'o ia oulua toe faaipoipo. Ia toe fo'i i Moapi.' Na tali mai Ruta ma Orepa: 'E ma te alolofa iā te oe. E ma te lē manana'o e ō ae tuu oe.' Ae na fai atu pea Naomi iā i la'ua e toe fo'i i lo la nuu. Na i'u ina toe fo'i Orepa ae e le'i alu Ruta. Na fai atu Naomi iā te ia: 'Ua toe fo'i Orepa i lona nuu ma ona atua. Ia toe fo'i faatasi ma ia, ma e alu i le aiga o lou tinā.' Ae na tali mai



Ruta: 'Ou te lē tuua oe. O lou nuu e fai ma o'u nuu, ma o lou Atua, o lo'u Atua fo'i lea.' O le ā sou manatu, o ā ni faalogona o Naomi ina ua fai e Ruta na upu?

Na taunuu Ruta ma Naomi i Isaraelu i le taimi na amata ai ona selesele karite, o se tasi lea o ituaiga o saito. I se tasi aso, na alu Ruta e ao mai karite na totoe i le fanua o se tamāloa e igoa iā Poasa, le tama tama a Raava. Na faalogo Poasa i tala e faatatau iā Ruta e faapea o ia o se tagata Moapi, ma sa nonofo pea ma Naomi ona o lona alofa faamaoni iā te ia. Na faatonu e Poasa lana 'aufaigaluega e faatotoe pea i le fanua ni nai karite, ina ia alu atu Ruta e ao mai.



I lenā lava afiafi, na fesili ai Naomi iā Ruta: ‘O le fanua o ai na e galue ai i lenei aso?’ Na tali atu Ruta: ‘O le fanua o le tamāloa e igoa iā Poasa.’ Na faapea mai Naomi iā te ia: ‘E aiga Poasa ma la’u tane. Ia galue pea i lona fanua faatasi ma isi fafine talavou. E te saogalemu ai i inā.’

**‘E iai le uō e sili ona alofa faamaoni nai lo o le uso.’  
—Faataoto 18:24**

Na faaauau pea ona galue Ruta i le fanua o Poasa se’ia oo lava i le taimi na uma ai le seleseleina o karite. Na mātau e Poasa o Ruta o se tagata e galue malosi ma amiolelei. I na aso, pe afai e maliu se tamāloa ae le’i maua ni ona atalii, ona faaipoipo lea o sona tauaiga i lana avā. O lea na faaipoipo ai Poasa iā Ruta, ma maua se la tama tama e igoa iā Opetā. Mulimuli ane, na avea Opetā ma tamā o le tamā o le tupu o Tavita. Na matuā fiafia uō a Naomi, ma latou faapea atu: ‘Muamua, sa foa’i atu e leova Ruta iā te oe ma na ia tausia lelei oe, ma o lea ua ia fanauina mai ai se tama tama. Ia viia leova.’

**Fesili:** O ā auāla na faaalua ai e Ruta le alofa iā Naomi? Na faapefea ona tausia e leova Ruta ma Naomi?

**Ruta 1:1–4:22; Mataio 1:5**






## 34 Faato'ilalo e Kitiona Tagata Mitiana

A o faagasolo taimi, na lē toe tapua'i tagata Isaraelu iā leova ae amata ona tapua'i i atua sesē. E fitu tausaga na gaoia ai e tagata Mitiana manu a tagata Isaraelu ma faaleaga a latou meatotō. Ina ia sosola mai i tagata Mitiana, na ō ai tagata Isaraelu ma lalafi i totonu o ana ma mauga. Na latou talosaga atu iā leova e lavea'i i latou. O lea na auina mai ai e leova se agelu i se alii talavou e igoa iā Kitiona. Na faapea mai le agelu iā te ia: 'Ua filifilia oe e leova e avea o se toa malosi.' Ae na fesili atu Kitiona: 'E faapefea ona ou faaolaina Isaraelu? O a'u o se tagata faatauva.'

Na faapefea ona iloa e Kitiona ua filifilia o ia e leova? Na ia tuu le fulufulu mamoe i luga o le laueleele ma faapea atu iā leova: 'Pe afai e oo atu i le taeao ua susū le fulufulu mamoe i le sau ae mātūtū pea le laueleele, ona ou iloa lea ua e filifilia a'u e faaolaina Isaraelu.' I le taeao na sosoo ai, na matuā susū le fulufulu mamoe ae mātūtū le laueleele. Ae na toe talosaga atu fo'i Kitiona ina ia oo atu i le taeao e sosoo ai, ua mātūtū le fulufulu mamoe ae susū le laueleele. Ina ua tupu lenā mea, ona faato'ā mautinoa loa lea e Kitiona ua filifilia o ia e leova. Na ia faapotopoto lana 'autau e tau ma tagata Mitiana.







Na faapea atu leova iā Kitiona: ‘Ou te tuuina atu le manumalo i tagata Isaraelu. Ae talu ai e to’atele au fitafita, atonu o le a outou manatu ai na outou manumalo ona o lo outou malosi. Ia fai atu i so o se tasi e fefe e toe fo’i i lona aiga.’ O lea na toe fo’i ai fitafita e 22,000 i o latou aiga, ae totoe ai na o le 10,000. Ona faapea mai lea o leova: ‘O loo to’atele pea fitafita. Ia ave i latou i le vai ma faatonu e feinu. Ia tuu na o i latou e feinu ma mataala e vaai le fili.’ E na o le 300 fitafita na mataala a o feinu. Na folafola atu e leova e na o le pau ia o tamāloloa o le a faato’ilaloina fitafita Mitiana e 135,000.

**“Ina ia matou maua le mana lea e sili atu i le malosi o tagata, o le mana lea e mai i le Atua, ae e lē mai iā i matou lava.”  
—2 Korinito 4:7**

I lenā pō, na faapea atu ai leova iā Kitiona: ‘O le taimi lenei e osofa’i ai loa tagata Mitiana.’ Ona avatu lea e Kitiona i lana ‘autau o pū ma fagu tetele sa iai sulu i totonu. Na fai atu Kitiona iā i latou: ‘Ia outou vāai mai iā te a’u ma faata’ita’i mea ou te faia.’ Na ili e Kitiona le pū, tata’e le fagu, uu i luga lana sulu ma alaga leotele: ‘O le pelu a leova ma Kitiona.’ O gaoioiga fo’i na sa faia e lana ‘autau e to’a 300. Na matuā fefefe fitafita Mitiana ma sosola ese. O lo latou lē mautinoa o le mea ua tupu, na toe osofa’i ai e le tasi le isi. Ua faaalua mai i inei, na toe fesoasoani fo’i leova i tagata Isaraelu e faato’ilalo o latou fili.

**Fesili:** Na faapefea ona faamautinoa atu e leova iā Kitiona na la filifilia o ia?  
Aiseā sa na o le to’a 300 ai tagata o le ‘autau a Kitiona?

**Faamasino 6:1–16; 6:36–7:25; 8:28**

## 35 Tatalo Hana Ina ia Maua Sana Tama

E iai se tagata Israelu e igoa iā Elekana, ma e to'aluana avā o Hana ma Penina. Peita'i, e sili atu lona alofa iā Hana. Na taufaalili Penina iā Hana i taimi uma, talu ai e leai se fanau a Hana ae e to'atele le fanau a Penina. I tausaga ta'itasi, e ō ai Elekana ma lona aiga e tapua'i i le fale'ie paia i Sailo. I se tasi taimi a o latou iai i inā, na vaaia ai e Elekana le matuā faanoanoa o si ana avā pele o Hana. Na fai atu o ia: 'Faamolemole Hana aua e te tagi. O lea ou te ii e faamāfanafana iā te oe. Ou te alofa iā te oe.'

Mulimuli ane, ona alu ai lea o Hana e tatalo na o ia. Sa tagi pea o ia a o talosaga atu iā leova e fesoasoani mai. Na ia folafola atu iā leova: 'leova, afai e te aumai mo a'u se tama tama, o le a ou tuuina atu o ia iā te oe, ma o le a ia auauna iā te oe i lona olaga atoa.'

Na iloa atu e le Ositulaga Sili o Eli le tagi masūsū o Hana, ma manatu ai ua onā o ia. Na faapea atu Hana: 'Lo'u alii e, ou te lē o onā. E iai so'u faafitauli faigatā ma o loo o'u tatalo atu iā leova e faatatau i lea faafitauli.' Ina ua iloa e Eli e sesē o ia, ona ia fai atu lea iā Hana: 'Tau ina ia foa'i atu e le Atua le mea o loo e talosaga atu ai.' Na toe lelei faalogona o Hana ma alu o ia i lona ala. E le'i atoa se tausaga ae ia fanauina se tama tama ma faaigoa iā Samuelu. Se'i mafaufau i le matuā fiafia o Hana i lenā mea!





**“Ia talosaga atu pea, ona foa’iina  
mai ai lea iā te outou. Ia sa’ili atu  
pea, ona outou maua ai lea.”  
—Mataio 7:7**

E le’i galo iā Hana lana folafolaga iā leova. O le taimi lava na te’a ai Samuelu mai i le susu, na ave ai loa o ia e Hana i le fale’ie paia. Na ia faapea atu iā Eli: ‘O le tama leni na ou tatalo atu ai iā leova. Ua ou tuuina atu o ia iā leova i aso uma o lona ola.’ I tausaga ta’itasi e asiasi atu ai Elekana ma Hana iā Samuelu, ma avatu se ofu fou lima pupuu mo ia. Na foa’i atu e leova iā Hana isi tama tama e to’atolu ma fanau teine e to’alua.

**Fesili:** Aiseā na matuā faanoanoa ai Hana? Na faapefea ona faamanuia leova iā Hana?

**1 Samuelu 1:1-2:11, 18-21**

## 36 Le Tautoga a lefata

Na lē toe tapua'i fo'i tagata Israelu iā leova ae amata ona tapua'i i atua sesē. Ina ua osofa'ia e tagata Amoni tagata Israelu ma tau ma i latou, e le'i mafai e na atua sesē ona fesoasoani iā i latou. Mo le tele o tausaga, na matuā mafatia tagata Israelu. O lea na latou talosaga atu ai iā leova: 'Ua matou agasala. Faamolemole lavea'i i matou mai i o matou fili.' Na faaleaga e tagata Israelu a latou tupua ma amata ona toe tapua'i atu iā leova. E le'i fia silasila mai leova o faauau pea o latou mafatiaga.

Sa iai se tagata toa e igoa iā lefata, ma na filifilia o ia e ta'ita'ia tagata Israelu i le taua ma tagata Amoni. Na ia faapea atu iā leova: 'Pe afai e te fesoasoani mai iā i matou ina ia manumalo i le taua, ou te tautō atu pe a ou toe fo'i i lo'u aiga, o le tagata muamua e sau i fafo o lo



matou fale e faafeiloa'i a'u, ou te tuuina atu o ia iā te oe.' Na faafofoga mai leova i le tatalo a lefata, ma fesoasoani iā te ia ina ia manumalo i le taua.

Ina ua toe fo'i lefata i lona aiga, o le tagata muamua na sau e faafeiloa'i o ia o lona afafine. E na o le pau lea o lona alo. Na siva o ia ma tā le topa, o se meafaifaaili e tagitagi. O le ā le mea o le a fai e lefata? Na ia manatua lana tautoga ma faapea ane: 'Auē, lo'u afafine e! Ua e tuia lo'u fatu. Na ou faia se tautoga iā leova. Ina ia faataunuuna lenā tautoga, e tatau ona ou auina atu oe e auuina i le fale'ie paia i Sailo.' Na tali mai lona afafine: 'Lo'u tamā e, afai ua e tautō iā leova, ia e faia iā te a'u e pei ona e tautō ai. E pau le mea ou te talosaga atu ai, ia tuu mai a'u e matou te ō ma a'u uō teine mo masina e lua i luga o mauga. Pe a uma lenā, ona ou alu ai lea i le fale'ie paia.' Na auuina ma le faamaoni le afafine o lefata i le fale'ie paia i lona olaga atoa. I tausaga ta'itasi, e ō atu ai ana uō e asi o ia i Sailo.

**Fesili:** O le ā le tautoga na faia e lefata?

O le ā le tali atu a le afafine o lefata i le tautoga a lona tamā?

**Faamasino 10:6–11:11; 11:29–40; 1 Samuelu 12:10, 11**

**'O lē ua sili lona alofa  
i lona atalii po o lona  
afafine nai lo o a'u, e  
lē aogā o ia iā te a'u.'**  
—Mataio 10:37





## 37 Ua Talanoa Mai leova iā Samuelu

E to'alu atalii o Eli le Ositaulaga Sili sa auauna o ni ositaulaga i le fale'ie paia. O o la igoa o Hofeni ma Fineaso. E la te le'i usita'ia tulafono a leova, ma e le'i lelei le auala na la feagai ai ma tagata. Pe a avatu e tagata Isaraelu manu e osi ai taulaga iā leova, e ave e Hofeni ma Fineaso aano o manu e sili ona lelei mo i la'ua. Na faalogo Eli i mea na faia e ona atalii, ae e le'i gaoioi o ia e faasa'o. Po o le a faataga pea e leova nei mea e tutupu?

E ui lava e la'itiiti Samuelu nai lo o Hofeni ma Fineaso, ae e na te le'i faata'ita'i iā i la'ua. Sa fialia leova iā Samuelu. I se tasi pō a o moe o ia, na faalogoina ai e Samuelu se leo o valaau i lona igoa. Na tu o ia i luga ma tamo'e atu iā Eli ma faapea atu: 'O a'u lenei.' Ae na tali mai Eli: 'Ou te le'i valaau atu iā te oe. Alu e toe taoto.' Ona toe alu ai lea o Samuelu e moe. E le'i umi ae ia toe faalogoina fo'i le leo o valaau mai iā te ia. I le taimi lona tolu na faalogoina ai e Samuelu le leo o valaau mai iā te ia, na iloa ai loa e Eli o leova lea o loo valaau mai iā Samuelu. O lea na fai atu ai Eli iā Samuelu, pe a toe faalogoina le leo, e tatau ona e tali atu: 'Fetalai mai ia leova. O loo faalogo atu lau auauna.'

Na alu Samuelu e taoto, ae ia toe faalogoina le leo o valaau mai: 'Samuelu! Samuelu!' Na tali atu o ia: 'Fetalai mai. O loo faalogo atu lau auauna.' Na faapea mai leova iā te ia: 'Ia ta'u atu iā Eli o le a ou

faasalaina o ia ma lona aiga. O loo ia iloaina mea leaga o loo faia e ona atalii i totonu o lo'u fale'ie paia, ae e leai sana gaoioiga o fai i ai.' I le taeao na sosoo ai, na tatala ai e Samuelu faitoto'a o le fale'ie paia e pei ona ia masani ai. Na fefe o ia e ta'u atu i le ositaulaga sili le mea sa fetalai mai ai leova. Ae na valaau atu Eli iā te ia ma fesili: 'Lo'u atalii e, o le ā na fetalai mai ai leova iā te oe? Ta'u mai mea uma na ia fetalai atu ai iā te oe.' Ona ta'u atu lea e Samuelu o mea uma na fetalai mai ai leova iā te ia.

A o tuputupu a'e Samuelu, sa faaauau pea ona fesoasoani leova iā te ia. Na iloa e tagata Isaraelu uma, ua filifilia e leova Samuelu e avea o se perofeta ma o se faamasino.

**Fesili:** O le ā le eseese o Samuelu mai iā Hofeni ma Fineaso?  
O le ā le fe'au na ta'u atu e leova iā Samuelu?

1 Samuelu 2:12-17, 22-26; 3:1-21; 7:6

“Ia e manatua o Lē e  
Sili na Foafaina oe i  
aso o lou taule'ale'a.”  
—Failauga 12:1



## 38 Foa'i e leova le Malosi iā Samasoni

Na toe tapua'i fo'i le to'atele o tagata Isaraelu i tupua. O lea na faataga ai e leova tagata Filisitia e pule i o latou laueleele. Ae na iai lava tagata Isaraelu sa alolofa iā leova. O se tasi o i latou o se tamāloa e igoa iā Manoa. E leai sa la fanau ma lana avā. I se tasi aso, na auina mai ai e leova se agelu i le avā a Manoa. Na faapea atu le agelu iā te ia: 'O le a e fanauina se tama tama. O le a ia lavea'ia tagata Isaraelu mai i tagata Filisitia. O le a avea o ia o se Naseri.' Pe e te iloa po o ai nei tagata e ta'u o Naseri? O i latou o ni auuuna faapitoa a leova. E le'i faataga ona 'oti o latou lauulu.

E le'i umi ae fanau le atalii o Manoa, ma ua ia faaigoa o ia iā Samasoni. Ina ua tuputupu a'e o ia, na faatupuina e leova lona malosi ma avea ai Samasoni o se tagata e sili ona malosi. Sa mafai e

**“O mea uma lava, ua ou maua le malosi mai iā te ia o lē na foa'i maia iā te a'u le mana.”—Filipi 4:13**

Samasoni ona tapēina se leona e aunoa ma le faaaogāina o se auupega. I se tasi taimi, na fasiotia to'atasi ai e Samasoni tagata Filisitia e to'a 30. Na feita tagata Filisitia iā te ia, ma sa'ili pea auala e fasiotia ai o ia. I se tasi taimi a o

moe Samasoni i Kasa, na ō atu ai tagata Filisitia i faitoto'a o le pā o le aai ma faatalitali ai i inā, ina ia mafai ona latou fasiotia o ia i le taeao e sosoo ai. Ae i le vaeluapō, na ala a'e Samasoni ma alu atu i le faitoto'a o le pā o le aai ma fafa'i ese. Ona ia amoina lea o le faitoto'a se'ia oo i le tumutumu o se mauga e lata i Heperona.

I se taimi mulimuli ane, na ō atu ai tagata Filisitia i le uō teine a Samasoni o Talila ma faapea atu: 'E matou te avatu ma oe tupe siliva e afe selau, pe afai e te sa'ilia le māfuaaga o le malosi o Samasoni. E matou te manana'o e pu'e o ia ma ave i le falepuipui.' Na ioe Talila i le mea sa latou fai mai ai, ona o lona mana'o i le tupe. I le taimi muamua, na musu Samasoni e ta'u iā te ia le māfuaaga o lona malosi. Ae ua faaauau pea ona tauanau o ia e Talila se'ia oo lava ina ta'u i ai e Samasoni le pogai o lona malosi. Na ia faapea atu: 'E le'i 'otiina lava lo'u lauulu ona o a'u o se Naseri. Pe afai e 'oti lo'u lauulu, o le a lē toe iai so'u malosi.' Na matuā sesē lava le mea sa fai e Samasoni, a ea?



Na alu atu faavave loa Talila ma fai atu i tagata Filisitia: ‘Ua ou iloa le māfuaaga o lona malosi.’ Ua ia faamoe Samasoni i ona vae, ona ia valaau atu lea i se tasi tagata e sau e ‘oti le lauulu o Samasoni. Ua valaau o ia: ‘Samasoni, ua ō mai tagata Filisitia.’ Ona ala lea o Samasoni, ae ua leai sona malosi. Ua pu‘e o ia e le ‘au Filisitia, faatauaso o ia, ma ave i le falepuipui.

I se tasi aso, na faapotopoto ai le faitau afe o tagata Filisitia i le malumalu o lo latou atua o Takono, ma alalaga leotetele e faapea: ‘Ua tuuina mai e lo tatou atua iā i tatou Samasoni. Aumai i fafo Samasoni, ina ia tatou toē ai iā te ia.’ Ona latou ave lea o ia ma faatū i le va o pou tetele e lua ma taufaalili iā te ia. Na valaau atu Samasoni: ‘leova e, faamolemole se‘i toe foa‘i tasi mai lava le malosi i lenei taimi.’ O le taimi lea ua toe uumi le lauulu o Samasoni. O lea, na ia faaaogā ai lona malosi uma na totoe e tulei ai nei pou tetele e lua o le malumalu. Na malepe i lalo le fale atoa ma fasiotia ai tagata uma na iai, ma na maluu ai fo‘i ma Samasoni.

**Fesili:** O le ā le māfuaaga o le malosi o Samasoni?

O le ā le mea na tupu iā Samasoni ina ua ia ta‘uina iā Talila le māfuaaga o lona malosi?

**Faamasino 13:1–16:31**





7

O loo faamatalaina i lenei vaega talaaga o olaga o le tupu o Saulo ma le tupu o Tavita, lea e pe tusa ma le 80 tausaga le umi. I le taimi muamua, sa lotomaulalo ma mata'ū Saulo i le Atua. Ae e le'i umi ae suia ona uiga ma e le'i mana'o e mulimuli i ta'iala a leova. Na teena o ia e leova, ae a o faagasolo taimi na avatu e leova le faatonuga iā Samuelu e faauu Tavita e avea ma tupu e sosoo ai o Isaraelu. Sa lotoleaga Saulo iā Tavita, ma e tele taimi na ia taumafai ai e fasiotia Tavita, ae e le'i toe tau'i atu lava e Tavita na mea. Na iloa e Ionatana le atalii o Saulo o Tavita sa filifilia e leova, o lea na ia faamaoni ai iā Tavita. Na faia e Tavita ni agasala matuiā, ae e na te le'i teena lava a'oa'iga a leova. Pe afai o oe o se matua, ia fesoasoani i lau tama ina ia iloa le tāua o le usiusita'i pea ma le faamaoni iā leova, faapea i latou ua ia filifilia e ta'ita'ia ma faatonutonuina i tatou.



## LESONA AUTŪ

- O lo tatou usiusita’i ma le lotoatoa o le mea sili lea ona t̄aua e mafai ona tatou avatu mo leova
- Aua le tauimasui, ae ia faatalitali īa leova o le a ia faasa’oina mea l̄e tonu
- Pe a tatou faia se agasala matuīa, e l̄e tatau ona tatou taumafai e nan̄a

## 39 Le Tupu Muamua o Isaraelu

Na tofia e leova faamasino Isaraelu e ta'ita'ia i latou, ae na latou manana'o i se tupu. Na latou faapea atu ia Samuelu: 'Ua iai uma tupu o isi nuu. E matou te manana'o fo'i i so matou tupu.' Na manatu Samuelu e sesē lenei mea, o lea na ia tatalo atu ai ia leova e faatatau i lea mataupu. Na faapea mai leova ia te ia: 'E lē o tetee tagata ia te oe, ae ua latou tetee mai ia te a'u. Ia faapea atu e mafai ona fai so latou tupu, ae e tele mea o le a mana'omia e le tupu mai ia i latou.' Ae na tali atu le nuu: 'E matou te lē popole i lenā mea. E pau le mea e matou te manana'o i ai o se tupu.'

Na faapea mai leova ia Samuelu, o le a avea se tamāloa e igoa ia Saulo ma tupu muamua o le nuu. Ina ua asiasi atu Saulo ia Samuelu i Rama, ona faauu lea e Samuelu o Saulo e avea ma tupu, e ala i le liligiina o le suāuu i lona ulu.

Mulimuli ane ona faapotopoto ai lea e Samuelu o tagata Isaraelu, e faailoa atu i ai lo latou tupu fou. Ae ua latou lē iloa po o fea o iai Saulo. E te iloa le māfuaaga? Talu ai sa lafi o ia i le mea o iai ato. Ina ua latou maua Saulo, ona latou aumaia lea o ia i luma o tagata. E sili atu le umi o Saulo i lo o isi tagata uma, ma e sili atu fo'i lona aulelei. Na faapea atu Samuelu: 'Faauta, o lē ua filifilia e leova.' Ona alalaga atu lea o tagata: 'Ia soifua le tupu.'

I le taimi muamua, na faalogo le tupu o Saulo ia Samuelu ma usita'i ia leova. Ae na mulimuli ane sui ona uiga. O se faata'ita'iga, sa lē tatau ia Saulo ona ofoina atu ni taulaga. I se tasi taimi, na fai atu ai Samuelu ia Saulo e faatali mo ia, ae na tuai ona alu ane Samuelu. O lea na filifili ai Saulo e ofo loa e ia taulaga. O le ā le tali atu a Samuelu? Na faapea atu Samuelu ia Saulo: 'Sa tatau ona e usiusita'i ia leova.' Po o le a a'oa'oina e Saulo se lesona mai i le mea sesē na ia faia?

Mulimuli ane, ina ua alu Saulo e tau ma tagata Amaleka, na fai atu Samuelu ia te ia e aua ne'i faasaoina se tasi o i latou. Ae na filifili Saulo e faasaoina Akako le tupu o Amaleka. Na faapea atu leova ia Samuelu: 'Ua liliuese Saulo mai ia te a'u, ma ua lē faalogo o ia ia te a'u.'

**“E sili atu le ususita’i i lo o le taulaga.”—1 Samuelu 15:22**

Na matuā faanoanoa Samuelu ona o lenei mea ma faapea atu iā Saulo: ‘Talu ai ua e lē toe ususita’i iā leova, o le a ia filifilia se isi tupu.’ A o alu ese Samuelu, ae tago atu Saulo i le pito o lona ofu ma masae ai. Ona fai atu lea o Samuelu iā Saulo: ‘Ua aveesea e leova le malo mai iā te oe.’ Na finagalo leova e tuuina atu le malo i se tasi e alofa ma ususita’i iā te ia.

**Fesili:** O le ā le talosaga a tagata Isaraelu?  
Aiseā na teena ai e leova le avea o Saulo ma tupu?

**1 Samuelu 8:1-22; 9:1, 2, 15-17; 10:8, 20-24; 13:1-14; 15:1-35**



## 40 Tavita ma Koliata

Na faapea atu leova iā Samuelu:  
'Ia e alu i le aiga o lese. O se tasi o ona  
atalii o le a avea ma tupu e sosoo ai o  
Israelu.' Ona alu ai lea o Samuelu i le  
aiga o lese. Ina ua ia iloa atu le atalii  
aupito i matua, na ia manatu e faapea: 'O ia lenei ua filifilia.' Ae na  
fetalai atu leova e lē o le tagata lenā. Na faapea atu leova: 'Ou te vaai i  
le loto o le tagata, ae e lē o ona foliga.'



Na aumai e lese isi ona atalii e to'aono i  
luma o Samuelu. Ae na faapea atu Samuelu:  
'E le'i filifilia e leova se tasi o i latou. E iai nisi  
ou atalii?' Na tali mai lese: 'Toe to'atasi lo'u  
atalii, o le uii o Tavita. O loo iai o ia i le fanua e  
leoleoina a'u mamoe.' Ina ua alu ane Tavita,  
ona faapea mai lea o leova iā Samuelu: 'O ia  
lenei ua ou filifilia!' Ona liligi lea e Samuelu o  
le suāuu i le ulu o Tavita, ma faauuina ai o ia e  
avea ma tupu o Israelu.

I se taimi mulimuli ane, na tau ai tagata  
Israelu ma tagata Filisitia, lea sa iai se sau'ai  
e igoa iā Koliata na tau mo tagata Filisitia. I  
aso ta'itasi e taufaifai ai Koliata i tagata  
Israelu. Na ia valaau leotele atu: 'Ia auina  
mai se tagata e ma te tau. Afai e manumalo o  
ia, o le a fai i matou ma a outou pologa. Ae  
afai ou te manumalo, o le a fai outou ma a  
matou pologa.'

Na alu Tavita i le mea o loo iai le 'autau a  
Israelu e ave mea'ai mo ona uso, o i latou o  
ni fitafita. Na ia lagona atu Koliata ma faapea  
atu: 'O le a ou alu ou te tau ma ia.' Na fai mai  
le tupu o Saulo: 'Ua na o oe o se tamaitiiti.'





Ua tali atu Tavita: ‘E fesoasoani mai leova iā te a’u.’

Na taumafai Saulo e avatu lona ofutau iā Tavita, ae na fai atu Tavita: ‘E lē mafai ona ou tau i lenei ofutau.’ Ua ave e Tavita lana maatā ma alu atu i se ālia. Na ia aumai ai ni maa lamolemole e lima ma tuu i se ato. Ona tamo’e atu lea o ia e faafetaui Koliata. Na valaau leotele mai le sau’ai: ‘Sau iā te a’u. Ou te tuuina atu lou tino i manufelele i le lagi ma manu o le fanua.’ E le’i fefe Tavita. Ua ia tali atu ma le leotele: ‘E te sau iā te a’u ma le pelu ma le tao, ae ou te alu atu iā te oe i le suafa o leova. E te lē o tau ma i matou, ae o loo e tau faasaga i le Atua. O le a iloa e tagata uma i le aso lenei, e sili atu ona malosi leova nai lo o se pelu po o se tao. O le a ia tuuina mai outou uma i o matou lima.’

Ona tuu lea e Tavita o se maa i lana maatā ma sasau i le mea e gata ai lona malosi. O le fesoasoani a leova, na lele sa’o atu ai le maa iā Koliata ma ua goto i lona muāulu. Ua pa’ū faō le sau’ai ma oti ai, ona sosola ai lea o tagata Filisitia. Pe e te maufaatuatuaina leova e pei ona faia e Tavita?

**Fesili:** O ai na filifilia e leova e avea ma tupu e sosoo ai o Isaraelu?  
Na faapefea ona manumalo Tavita iā Koliata?

**1 Samuēlu 16:1-13; 17:1-54**

**“E lē mafaia e tagata lenei mea, ae e mafaia e le Atua, auā e mafaia e le Atua mea uma lava.”  
—Mareko 10:27**




## 41 Tavita ma Saulo

Ina ua uma ona fasiotia e Tavita o Koliata, ona tofia lea o ia e le tupu o Saulo e avea ma ta'ita'i o lana 'autau. E tele taua na manumalo ai Tavita, ma avea ai o ia ma tagata e sili ona ta'uta'ua. O taimi uma lava e fo'i mai ai Tavita mai le taua, e o' atu ai fafine e sisiva ma pepese: "Ua fasia e Saulo le faitau afe, a o Tavita e faitau sefulu afe." Na amata ona lotoleaga Saulo ia Tavita ma mana'o ai e fasioti o ia.

E lelei le tā kitara a Tavita. I se tasi aso a o ia tāina le kitara mo Saulo, na velo ai e le tupu o ia i le tao. Ae na vave ona 'alo Tavita ma lele atu le tao ma tu i le puipui o le fale. Ina ua uma lenā, na toe taumafai Saulo mo le tele o taimi e fasioti Tavita. Na i'u lava ina sola ese Tavita ma lafi i le toafa.

Na ave e Saulo se 'autau e to'a 3,000 tamāloloa ma o e pu'e mai Tavita. Na ulu atu Saulo i le ana o loo lalafi ai Tavita ma ona tagata. Na femusua'i tagata o Tavita:

**"Afa'i e mafai iā te outou, ia nonofo filemu ma tagata uma. Le 'aupele e, aua tou te tauimasui, ae ia tuu atu i le to'asā."**—Roma 12:18, 19






‘O lou avanoa lenei e fasioti ai Saulo.’ Na tolotolo atu Tavita i le mea o loo iai Saulo ma sesele ese le pito o lona ofu tele. E le’i iloa e Saulo le mea na tupu. Mulimuli ane na matuā leaga faalogona o Tavita, ona e na te le’i faaalua le faaaloalo mo le tupu faauuina a leova. E na te le’i faatagaina ona tagata e osofa’ia Saulo. Ina ua alu i fafo Saulo mai i le ana, na valaau atu Tavita iā Saulo, sa mafai ona ia fasiotia o ia ina ua maua le avanoa e faia ai. Pe na suia ai le manatu o Saulo e uiga iā Tavita?

E leai. Na faaauau pea ona sa’ili e Saulo Tavita. I se tasi pō, na ō atu faalilolilo ai Tavita ma Apisai le tama a lona tuafafine i le mea o loo iai Saulo ma lana ‘autau. E oo fo’i iā Apineru o lē na puipuia Saulo, sa moe o ia. Na faapea atu Apisai: ‘O lo ta avanoa lenei. Tuu mai se’i o’u fasiotia o ia.’ Ae na tali atu Tavita: ‘E fasia lava e leova Saulo. Se’i o ta aveina lana tao ma lana faguvai, ma ta ō loa.’

Na a’ea e Tavita se mauga na lata ane lea e iloa atu ai le mea o loo iai Saulo. Na ia valaau atu: ‘Apineru, aiseā na e lē puipuia ai lou tupu? O fea le faguvai ma le tao a Saulo?’ Na iloa e Saulo le leo o Tavita ma ia tali mai: ‘Sa e maua le avanoa e fasioti ai a’u, ae e te le’i faia faapea. Ou te iloa o le a avea oe ma tupu e sosoo ai o Israelu.’ Ona toe fo’i ai lea o Saulo i lona maota. Peita’i, e lē o tagata uma i le aiga o Saulo na feita iā Tavita.

**Fesili:** Aiseā na mana’o ai Saulo e fasioti Tavita?  
Aiseā e le’i mana’o ai Tavita e fasioti Saulo?

**1 Samuelu 16:14-23; 18:5-16; 19:9-12; 23:19-29;  
24:1-15; 26:1-25**






## 42 Sa Lototele ma Faamaoni Ionatana

O Ionatana le atalii ulumatua o le tupu o Saulo, o ia o se fitafita lototele. Na faamatala e Tavita, e sili atu le saosaoa o Ionatana nai lo o se aeto ma e malosi atu nai lo o se leona. I se tasi aso, na iloa atu ai e Ionatana ni fitafita Filisitia i luga o se a'ega. Na ia fai atu i lana auuana na aveina ana meatau: 'E faato'ā ta osofa'ia i latou pe a faaali mai e leova se faailoga. Pe afai e valaau mai le 'au Filisitia e ta te ō atu e tau, ona ta iloa lea ua oo i le taimi e osofa'ia ai i latou.' Na valaau mai le 'au Filisitia: 'Ō mai tatou te tau!' Ona ō a'e ai lea o Ionatana ma lana auuana i le a'ega ma fasiotia fitafita e to'a 20.

Talu ai o Ionatana o le atalii ulumatua o Saulo, o ia la sa tatau ona sosoo iā Saulo e avea ma tupu. Ae na iloa e Ionatana na filifilia e leova Tavita e avea ma tupu e sosoo ai o Israelu. Peita'i e le'i lotoleaga ai o ia. Na matuā māfana le faauōga a Ionatana ma Tavita. Na la faia se



tautoga e puipui e le tasi le isi. Na avatu e Ionatana iā Tavita lona ofu talaloa, pelu, ‘aufana, ma le fusipa’u e faailoga ai le la faauōga.

A o sola ese Tavita mai iā Saulo, na alu atu Ionatana iā te ia ma faapea atu: ‘Ia e faamalosi ma ia e lototele. Ua filifilia oe e leova e avea ma tupu. O loo iloa fo’i e lo’u tamā lenā mea.’ Pe e te mana’o e iai sau uō lelei e pei o Ionatana?

E tele taimi na fesoasoani ai Ionatana i lana uō o Tavita, e ui lava na lamatia ai lona ola. Na ia iloa na mana’o le tupu o Saulo e fasiotia Tavita. O lea na ia fai ai i lona tamā: ‘O se agasala lou fasiotia o Tavita, e leai se mea sesē na ia faia.’ Na matuā ita Saulo iā Ionatana. I nai tausaga mulimuli ane, na feoti faatasi ai Saulo ma Ionatana i se taua.

Ina ua mavae le maliu o Ionatana, ona su’ē lea e Tavita o le atalii o Ionatana o Mefiposeta. Ina ua maua o ia e Tavita, na ia fai atu iā te ia: ‘Talu ai sa avea lou tamā ma a’u uō lelei, o le a ou tausia oe i lou olaga atoa. O le a e nofo i lo’u fale ma ta aai faatasi i la’u laulau.’ E le’i galo iā Tavita lana uō o Ionatana.

**Fesili:** Na faapefea ona faaalua e Ionatana le lototele? Na faapefea ona faaalua e Ionatana le faamaoni?

1 Samuēlu 14:1-23; 18:1-4; 19:1-6;  
20:32-42; 23:16-18; 31:1-7;  
2 Samuēlu 1:23; 9:1-13

“Ia outou alolofa o le tasi i le isi e pei ona ou alofa atu iā te outou. E leai lava se tasi e sili atu lona alofa nai lo o lenei, o le foa’iina atu lea e se tasi o lona ola mo ana uō.”  
—Ioane 15:12, 13



## 43 Le Agasala a le Tupu o Tavita

Na avea Tavita ma tupu ina ua maliu Saulo. O le taimi lenā ua 30 tausaga o Tavita. I se tasi pō ina ua mavae ni nai tausaga talu ona avea o ia ma tupu, sa ia iloa atu ai se fafine lalelei mai i le pito i luga o lona maota. Na iloa mulimuli ane e Tavita o Patesepa le igoa o le fafine, ma na faaipoipo atu i se fitafita e igoa iā Uria. Na aauina atu e Tavita o avefe‘au ina ia aami iā Patesepa. Na la faia feusua‘iga ma i‘u ai ina tō Patesepa. Na taumafai Tavita e nanā le mea na tupu. Na ia faatonuina le ta‘ita‘i o lana ‘autau e tuu Uria i le pito i luma o le ‘autau, ona ō ese lea o le ‘autau mai iā te ia. Ina ua fasiotia Uria i le taua, ona faaipoipo ai lea o Tavita iā Patesepa.

Peita‘i na silafia e leova mea leaga uma na tutupu. O le ā o le a ia faia? Na auina atu e leova le perofeta o Natano iā Tavita. Na faapea atu Natano: ‘Sa tele mamoe a se tasi tamāloa mau‘oa, ae e na o le tasi le tama‘i mamoe sa iai a se tamāloa mativa na sili ona ia alofa i ai. Na ave e le tamāloa mau‘oa le mamoe e tasi a le tamāloa mativa.’ Na ita Tavita ma fai atu: ‘E tatau ona oti lenā tamāloa mau‘oa.’ Ona faapea atu lea o Natano iā Tavita: ‘O oe

le tamāloa mau‘oa.’ Na matuā faanoanoa Tavita ma ta‘utino atu iā Natano e faapea: ‘Ua ou agasala iā leova.’ O lenei agasala na oo ai le tele o faafitauli iā Tavita ma lona aiga. Na faasalaina e leova Tavita. Peita‘i, na ia faatagaina Tavita e ola pea talu ai sa faamaoni ma lotomaulalo o ia.

Na mana‘o Tavita e fausia se malumalu mo leova, ae na filifilia e leova Solomona le atalii o Tavita e fausia le malumalu. Na amata ona

tapena e Tavita mea mo le fausiaina o le malumalu e fesoasoani ai iā Solomona. Na ia faapea ane: ‘E tatau ona sili le matagofie o le malumalu o leova. E la’itiiti Solomona, ae o le a ou fesoasoani iā te ia e ala i le saunia o mea e mana’omia.’ Na foa’i atu e Tavita le tele o ana tupe mo le fausiaina o le malumalu. Na ia maua ni tagata popoto e faia galuega. Na ia aoina mai auro ma siliva, ma na maua mai fo’i laupapa arasi mai i Turo ma Saitonu. Ina ua lata i le taimi e maliu ai Tavita, na ia tuuina atu ai iā Solomona ata mo le fausiaina o le malumalu. Na ia faapea atu: ‘Na faatonuina a’u e leova e tusia nei mea mo oe. O le a fesoasoani leova iā te oe. Aua e te fefe. Ia faamalosi ma fai le galuega.’



**Fesili:** O le ā le agasala a Tavita?

O ā mea na faia e Tavita e fesoasoani ai i lona atalii o Solomona?

2 Samuēlu 5:3, 4, 10; 7:1-16; 8:1-14; 11:1-12:14;

1 Nofoaiga a Tupu 22:1-19; 28:11-21; Salamo 51:1-19

**“O lē ua ufiufi i ana solitulafono e lē taulau manuia o ia, a o lē e ta’utino atu ma lafoa’i ia mea, o le a faaalua i ai le alofa mutimutivale.”  
—Faataoto 28:13**





# 8

Na faamanuiaina e leova Solomona i le tele o le atamai, ma tuuina atu iā te ia le faaeaga o le fausiaina o le malumalu. Peita’i na faasolosolo lava ona ia tuua leova. Pe afai o oe o se matua, ia faamatala i lau tama pe na faapefea i tagata na tapua’i i atua sesē ona liliueseina Solomona mai i le Atua. Na vaeluaina le malo, ma na ta’ita’ia e tupu leaga le nuu ina ia fulitua i le tapua’iga moni ma tapua’i atu i tupua. A o faagasolo lenā vaitaimi, e to’atele perofeta faamaoni a leova na sauāina ma fasiotia. Na taa’ina e le masiofo o lesepela le malo i le itu i mātū ina ia atili ona fulitua i le tapua’iga moni. O se vaitaimi leaga lea i le talafaasolopito o Isaraelu. Ae sa to’atele lava isi tagata Isaraelu sa faamaoni pea iā leova, e aofia ai le tupu o Iosefatu ma le perofeta o Elia.



## LESONA AUTŪ

- la auauna iā leova ma le faamaoni, e tusa pe e lē faia faapea e ou aiga ma au uō
- Pe afai e te tuua leova, e leaga i'uga o le a oo iai; ae afai e te auauna pea iā te ia, o le a ia faamanuia iā te oe
- Pe a e lagona i nisi taimi ua leai se isi mea e mafai ona e faia, e faaali mai e leova lona mana i auala e te le'i mafaufauina

## 44 Se Malumalu mo leova

Ina ua avea Solomona ma tupu o Isaraelu, na fesili mai leova iā te ia: ‘O le ā se mea e te mana’o ou te avatua mo oe?’ Na tali atu Solomona: ‘Ua na o a’u o se tamaitiiti, ma ou te lē iloa le mea e tatau ona fai. Faamolemole foa’i mai le atamai ina ia ou tausia ai lou nuu.’


Na faapea mai leova: ‘Talu ai ua e talosaga mai mo le atamai, o le a ou faia oe ma tagata e sili ona atamai i le lalolagi. O le a ou foa’i atu fo’i iā te oe le tele o ‘oa. Afai e te usita’i mai iā te a’u, o le a umi ona e ola.’

Na amata ona fausia e Solomona le malumalu. Na ia faaaogā auro, siliva, laau ma maa e sili ona lelei. E faitau afe tane ma fafine tomai na galulue i le fausiaina o le malumalu. Ina ua mavae tausaga e fitu, ona tuuina atu loa lea o le malumalu iā leova. Sa iai se fata faitaulaga, ma sa iai taulaga i luga o lenā fata. Na tootuli Solomona i luma o le fata faitaulaga ma tatalo: ‘leova e, e lē lava le telē ma le matagofie o lenei malumalu mo oe, ae faamolemole ia talia mai la matou tapua’iga ma faafofoga mai i a matou tatalo.’ O le ā le silafaga a leova i le malumalu faapea le tatalo a Solomona? O le taimi lava na uma ai le tatalo a Solomona, ona alu ifo lea o le afi mai i le lagi ma faamūina ai taulaga sa i luga o le fata faitaulaga. O lenei mea na faaalua ai le fiafia o le finagalo o leova i le malumalu. Ina ua vaai tagata Isaraelu i le mea na tupu, ona latou fiafia ai lea.

Na lauiloa le tupu o Solomona i le nuu atoa o Isaraelu i lona atamai, e oo lava i isi nuu e mamao. Na ō mai tagata iā Solomona mo le fesoasoani i o latou faafitauli. E oo lava i le tupu tama’ita’i o Seepa, na alu atu e tofotofo Solomona i fesili faigatā. Ae ina ua faalogo o ia i tali a Solomona, ona ia faapea atu lea: ‘Ou te le’i talitonu i tala a tagata na fai mai e uiga iā te oe, ae o lea ua ou iloa nei e sili atu lou atamai. Ua faamanuiaina oe e leova lou Atua.’ Na sologa lelei le olaga i le nuu o Isaraelu, ma na fiafia tagata. Peita’i, e le’i tumau pea ona sologa lelei mea i le nuu.

**Fesili:** Aiseā na foa’i mai ai e leova iā Solomona le atamai faapitoa?  
Na faapefea ona faailoa mai e leova lona fiafia i le malumalu?

1 Tupu 2:12; 3:4-28; 4:29-5:18; 6:37, 38; 7:15-8:66; 10:1-13; 2 Nofoaiga a Tupu 7:1; 9:22







**“O loo iinei se tasi e sili  
atu iā Solomona.”  
—Mataio 12:42**

## 45 Se Malo ua Vaeluaina

A o tapua'i pea Solomona iā leova, sa iai pea le filemu i le nuu o Isaraelu. Peita'i na faaiipo atu o ia i le tele o fafine mai i isi nuu, ma na tapua'i nei fafine i tupua. Na faasolosolo lava ona suia Solomona, ma i'u ai ina tapua'i atu fo'i o ia i tupua. Na matuā lē fiafia le finagalo o leova i lenei mea. Na ia faapea atu iā Solomona: 'O le a aveesea Isaraelu mai i lou aiga ma vaeluaina i ni vaega se lua. O le a ou tuuina atu le vaega telē i se tasi o au auauna, ae o le vaega itiiti o le a pulea e lou aiga.'

Na faamanino mai e leova lana faai'uga i se isi auala. A o faimalaga i le ala se tasi o auauna a Solomona o lerepoamo, na ia feiloa'i ai i se perofeta e igoa iā Akia. Na saeia e Akia lona ofu i vaega e 12 ma faapea atu iā lerepoamo: 'O le a aveesea e leova le malo o Isaraelu mai i le aiga o Solomona ma vaeluaina i ni vaega se lua. Ia ave vaega nei e 10 auā o le a avea oe ma tupu i ituaiga e sefulu.' Na faalogo Solomona i lenei mea ma mana'o ai e fasioti lerepoamo. O lea na sola ese ai lerepoamo ma alu atu i Aikupito. A o faagasolo taimi, na maliu Solomona ae avea lona atalii o Reopoamo ma tupu. O lea, na mafaufau ai lerepoamo ua saogalemu e toe fo'i i Isaraelu.



Na faapea atu toeaina o Isaraelu iā Reopoamo: ‘O le a faamaoni tagata iā te oe, pe afai e lelei le auala e te feutaga’i ai ma i latou.’ Ae na fai atu uō talavou a Reopoamo iā te ia: ‘E ao ona e sauāina tagata. Ia e faapologaina i latou.’ Na mulimuli Reopoamo i fautuaga a ana uō. Na sauā o ia i tagata, ma o lea na latou fouvale ai iā te ia. Na latou filifilia lea o lerepoamo e avea ma tupu o ituaiga e sefulu, lea na ta’ua o le malo o Isaraelu. Na ta’ua isi ituaiga e lua o le malo o luta, ma na latou faamaoni pea iā Reopoamo. O lea, ua vaeluaina nei ituaiga e 12 o Isaraelu.

E le’i mana’o lerepoamo e o atu ona tagata i Ierusalemā e tapua’i ai, auā o Ierusalemā o loo i totonu o le malo o Reopoamo. Pe e te iloa le māfuaaga e le’i mana’o ai lerepoamo e tupu lenā mea? Na popole o ia ina ne’i fouvale ona tagata iā te ia, ae latou lagolagoina Reopoamo. O lea na ia faia ai ni tama’i povi po’a auro se lua ma faapea atu i ona tagata: ‘E mamac tele Ierusalemā. E mafai lava ona outou tapua’i iinei.’ Na amata ona tapua’i atu tagata i nei tama’i povi po’a auro, ma galo ai iā i latou leova.

**Fesili:** Aiseā na vaeluaina ai Isaraelu? O ā mea leaga na faia e le tupu o Reopoamo ma le tupu o lerepoamo?

**1 Tupu 11:1-13, 26-43; 12:1-33**

“Ia aua ne’i amo faalēgatasi ma ē e lē talitonu. Auā e faapefea ona fesoota’i le amiotonu ma le amioleaga? . . . E faapefea ona tofusia le tagata faamaoni ma lē ua lē talitonu?”  
—2 Korinito 6:14, 15



## 46 Se Tofotofoga i le Mauga o Karamelu

Na tele tupu leaga sa iai i ituaiga e sefulu o le malo o Isaraelu, ma o Aapo o se tasi o tupu e sili ona leaga. Na faaipoipo o ia i se fafine leaga e igoa iā lesepela, o lē na tapua'ī iā Paala. Na faatumulia e Aapo ma lesepela le nuu i le tapua'īga iā Paala, ma na la fasiotia fo'ī perofeta a leova. O le ā na faia e leova? Na ia auina atu le perofeta o Elia e ta'ū atu se fe'au iā Aapo.

Na faapea atu Elia i le tupu o Aapo, o le a leai se timu i Isaraelu ona o lona amioleaga. E silia i le tolu tausaga, e le'ī ola ni mea totō, ma na fia aai tagata. Mulimuli ane, na toe auina atu e leova Elia iā Aapo. Na faapea mai le tupu: 'O oe o sē faatupuina faafitauli. O oe ua māfua ai nei mea uma.' Na tali atu Elia: 'E lē o a'ū na māfua ai le leai o se timu. O oe na māfua ai, auā ua outou tapua'ī iā Paala. O le a tatou faia la se tofotofoga e iloa ai po o ai le Atua moni. Ia faapotopoto le nuu ma perofeta a Paala i luga o le mauga o Karamelu.'

Na faapotopoto le nuu i luga o le mauga. Na faapea atu Elia: 'Ia outou filifili. Pe afai o leova le Atua moni, ia outou mulimuli iā te ia. Ae afai o Paala o le atua moni, ona outou mulimuli lea iā te ia. O la'ū lu'ī lenā. E tatau i perofeta e 450 a Paala ona saunia se taulaga ma valaau atu i lo latou atua, ma o le a ou saunia fo'ī se taulaga ma valaau atu iā leova. O lē e tali mai i le afi o le Atua moni lea.' Na malilie tagata e faia faapea.

Na saunia e perofeta a Paala se taulaga. Na alu le aso atoa o latou valaau atu i lo latou atua: 'Paala e, ia e faafofoga mai iā i matou.' Ina ua lē tali mai Paala, ona taufaifai lea o Elia iā Paala. Na faapea atu Elia: 'Ia outou valaau leotetele atu iā te ia. Atonu o loo moe o ia, ma e ao ona fafagu iā te ia.' Ua oo i le afiafi, ae o loo valaau atu pea perofeta a Paala iā te ia. Peita'ī, e le'ī tali mai lava Paala.

Na tuu e Elia lana taulaga i luga o le fata faitaulaga ma sasaa i ai vai. Ona ia tatalo lea: 'leova e, faamolemole ia e faailoa mai i tagata o oe o le Atua moni.' O le taimi lava lenā na aumai ai e leova le afi mai i le lagi ma ua mū ai le taulaga. Na valaau leotetele tagata: 'O leova le Atua


moni!’ Na faapea atu Elia: ‘Ia pupu’e i perofeta a Paala!’ Na fasiotia i le aso lava lenā perofeta e 450 a Paala.

Ina ua iloa atu se ao itiiti i luga a’e o le sami, ona faapea atu lea o Elia iā Aapo: ‘Ua gogolo mai timuga tetele. Inā sauni ia lau kariota ma toe fo’i i lou aiga.’ Na oo ina pogisa le lagi i ao, ua agi mai le matagi, ma ua maligi ifo timuga tetele, ona uma ai lea o le lāmala. Na alu saosaoa le kariota a Aapo. Ae o le fesoasoani a leova na mafai ai ona tamo’e saosaoa atu Elia nai lo o le kariota. Ae pe na uma ai faafitauli o Elia? Se’i o tatou vaai i le tala o loo sosoo mai.

**Fesili:** O le ā le tofotofoga sa faia i luga o le mauga o Karamelu? Na faapefea ona tali mai leova i tatalo a Elia?

**1 Tupu 16:29-33; 17:1; 18:1, 2, 17-46; Iakopo 5:16-18**

“Ina ia iloa ai e tagata o oe e ou le suafa o leova, e na o oe lava o Lē e Silisili Ese i le lalolagi uma.”  
—Salamo 83:18



## 47 Na Faamalosia e leova Elia


Na faalogo lesepela i le mea na tupu i perofeta a Paala, ma na matuā ita ai o ia. Na ia avatu se fe‘au iā Elia e faapea: ‘O le aso a taeao o le a e oti ai, e pei lava o le mea na tupu i perofeta a Paala.’ Na matuā fefe Elia ma sola ai i le toafa. Na ia tatalo: ‘leova, ua lē mafai ona ou onosaia lenei mea. Ia aveese lo‘u ola.’ Na lagona e Elia le vaivai tele, o lea na ia moe ai i lalo o se laau.

Na fafagu o ia e se agelu ma fai atu iā te ia i se leo mālū: ‘Nofo ia i luga e ‘ai.’ Na iloa atu e Elia se falaoa lapotopoto i luga o maa aasa, ma se faguvai. Ona ‘ai lea o ia ma inu, ona toe taoto ai lea. Na toe fafagu fo‘i o ia e le agelu ma faapea atu: ‘Nofo ia i luga e ‘ai. E te mana‘omia le malosi ina ia faaaauau ai lau faigāmalaga.’ Ona nofo lea o ia i luga, ua ‘ai ma inu. Ona faaaauau lea o lana malaga mo ao e 40 ma pō e 40 se‘ia taunuu i le mauga o Horepa. O i inā na alu atu ai Elia i se ana ina ia moe ai. Peita‘i na fetalai mai leova iā te ia: ‘Elia, o le ā lau mea lenā e fai i inā?’ Na tali atu Elia: ‘Ua lē tausia e tagata Israelu la latou folafolaga na fai atu iā te oe. Na latou faaleagaina ou fata faitaulaga ma fasiotia au perofeta. Ua latou taumafai fo‘i e fasioti a‘u.’

Na faapea mai leova iā te ia: ‘Ia e alu i fafo ma tū i luga o le mauga.’ Ona agi mai lea o se matagi malosi, sosoo ai ma se mafui‘e ma se afi. Mulimuli ane, ona faalogoina lea e Elia o se leo itiiti e to‘afilemu. Na ia ufiufi ona mata i lona ofu tele ma tū i fafo o le ana. Ona fesili mai lea o leova, pe aiseā na ia sola ese ai. Na tali atu Elia: ‘E na o a‘u lava ua totoe.’ Ae na faapea mai leova: ‘O loo iai fo‘i isi tagata e 7,000 i Israelu o loo tapua‘i mai pea iā te a‘u. Ia e alu ma tofia Elisaia e avea ma perofeta e sui iā te oe.’ O le taimi lava lenā na alu ai Elia ma faia e pei ona faatonuina o ia e leova. Pe e te manatu o le a fesoasoani fo‘i leova iā te oe, pe afai e te faia mea e finagalo i ai o ia? E mautinoa o le a ia fesoasoani iā te oe. Se‘i o tatou talanoaina le mea na tupu i le vaitaimi na leai ai se timu.

**Fesili:** Aiseā na sola ese ai Elia? O le ā na faatonuina e leova Elia e fai?

**1 Tupu 19:1-18; Roma 11:2-4**

A man with a long white beard, wearing a white robe and a brown fur cloak, stands in a rocky, hazy landscape. He is pointing towards the left with his right hand and has his left hand raised to his forehead. The background is a vast, rocky canyon with a bright light source in the upper right, creating a hazy, atmospheric effect. The ground is covered in large, reddish-brown rocks and some sparse, dry vegetation.

“Aua ne’i popole i se mea,  
ae ia faailoa atu o outou  
mana’oga i mea uma lava  
i le Atua, i le tatalo ma  
le faatoga, atoa ma le  
faafetai.”—Filipi 4:6



## 48 Toe Ola Mai le Tama a se Fafine ua Oti Lana Tane

A o faagasolo le vaitaimi na leai ai se timu, na faapea atu leova iā Elia: 'Ia e alu i Sarefata. O i inā o loo iai se fafine ua oti lana tane, ma o le a ia saunia se mea'ai mo oe.' I faitoto'a o le aai, na iloa atu ai e Elia se fafine mativa ua oti lana tane o loo fai fafie. Na talosaga atu Elia i lenei fafine mo se ipu vai. A o alu le fafine e aumai se ipu vai, na valaau atu Elia: 'Faamolemole aumai ma sina fasi falaoa mo a'u.' Ae na tali mai le fafine: 'E lē o iai sa'u falaoa e avatu ma oe. Ae e na o sina falaoamata lava ma sina suāuu o loo iai, e fai ai sina mea'ai mo i ma'ua ma la'u tama.' Na faapea atu Elia iā te ia: 'Na folafola mai e leova, pe afai e te saunia se falaoa mo a'u, e lē uma le falaoamata ma le suāuu se'ia oo i le aso e toe timu ai.'

Ona alu lea o le fafine ma saunia le falaoa mo le perofeta a leova. E pei lava ona folafola mai e leova, na maua pea e le fafine ma lana tama mea'ai e aai ai i le taimi na leai ai se timu. Na iai pea le falaoamata ma le suāuu i fagu.





“Ia vaavaai lelei i oreva, auā latou te lē lūlū ni fatu pe selesele, pe faaputu i se fale saito, ae e fafagaina i latou e le Atua. Pe e lē sili ea ona tāua outou i lo manufeleei?”—Luka 12:24

Peita’i, e iai se mea faanoanoa na tupu. Na matuā ma’i tigāina le tama a le fafine ma i’u ai lava ina maliu o ia.


Ona talosaga atu lea o le fafine iā

Elia mo se fesoasoani. Na ave e Elia le tamaitiiti i le potu pito i luga o le fale, ua faataoto o ia i luga o le moega ma tatalo: ‘leova e, faamolemole ia e toe faafo’isia mai le ola o lenei tamaitiiti.’ Pe e te iloa le māfuaaga e ofoofogia tele ai le faia e leova o lenei mea? Talu ai pe a fua i mea ua tatou a’oa’oina, e leai se tasi muamua na toetū mai i le oti. Ae o lenei fo’i fafine ma lana tama e lē o ni tagata Isaraelu.

Na toe faafo’isia le ola o lenei tamaitiiti ma ua amata ona māvava o ia. Na faapea atu Elia i le fafine: ‘Faauta! Ua ola lau tama.’ Na matuā fiafia o ia ma faapea atu iā Elia: ‘E moni lava o oe o le tagata o le Atua. Ou te iloa lenei mea, talu ai ua e faailoa mai e na o mea lava ua faatonuina ai oe e leova ma e taunuu lava.’

**Fesili:** Na faapefea ona faaalua e le fafine Sarefata lona maufaatuatuaina o leova? E faapefea ona tatou iloa o Elia o le perofeta moni a le Atua?

**1 Tupu 17:8-24;** Luka 4:25, 26



## 49 Ua Faasalaina se Masiofo Leaga

Sa iloa atu e le tupu o Aapo mai i le faamalama o lona maota i Isereelu, le togāvine a se tamāloa e igoa iā Napota. Na mana’o Aapo i le togāvine, ma na ia taumafai e faatau mai iā Napota. Ae na musu Napota e faatau atu iā te ia, talu ai e faasā i le Tulafono a leova le faatau atu o laueleele e tuufaasolo mai e aiga. Pe na faaloalo Aapo iā Napota ona o lona faia o le mea sa’o? E leai. Na matuā ita Aapo. O lona ita tele na lē alu ese ai mai i lona potu moe, ma na musu fo’i e ‘ai.

Na fai atu le masiofo o lesepela le avā leaga a Aapo iā te ia: ‘O oe o le tupu o Isaraelu. E mafai ona e mauaina so o se mea lava e te mana’o ai. O le a ou avatu iā te oe lenā togāvine.’ Na tusi lea e lesepela o ni tusi i toeaina o le aai, ma faatonu i latou ina ia molia Napota i le taufaifai i le Atua, ma ia fetogi iā te ia i maa ina ia oti ai. Na faia e toeaina le faatonuga a lesepela. Ona fai atu lea o lesepela iā Aapo: ‘Ua oti Napota. Ia ave ma oe le togāvine.’

E lē na o Napota le tagata lē sala na fasiotia e lesepela. Na ia fasiotia fo’i le to’atele o isi tagata na alolofa iā leova. Na ia tapua’i i tupua ma faia isi mea leaga. Na silafia e leova mea leaga uma na faia e lesepela. O le ā o le a faia e leova iā lesepela?


Ina ua mavae le maliu o Aapo, ona avea ai lea o lona atalii o loramo ma tupu. Na auina atu e leova se tamāloa e igoa iā leu e faasalaina lesepela ma lona aiga.

Na alu atu leu i lana kariota i Isereelu, le nuu lea sa nofo ai lesepela. Na alu ane fo’i loramo i le kariota e faafetaui leu ma fesili atu: ‘Po o filemu mea uma?’ Na tali mai leu: ‘E lē taitai maua se filemu auā o loo faia pea e lou tinā mea leaga.’ Na taumafai loramo e liliu lana kariota ma alu ese. Ae na tago atu leu i lana aufana ua fana ai loramo, ma oti ai o ia.



“Ua mau le tofi e ala  
i le matape‘ape‘a i le  
amataga, a o lona  
lumana‘i o le a lē  
faamanuiaina.”

—Faataoto 20:21



Ona alu lea o leu i le maota o lesepela. Ina ua faalogo lesepela o loo alu atu leu, ona ia vali lea o ona mata, teu faamanaia lona ulu, ma vaavaai ifo mai le faamalama o lona fale. Ina ua taunuu atu leu, na faafeiloa‘i o ia e lesepela i se auala lē faaaloalo. Na valaau atu leu i auauna a lesepela o loo tutū i ona autafa: “Ia lafo ifo o ia!” Na latou faia faapea, ma na pa‘ū ifo lesepela mai i le faamalama ma oti ai o ia.

Ina ua uma le mea na tupu, ona fasiotia lea e leu o atalii e to‘a 70 o Aapo ma faamamā le nuu mai i tapua‘iga iā Paala. Po ua e talitonu la e silafia e leova mea uma, ma e na te faasalaina i le taimi talafeagai i latou o ē faia mea leaga?

**Fesili:** O le ā na faia e lesepela ina ia maua ai le togāvine a Napota?  
Aiseā na faasalaina ai e leova lesepela?

1 Tupu 21:1-29; 2 Tupu 9:1-10:30

## 50 Puipuia e leova losefatu

Na faaleagaina e losefatu le tupu o luta fata faitaulaga na faia ai taulaga iā Paala ma tupua sa iai i le nuu. Na mana’o o ia e iloa e tagata tulafono a leova. O lea na ia auina atu ai perenise ma le ‘au sa Levī i vaipanoa uma o luta, ina ia latou a’oa’oina tagata i tulafono a leova.

Na fefefe nuu na lata ane e osofa’i luta, talu ai na latou iloa sa fesoasoani leova i ona tagata. Na latou avatu fo’i meaalofa i le tupu o losefatu. Peita’i, na ō ane tagata Moapi, tagata Amoni, ma i latou mai i le vaipanoa o Seira e tau ma le nuu o luta. Na iloa e losefatu sa ia mana’omia le fesoasoani a leova. O lea na ia faapotopoto ai tamāloloa, fafine, ma tamaiti uma i Ierusalem. Ona ia tatalo lea i o latou luma: ‘leova e, e lē mafai ona matou manumalo pe a aunoa ma lau fesoasoani. Faamolemole faailoa mai le mea e tatau ona matou faia.’

Na tali mai leova i la latou tatalo: ‘Aua tou te fefefe. O le a ou fesoasoani iā te outou. Inā tutū ia ma tutumau, ma vāai i le auala o le a ou faaolaina ai outou.’ Na faapefea ona faaolaina e leova i latou?

I le taeao na sosoo ai, na filifilia e losefatu ni tagata pepese ma faatonuina i latou e muamua atu i luma o le ‘autau. Na latou savavali mai i Ierusalem aga’i i le nofoaga e fai ai le taua, e ta’ua o Tikoā.

Na tau leova mo ona tagata, a o pepese leotetele ma le fiafia tagata pepese e viia o ia. Na ia faafenuminumia’i mafaufau o tagata Amoni ma tagata Moapi. O lea, na amata ai ona toe fetaua’i lava i latou ma feoti uma ai. Peita’i, na puipuia e leova tagata o luta, fitafita, ma ositaulaga. Na faalogo tagata uma i nuu na lata ane i mea sa faia e leova, ma latou iloa ai sa faaauau ona puipuia e leova ona tagata. E faapefea ona puipuia e leova ona tagata? E tele auala e na te puipuia ai i latou, ma e na te lē mana’omia le fesoasoani a tagata e faia ai faapea.

**Fesili:** O le ā le ituaiga o tupu sa iai losefatu?  
Na faapefea ona puipuia e leova le nuu o luta?

**2 Nofoaiga a Tupu 17:1-19; 20:1-30**

**“E tou te lē tau i lenei  
taua. Inā tutū ia outou  
ma tutumau, ma vāi i  
le faaolataga a leova iā  
te outou.”—2 Nofoaiga  
a Tupu 20:17**





# 9

O le a tatou a'oa'oina i lenei vaega e faatatau i tamaiti, perofeta, ma tupu o ē na faaalua le faatuatua malosi iā leova. Na faaalua e se teineitiiti Isaraelu i Suria le faatuatua o le a faamālōlō e le perofeta a leova Naamanu. Sa mautinoa atoatoa e le perofeta o Elisaia o le a puipuia o ia e leova mai i se 'autau a se fili. Na lamatia le ola o le Ositaulaga Sili o loiaata ina ia puipuia ai loasa i le taimi a o la'itiiti, mai iā Atalia le tinā leaga o lona tamā. Na talitonu le tupu o Esekia o le a puipuia e leova Ierusalemā, ma e le'i lolo atu o ia i le tafaamata'u ane a Asuria. Na tafieseā e le tupu o losia le ifo i tupua mai i le nuu, toe faaleleia le malumalu, ma toe faafo'isia le tapua'iga moni i le nuu.



## LESONA AUTŪ

- E tusa pe e te la'itiiti, e mafai lava ona e molimau atu e faatatau iā leova
- Pe a tatou faia le mea sa'ó, ua folafola mai e leova o le a ia fesoasoani mai iā i tatou
- E pei o Iona, ia iloa ona ususita'i i faatonuga a leova ma aua le faitio pe a lē taunuu mea na e mafaufau i ai

## 51 Se Toa Malosi ma se Teineitiiti

Sa iai se teineitiiti Isaraelu i le nuu o Suria. E mamao lenei nuu mai i le mea sa iai lona aiga. Sa aveese o ia mai i lona aiga e le 'autau a Suria, ma o lea ua avea nei o ia ma pologa a le avā a se ta'ita'i'au e igoa iā Naamanu. Na tapua'i lenei teineitiiti iā leova e ui lava e le'i faia faapea e isi tagata.

Sa maua Naamanu i se ma'i leaga lea na aafia ai lona tino, ma sa ia lagona le tigā i taimi uma. Na matuā naunau lava le teineitiiti e fesoasoani iā te ia. Na ia fai atu i le avā a Naamanu: 'Ou te iloa se tasi e mafai ona fesoasoani i lau tane. O loo iai i Isaraelu se perofeta e igoa iā Elisaia. E mafai ona ia faamālōlōina lau tane.'

Na ta'u atu e le avā a Naamanu iā te ia le tala a le teineitiiti. Na lotomalie Naamanu e faia so o se mea. O lea na ia alu ai i Isaraelu i le fale o Elisaia. Na faatalitalia e Naamanu o le a faaaloaloga o ia e Elisaia. Ae nai lo o le alu atu o Elisaia e talanoa iā Naamanu, na ia auina atu lana auaua e faafeiloa'i Naamanu ma ta'u atu le fe'au lenei:






‘Inā alu ia, ma e tā‘ele faafitu i le vaiatafe o loritana ina ia toe lelei ai lou tino.’

Na matuā ita Naamanu. Na ia faapea ane: ‘Na ou mafaufau o le a faamālōlō a‘u e lenei perofeta, e ala i le valaau atu i le Atua ma faamālōlōina a‘u i se auala ofoofogia. Peita‘i, ua ia faatonuina a‘u e alu i lea vaiatafe i Isaraelu. E sili atu ona mananaia vaiatafe o Suria. Pe e lē mafai ona ou tā‘ele ai i inā?’ Na ita Naamanu, ma alu ese mai i le fale o Elisaia.

Na fesoasoani auauna a Naamanu iā te ia ina ia toe mafaufau lelei. Na latou fai atu iā te ia: ‘Pe e te lē faia so o se mea e mana‘omia ona fai, ina ia faamālōlōina ai oe? E faigofie le faatonuga a le perofeta. Aiseā e te lē faia ai loa?’ Na faalogo Naamanu iā i latou. Na alu o ia i le vaiatafe o loritana ma tofu ai faafitu. Ina ua uma lenā, ona alu a‘e lea o ia ua mamā lona tino. Na matuā lotofaafetai o ia, ma toe fo‘i iā Elisaia e faafetai i ai. Na faapea atu Naamanu: ‘O lea ua ou iloa nei o leova o le Atua moni.’ O le ā sou manatu, o ā ni faalogona o le teineitiiti Isaraelu ina ua toe fo‘i atu Naamanu ua faamālōlōina o ia?

**Fesili:** O le ā sou manatu, pe sa faigofie i le teineitiiti Isaraelu ona talanoa atu i le avā a Naamanu? O le ā na fesoasoani i le teineitiiti e maua ai le lototele?

**2 Tupu 5:1-19;** Luka 4:27



“Ua e saunia le viiga e ala mai i gutu o tamaiti ma pepe.”  
—Mataio 21:16



## 52 O Kariota Afi a leova

Na faaauau ona osofa'ia e Peniata le tupu o Suria le nuu o Isaraelu. Ae o taimi uma na osofa'ia ai i latou, na lapata'ia ai e le perofeta o Elisaia le tupu o Isaraelu ma mafai ai ona ia sola ese. O lea na filifili ai loa Peniata e pu'e Elisaia. Na ia maua tala o loo iai Elisaia i le aai o Totana. O lea na ia auina atu ai le 'autau a Suria e pu'e mai o ia.

Na taunuu atu le 'autau a Suria i Totana ua pogisa. I le taeao na sosoo ai, na alu le auauna a Elisaia i fafo ma iloa ai ua si'osi'omia le aai e se 'autau e to'atele. Na matuā fefe o ia ma valaau: 'Elisaia, o le ā se mea e ta te faia?' Na tali mai Elisaia: 'E sili atu ona to'atele o ē ua iā i ta'ua nai lo o ē ua iā i latou.' O le taimi lava lea na faapupula ai e leova mata o le auauna a Elisaia, ma ia iloa ai ua tumu vaega maugā o loo si'omia ai le aai, i solofanua ma kariota afi o le taua.

Ina ua taumafai fitafita Suria e pu'e Elisaia, na ia tatalo: 'leova, faamolemole ia e faatauasoia i latou.' Na faafuase'i lava ona lē iloa e fitafita le mea o loo latou iai, e ui o loo mafai ona latou vāai. Na fai atu Elisaia i fitafita: 'E sesē le aai o loo outou iai. Ia mulimuli mai iā te a'u. O




**“O le mea leni ua tatou mautinoa ai i le Atua, po o ā lava mea tatou te talosaga atu ai e tusa ma lona finagalo, e faafofoga mai lava o ia iā i tatou.”  
—1 Ioane 5:14**

le a ou ta’ita’ia outou i le tagata o loo outou sa’ilia.’ Ona latou mulimuli lea iā Elisaia se’ia oo i Samaria, lea na nofo ai le tupu o Israelu.

E toe iloa ane e fitafita Suria le mea ua latou iai, ae ua leai se isi gaoioiga e mafai ona latou toe faia. Na fesili atu le tupu o Israelu iā Elisaia: ‘Po ou te fasiotia loa i latou?’ Pe na faaogā e Elisaia lea avanoa e toe tui atu ai mea leaga na taumafai nei tagata e fai iā te ia? E leai. Na faapea mai Elisaia: ‘Aua e te fasiotia i latou. Ia avatu ni mea’ai ma i latou ma aauina atu i latou e o.’ Ona saunia lea e le tupu o se faiga’ai tele mo i latou, ma aauina atu i latou e o.

**Fesili:** Na faapefea ona pui puia e leova Elisaia ma lana auuana?  
Pe e te manatu e mafai fo’i ona pui puia oe e leova?

**2 Tupu 6:8-24**



## 53 Le Lototele o Ioiata

Sa iai se tama teine a lesepela e igoa iā Atalia, ma e amioleaga e pei o lona tinā. Na faaipopo Atalia i le tupu o luta. Ina ua maliu lana tane, ona avea lea o lana tama tama ma tupu. Ae ina ua maliu lana tama, na fai e Atalia o ia lava ma pule o luta. Ona ia taumafai lea e fasiotia fanau uma a le tupu, po o so o se tasi lava e mafai ona avea ma tupu, e oo lava i fanau tama a lana fanau. Na fefefe uma tagata iā te ia.


Na iloa e le ositaulaga sili o Ioiata ma lana avā o losape, e matuā leaga mea o loo faia e Atalia. Na lamatia o la ola ina ia faalafi ai le pepe o loasa, o ia o se tasi o tama tama a le fanau a Atalia. Na la tausia a'e o ia i le malumalu.

Ina ua fitu tausaga o loasa, ona faapotopoto lea e Ioiata o alii ma le 'au sa Levi uma ma faapea atu iā i latou: 'Ia leoleo faitoto'a o le malumalu ma aua ne'i faatagaina se tasi e sau i totonu.' Ona filifilia lea e Ioiata o loasa e avea ma tupu o luta, ma tuu le palealii i lona ulu. Na alalaga tagata o luta: 'Ia soifua le tupu!'

Na lagona atu e le masiofo o Atalia le pisapisaō o le nuu ma faanatinati atu loa i le malumalu. Ina ua ia iloa atu le tupu fou, ona ia alaga atu lea: "O le fouvale! O le fouvale!" Ae ua ave o ia e alii ma fasiotia o ia. Ae faapefea la ana taa'iga leaga ua iai i le nuu?

Na fesoasoani Ioiata i le nuu e osia se feagaiga ma leova, lea na latou folafola atu ai e na o la lava o le a latou tapua'i i ai. Na faatonuina e Ioiata i latou e talepe i lalo le malumalu o Paala ma nutililii tupua. Na ia tofia le 'auositaulaga ma le 'au sa Levi e galulue i le malumalu, ina ia





**“Aua tou te matata’u i ē e fasiotia le tino, ae e lē mafai ona faaumatia le ola. Ae ia matata’u i lē e mafai ona faaumatia le ola atoa ma le tino i Kena.”—Mataio 10:28**

mafai ai ona toe tapua’i tagata i inā. Na ia tofia ē e leoleoina faitoto’a ina ia leoleoina le malumalu, ina ia lē mafai ona ulu atu i ai se tasi e lē mamā. Ona ave lea o loasa e loiata ma alii i le maota o le tupu, ma faanofo o ia i le nofoālii. Na olioli le nuu o luta. O lea ua mafai ona latou auauna iā leova, ma sa’oloto mai i le masiofo leaga o Atalia ma tapua’iga iā Paala. Po ua e iloa le auala na fesoasoani ai le lototele o loiata i le to’atele o tagata?

**Fesili:** Na faapefea ona faaalua e loiata le lototele? O le ā sou manatu, pe e mafai ona fesoasoani leova iā te oe ina ia e lototele?

**2 Tupu 11:1–12:12; 2 Nofoaiga a Tupu 21:1–6; 22:10–12; 23:1–24:16**



## 54 Sa Onosa'i leova iā lona

Sa amioleaga tagata na iai i Nineva, o se aai i le atunuu o Asuria. Na faatonu e leova lana perofeta o lona e alu i Nineva ma lapata'i i latou ina ia suia a latou amioga. Peita'i na sola ese lona, ma alu i se vaa na malaga atu i Tasesa.

A o iai le vaa i le sami, na agi mai se matagi malosi ma na matuā fefefe ai le 'auvaa. Na latou tatalo atu i o latou atua e faapea: 'Aiseā ua tupu ai lenei mea?' Ona fai atu lea o lona iā i latou: 'O a'u le māfuaaga. Na ou sola ese ma lē faia le faatonuga a leova. Ia lafo a'u i le sami, ona to'a ai lea o le matagi.' E le'i manana'o le 'auvaa e lafo lona i le sami, ae na ia talosaga atu pea ina ia faia lenei mea. Ina ua latou lafo o ia i le sami, ona to'a ai lea o le matagi.

Na mafaufau lona o le a oti o ia. A o magoto ifo o ia i le sami, na ia tatalo atu iā leova. Ona aumaia lea e leova o se i'a telē. Ua folo e le i'a lona ae e le'i oti ai o ia. Na tatalo lona mai i le manava o le i'a e faapea: 'Ou te tautō atu o le a ou usita'i iā te oe.' Na puipuia e leova lona a o iai i totonu o le manava o le i'a mo aso e tolu, ona ia faapogaia lea o le i'a e luai i fafo lona i le laueleele mātūtū.

Talu ai na faasaoina e leova lona, po o lona uiga la e lē o toe mana'omia ona ia alu i Nineva? E leai. Na toe faatonu e leova lona e alu atu i inā. Ae o le taimi la lea ua ususita'i lona. Na ia alu i Nineva ma fai atu i tagata amioleaga: 'E toe 40 aso ona faaumatia lea o Nineva.'


“O loo onosa’i mai pea [leova] iā te outou, auā e lē finagalo o ia e faaumatia se tasi, ae e finagalo ia oo uma lava i le salamō.”—2 Peteru 3:9

Ona faafuase’i lea ona usiusita’i o tagata Nineva ma suia a latou amioga. Na faapea atu le tupu o Nineva i ona tagata: ‘Ia valaau atu i le Atua ma ia salamō. Atonu o le a ia lē faaumatia ai i tatou.’ Ina ua silasila mai leova ua salamō tagata, ona ia lē faaumatia lea o Nineva.

Na ita lona ina ua lē oo le faaumatiaga o le aai. Se’i mafaufau: Na onosa’i ma alofa mutimutivale leova iā lona, ae e le’i alofa mutimutivale lona i tagata o Nineva. Nai lo o lea, na ia nofo i fafo o le aai i lalo o le paolo o le laau o le kikaiona, ma ua faa’ū’ū o ia. Ona pē lea o le laau, ma ua ita ai lona. Ona faapea mai lea o leova iā te ia: ‘Ua sili atu ona e popole i lenei laau nai lo o tagata Nineva. Na ou alofa mutimutivale iā i latou ma faasaoina i latou.’ O le ā le lesona? Na sili atu ona tāua tagata Nineva nai lo o so o se laau.

**Fesili:** O ā lesona na a’oa’o atu e leova iā lona?  
O le ā e tatou te a’oa’oina mai i le mea na tupu iā lona?

**Iona 1:1–4:11**



## 55 Puipuia e le Agelu a leova Esekia

Na pulea e le emepaea o Asuria ituaiga e sefulu o le malo o Isaraelu. A o lea ua mana’o fo’i Sanerivi le tupu o Asuria e pulea ma ituaiga e lua o le malo o luta. Na ia faoa ta’itasi lava aai o luta. Ae o le aai na sili ona ia mana’o i ai o Ierusalema. Peita’i, e le’i iloa e Sanerivi sa puipuia e leova le aai o Ierusalema.

Sa totogi e Esekia le tupu o luta le tele o tupe iā Sanerivi, ina ia aua ne’i faoa ai le aai o Ierusalema. E ui na talia e Sanerivi nei tupe, ae na ia auina atu pea lana ‘autau malosi e osofa’ia Ierusalema. Na fefefe tagata o le aai, ona ua latalata atu le ‘autau a Asuria. Ae na faapea atu Esekia iā i latou: ‘Aua tou te fefefe. E malolosi le ‘autau a Asuria, ae o le a foa’i mai e leova iā i tatou le malosi e sili atu i lo o i latou.’


Na auina atu e Sanerivi lana avefe’au o Ravesaki i Ierusalema, ina ia taufaifai i tagata. Na tu Ravesaki i fafo o le aai ma valaau atu: ‘E lē mafai ona fesoasoani leova iā te outou. Aua ne’i faasesēina outou e Esekia. E leai se atua e mafai ona puipuia outou mai iā i matou.’

Na talosaga atu Esekia iā leova po o le ā e tatau ona ia faia. Na tali mai leova: ‘Aua e te fefe i faamatalaga a Ravesaki. E lē faoa e Sanerivi Ierusalema.’ Ona sosoo ai lea ma le mauaina e Esekia o ni tusi mai iā Sanerivi. Na ta’ua i na tusi: ‘Ua leai se isi mea e mafai ona outou toe faia. E lē mafai e leova ona lavea’iina outou.’ Na tatalo Esekia: ‘Faamolemole leova, ia e lavea’iina i matou, ina ia iloa ai e tagata uma e na o oe lava le Atua moni.’ Na faapea mai leova iā te ia: ‘E lē oo mai le tupu o Asuria i totonu o Ierusalema. Ou te puipuia lo’u aai.’

Na mautinoa e Sanerivi e lē o toe umi ona ia faoa lea o Ierusalema. Ae i lenā lava pō, na auina atu ai e leova se agelu i le nofoaga o loo iai fitafita i fafo o le aai. Na fasiotia e le agelu fitafita e 185,000. Na maliliu fitafita malolosi a le tupu o Sanerivi. Ua leai se isi mea e mafai ona ia toe faia,







ae na o le toe fo'i i  
lona aiga ona ua  
faato'ilaloina o ia. Na  
puipuia e leova Esekia  
ma le aai o Ierusalem  
e pei lava ona ia folafolaina  
mai. Pe ana e iai i Ierusalem,  
pe e te maufaatuatua leova?

**Fesili:** Na faapefea ona puipuia e leova Ierusalem? O le ā sou manatu, po o le a puipuia oe e leova?

2 Tupu 17:1-6; 18:13-37; 19:1-37;  
2 Nofoaiga a Tupu 32:1-23

“E toluapi le agelu a  
leova e si'osi'omia ai i  
latou o ē e matata'u  
iā te ia, ma e na te  
lavea'iina fo'i i latou.”  
—Salamo 34:7



## 56 Sa Naunau losia i le Tulafono a le Atua

E valu tausaga o losia ina ua fai o ia ma tupu o luta. I na taimi, sa faia ai e tagata faiga faataulāitu ma tapua’i i tupua. I le 16 o tausaga o losia, na ia taumafai ai e a’oa’oina le auala e tatau ona tapua’i ai iā leova. Ina ua 20 ona tausaga, na amata ai ona ia talepeina i lalo tupua ma fata faitaulaga i le nuu atoa. Ina ua 26 ona tausaga, na ia faia ai loa tapenapenaga ina ia toe faaleleia le malumalu o leova.

Na maua e le ositaulaga sili o Hilikia i le malumalu le tusi tā’ai o le Tulafono a leova, atonu o le tusi tā’ai lea na tusia e Mose. Na ave e Safana le failautusi a le tupu lenā tusi tā’ai iā losia, ma amata ona faitauina leotele. A o faalogologo atu losia, na ia iloa ai ua tele tausaga o lē usiusita’i tagata iā leova. Na faapea atu le tupu o losia iā Hilikia: ‘Ua matuā ita lava leova iā i tatou. Ia e alu ma talosaga atu iā te ia. O le a ta’u mai e leova le mea e tatau ona tatou faia.’ Na tali mai leova e ala i le perofeta fafine o Ulata e faapea: ‘Ua tuua a’u e le nuu o luta. O le a faasalaina i latou, ae e lē faasalaina i le taimi o le pulega a losia, talu ai ua ia faamaulalo iā te ia lava.’

Ina ua faalogo le tupu o losia i lenā fe’au, ona ia alu lea i le malumalu ma faapotopoto le nuu o luta. Na ia faitau leotele atu i le nuu atoa le Tulafono a leova. Na ta’utino atu losia ma le nuu o le a latou usiusita’i iā leova ma o latou lotoatoa.

Ua tele tausaga e le’i toe faamanatuina e le nuu o luta le Paseka.

**“O lau afioga o le sulu  
lea i o’u vae, ma le  
malamalama i lo’u ala.”  
—Salamo 119:105**

Ae ina ua faitau atu e losia le Tulafono o loo ta’ua ai e tatau ona faamanatuina le Paseka i tausaga ta’itasi, na ia faapea atu i le nuu: ‘O le a tatou faia se Paseka iā leova.’ Ona sauni lea o losia e faia le tele o taulaga, ma faia fuafuaga ina ia iai ni tagata pepese i le malumalu. Ona faamanatu lea e le nuu o le Paseka, ma sosoo ai lea o le Tausamiga o Falaoa e Lē Faafefeteina lea e fitu aso e faia ai. E le’i faia lava se paseka faapenei talu mai aso o Samuelu. Na matuā nautau losia i le Tulafono a le Atua. Pe e te fiafia e a’oa’oina e faatatau iā leova?

**Fesili:** O ā ni faalogona o le tupu o losia ina ua ia faalogo i le Tulafono a le Atua?  
O ā ni faalogona o leova e faatatau iā losia?

**2 Tupu 21:26; 22:1–23:30; 2 Nofoaiga a Tupu 34:1–35:25**





# 10

O leova o le Tupu i le aoao o mea. O ia lava e iai le pule, ma o le a faaauau ona ia faia faapea. O se faata'ita'iga, na ia lavea'ia Ieremia mai i se lua e oti ai. Na ia faasaoina Sataraka, Mesako, ma Apeteniko mai i se ogaumu aasa, faapea Tanielu mai i gutu o leona. Na puipuia e leova Eseta, ina ia mafai ona ia lavea'iina lona nuu atoa. E na te lē tuuina pea le amioleaga ia faaauau ona iai. O valoaga e faatatau i le faatagata telē ma le laau telē, ua faamautinoa mai ai e lē toe umi ona aveesea lea e le Malo o leova o mea leaga uma, ae pule mai i le lalolagi.



## LESONA AUTŪ

- E sili atu ona malosi le Malo o leova nai lo o se isi lava malo faaletagata
- E pei o Eseta ma Tanielu, e tatau ona tatou faia le mea sa’o i taimi uma, e tusa lava po o fea o loo tatou iai
- la faalagolago atoatoa iā leova pe a feagai ma tulaga e sili ona faigatā, e pei ona faia e Ieremia ma Neemia

## 57 Auina Atu e leova Ieremia e Tala'i

Na filifilia e leova Ieremia e avea o se perofeta i tagata o luta. Na ia faatonuina Ieremia ina ia tala'i i tagata, ma lapata'i i latou e taofia le faia o mea leaga. Na tali atu Ieremia: 'leova e, ua na o a'u o se tamaitiiti. Ou te lē iloa le auala e tautala atu ai i tagata.' Na faapea mai leova iā te ia: 'Aua e te fefe. O le a ou tuu atu upu i lou gutu. O le a ou fesoasoani iā te oe.'

Na faapea atu leova iā Ieremia e faapotopoto toeaina o le nuu, ona nutililii lea o se fagu omea i o latou luma ma fai atu: 'E faapea fo'i ona nutililii Ierusalem.' Ina ua faia e Ieremia le faatonuga a leova, ona matuā feita ai lea o toeaina o le nuu. Na fasi Ieremia e se ositaulaga e igoa iā Pasura ma loka o ia i laau faamau. E le'i mafai e Ieremia ona minoi i le pō atoa. Sa faasa'oloto o ia e Pasura i le taeao na sosoo ai. Na faapea ifo Ieremia: 'Ua ou lē lavā onosaia nei mea. Ou te lē toe tala'i.' Ae pe na ia lē toe tala'i ai? E leai. Ina ua toe mafaufau lelei Ieremia, ona ia faapea ane lea: 'Ua pei le fe'au a leova o se afi e mumū i totonu iā te a'u. E lē mafai ona ou lē tala'i atu.' Na faaauau pea ona lapata'ia e Ieremia tagata.

Ua mavae ni tausaga ona iai lea o se tupu fou i luta. Na lē fiafia ositaulaga ma perofeta pepelo i le fe'au a Ieremia. Na latou fai atu i perenise: 'E tatau ona oti lenei tagata.' Na tali atu Ieremia: 'Pe a outou fasiotia a'u, o le a outou fasiotia se tagata e lē sala. O loo o'u ta'u atu fetalaiga a leova ae e lē o o'u manatu.' Ina ua faalogo perenise i le tali a Ieremia, ona latou faapea mai lea: 'E lē tatau ona oti lenei tagata.'

Na faaauau pea ona tala'i Ieremia, ma na matuā feita ai perenise. Na



latou talosaga atu i le tupu ina ia fasiotia Ieremia. Na fai atu le tupu e pule i latou i le mea e manana’o e fai iā Ieremia. Ona latou ave lea o Ieremia ma lafo i totonu o se vaieli loloto ma palapalā, ma manatu o le a oti ai Ieremia i inā. Na amata ona magoto ifo Ieremia i le palapala.

Ona faapea atu lea i le tupu o se tagata aloa’ia i le maota o le tupu e igoa iā Epetemeleka: ‘Ua lafo e perenise Ieremia i le vaieli. Pe afai e tuu ai pea o ia i inā, o le a oti o ia.’ Na faatonu e le tupu Epetemeleka e ō ma ni tamāloloa e 30 e toso mai i luga Ieremia mai i le vaieli. Pe e lē tatau ona tatou faata’ita’i iā Ieremia, o lē e le’i faatagaina so o se mea e taofia o ia mai i le tala’i atu?

**Fesili:** Aiseā na ususita’i ai Ieremia iā leova, e ui lava sa la’itiiti o ia? O ai na taumafai e taofia Ieremia mai i le tala’i atu?

**Ieremia 1:1-19; 19:1-11; 20:1-13; 25:8-11; 26:7-16; 38:1-13**

**‘O le a inosia outou e tagata uma ona o lo’u igoa; a o lē e tumau se’ia oo i le i’uga, e faaolaina o ia.’  
—Mataio 10:22**



## 58 Ua Faaumatia Ierusalem

Na toe tuua fo'i e tagata o luta leova ma tapua'i i atua sesē. Mo le tele o tausaga, na taumafai pea leova e fesoasoani iā i latou. Na ia auina atu perofeta e to'atele e lapata'i i latou, ae e latou te le'i faalogo. Peita'i na latou taufaifai i perofeta. Na faapefea ona faamuta e leova a latou ifoga tupua?

Sa faasolosolo ona faato'ilalo e Nepukanesa le tupu o Papelonia atunuu ta'itasi. O le taimi muamua na ia faato'ilaloina ai Ierusalem, na ia pu'ea ai le tupu o loakina, o perenise, o tagata totoa, o tufuga, ma ave i latou uma i Papelonia. Na ia ave fo'i oloa uma sa iai i le malumalu o leova. Ina ua uma lenā, ona tofia lea e Nepukanesa o Setekaia e avea ma tupu o luta.

I le taimi muamua, sa usiusita'i Setekaia iā Nepukanesa. Peita'i, na faapea atu nuu na lata ane ma perofeta pepelo iā Setekaia ina ia fouvale iā Papelonia. Na lapata'ia e Ieremia Setekaia e faapea: 'Pe afai e te fouvale, o le a iai fasiotiga tagata, faapea oge ma faama'i i luta.'

Ina ua mavae tausaga e valu o le pulega a Setekaia, ona ia filifili lea e fouvale iā Papelonia. Na ia talosaga atu i le 'autau a Aikupito e fesoasoani mai iā te ia. Ona auina atu lea e Nepukanesa o lana 'autau e osofa'ia Ierusalem, ma na latou nonofo ai faataamilo i le aai. Na faapea atu Ieremia iā Setekaia: 'Ua fetalai mai leova pe afai e te lē tau ma Papelonia, o le a faasaoina oe ma le aai. Ae afai e te tau ma Papelonia, o le a latou susunuina Ierusalem ma ave faapagota oe.' Na tali mai Setekaia: 'Ou te tau pea ma i latou.'





**“leova e, le Atua, o Lē e ona le  
malosi uma lava, e moni ma  
tonu i’uga o au faamasinoga.”  
—Faaaliga 16:7**

I le tausaga ma le ‘afa mulimuli ane, na  
ō atu ai le ‘autau a Papelonia ma talepe i  
lalo pā o Ierusalem ma susunu le aai. Na latou susunuina le  
malumalu, fasiotia le to‘atele o tagata, ma ave faapagota le faitau afe  
o isi tagata.

Na sola ese Setekaia mai i Ierusalem ae na tuliloa o ia e ‘au a  
Papelonia. Na latou pu‘ea o ia i se nofoaga e lata i Ieriko ma aumai o ia  
iā Nepukanesa. Na faamatamata e le tupu o Papelonia Setekaia a o  
fasiotia ona atalii. Ona faatauaso lea e Nepukanesa o Setekaia ma tuu  
o ia i le falepuipui, lea na mulimuli ane maliu ai. Ae na folafola atu e  
leova i tagata o luta: ‘Pe a mavae tausaga e 70, o le a ou toe faafo’isia  
oe i Ierusalem.’

O le ā o le a tupu i talavou sa ave i Papelonia? Po o le a latou  
faamaoni pea iā leova?

**Fesili:** O ai Nepukanesa?

O le ā na ia faia i le aai o Ierusalem? O ai Setekaia?

**2 Tupu 24:1, 2, 8-20; 25:1-24; 2 Nofoaiga a Tupu 36:6-21;  
Ieremia 27:12-14; 29:10, 11; 38:14-23; 39:1-9; Esekielu 21:27**





## 59 Ni Tama se To'afā na Ususita'i iā leova

Ina ua ave e Nepukanesa perenise o luta i Papelonia, na ia tofia se tagata aloa'ia e igoa iā Asepenasa e vaavaaia i latou. Na ia faatonuina Asepenasa ina ia sa'ili ni tama talavou e malolosi ma atamamai mai iā i latou. E tolu tausaga o le a'oa'oina ai nei tama talavou. O nei toleniga o le a sauniunia ai i latou e avea o ni tagata tāua i Papelonia. Na tatau ona a'oa'oina nei tama talavou ina ia iloa faitau, tusitusi ma tautatala i le gagana Akaia o Papelonia. Sa tatau ona latou aai i mea'ai sa aai ai le tupu ma tagata sa iai i lona maota. O le to'afā o nei tama talavou, o o latou igoa o Tanielu, Hanania, Mesaclu, ma Asaraia. Na suia e Asepenasa o latou igoa i igoa Papelonia o Peletisara, Sataraka, Mesako ma Apeteniko. Po o le a avea nei a'oa'oga ma itu e latou te lē toe auauna ai iā leova?

**“Aua lava ne’i vaai maualo se tagata i lou talavou. A ia fai oe ma faaa’oa’o i ē e faamaoni i le tautala, ma le amio, ma le alofa, ma le faatuatua, ma le amio mamā.”—1 Timoteo 4:12**

Na maumaua’i nei tama talavou e to’afā e usiusita’i iā leova. Na latou iloa e lē tatau ona aai i mea’ai a le tupu, ona e lē mamā nisi mea’ai e tusa ai ma le Tulafono a leova. O lea, na latou fai atu ai iā Asepenasa: ‘Faamolemole aua e te faamalosia i matou e aai i mea’ai a le tupu.’ Na tali mai Asepenasa: ‘Pe afai e tou te lē aai ma e vaai mai le tupu e tou te lē o malolosi, o le a ia fasiotia a’u.’

Na mafaufau Tanielu i se isi auala. Na ia fai atu i le leoleo na tofia e vaavaaia i latou: ‘Faamolemole ia aumai na o fualaau faisua e matou te aai ai ma vai e inu ai mo aso e sefulu. Ona faatusatusa lea o i matou ma tama talavou o loo aai i mea’ai a le tupu.’ Na malie le leoleo na tofia e vaavaaia i latou i lea fuafuaga.

Ua mavae aso e sefulu, ma ua sili atu le tino lelei o Tanielu ma ana uō e to’atolu nai lo o isi tama talavou uma. Na fiafia leova ona sa latou usiusita’i iā te ia. Na ia foa’i atu fo’i iā Tanielu le atamai e malamalama ai i vaaiga ma miti.

Ina ua uma le vaitaimi na a’oa’oina ai tama talavou, ona ave lea e Asepenasa o nei tama talavou e to’afā i luma o Nepukanesa. Na talanoa le tupu ma i latou, ma na ia iloa ai e sili atu le popoto ma le mataalia o Tanielu, Hanania, Mesaclu ma Asaraia nai lo o isi tama talavou uma. Ona filifilia lea e le tupu o nei tama talavou e galulue i lona maota. Na masani ona fesili atu le tupu iā i latou mo ni fautuaga i mataupu tāua. Na faia e leova i latou ia sili atu ona atamamai nai lo o tagata atamamai ma taulāitu uma a le tupu.

E ui lava e ese le atunuu sa iai Tanielu, Hanania, Mesaclu ma Asaraia, ae e le’i galo ai iā i latou o i latou o tagata o leova. Po o le a e manatua pea fo’i leova, e tusa pe tou te lē iai faatasi ma ou mātua?

**Fesili:** Aiseā na usiusita’i ai Tanielu ma ana uō e to’atolu iā leova?  
Na faapefea ona fesoasoani leova iā i latou?

**Tanielu 1:1-21**

## 60 Se Malo e Tumau e Faavavau

I se tasi pō, na fai ai se miti uigaese a le tupu o Nepukanesa, ma e le'i lelei ai lana moe. Na ia aami ana taulāitu ma faapea atu iā i latou: 'Faamatala mai la'u miti na fai.' Na latou tali mai: 'Le tupu e, ta'u mai lau miti.' Ae na fai atu Nepukanesa: 'Leai! Ia faamatala mai le mea na ou miti ai, a leai o le a ou fasiotia outou.' Na latou toe tali mai: 'Ta'u mai lau miti, ona matou faamatala atu lea o lona uiga.' Na fai atu Nepukanesa: 'O loo outou taumafai uma e faasesē a'u. Faamatala mai la'u miti.' Na latou faapea atu i le tupu: 'E leai se tagata i lenei lalolagi e mafai ona faia lenā mea. E faigatā le mea ua e talosaga mai ai.'

Na matuā ita Nepukanesa, ma o lea na ia faatonuina ai le fasiotia o taulāitu ma tagata atamamai uma i Papeonia. Na aofia ai Tanielu, Sataraka, Mesako ma Apeteniko. Na talosaga atu Tanielu i le tupu ina ia tuu atu se taimi. Ona latou tatalo lea ma ana uō e to'atolu iā leova e fesoasoani mai iā i latou. O le ā na faia e leova?

Na faaali mai e leova iā Tanielu i se vaaiga le miti a Nepukanesa ma le uiga o lenā miti. I le aso na sosoo ai, na alu atu ai Tanielu i le auauna a le tupu ma fai atu: 'Aua ne'i e fasiotia tagata atamamai. E mafai ona ou faamatalaina le miti a le tupu.' Na ave e le auauna Tanielu iā Nepukanesa. Na faapea atu Tanielu i le tupu: 'Ua faailoa mai e le Atua iā te oe mea o le a tutupu i le lumana'i. O lau miti lenei: Na e vaaia se faatagata telē, o lona ulu ua faia i le auro, o lona fatafata ma ona lima o siliva, o lona manava ma ona ogāvae o le 'apamemea, o ona vae e u'amea, o ona tapuvae o le u'amea e fefiloi ma le omea. Ona iai lea o se maa ua tofia mai i le mauga, ma ua taia ai tapuvae o le faatagata. Na matuā nutililii le faatagata ma ua lelea i le matagi. Na avea le maa ma mauga telē, ma ua tumu ai le lalolagi atoa.'




Ona faapea atu lea o Tanielu: ‘O le uiga lenei o lau miti: O le ulu ua faia i le auro, o lou malo lea. Pe a mavae atu lou malo ona tula’i mai lea o se isi malo, o le siliva lea. O le isi malo e tula’i mai e pule i le lalolagi atoa, o le apamemea lea. O le isi malo, o le a malosi e pei o le u’amea. Mulimuli ane, ona tula’i mai lea o se isi malo. O le a vaeluaina lenei malo, o isi vaega e malosi e pei o le u’amea ae o isi vaega e vaivai e pei o le omea. O le maa lea o le a avea ma mauga, o le Malo o le Atua. O le a nutililii e lenā Malo isi malo uma, ae e tumau lenā Malo e faavavau.’

Ona faapa’ū faō ai lea o Nepukanesa i luma o Tanielu ma faapea atu: ‘Na faailoa atu e lou Atua lenei miti iā te oe. E leai se Atua e pei o ia.’ Nai lo o le fasiotia o Tanielu, ae na tofia o ia e Nepukanesa e sili i ē e pule i tagata atamamai uma, ma avea ma pule i le itumalo o Papelonia. Pe na e iloa le auala na taliina ai e leova le tatalo a Tanielu?

**Fesili:** Aiseā na mafai ai e Tanielu ona faamatalaina le miti a Nepukanesa? O le ā le uiga o le miti?

**Tanielu 2:1-49**



‘Ua latou faapotopoto iā i latou i le mea ua igoa i le upu Eperu o Amaketo.’  
—Faaaliga 16:16



## 61 E Latou te Le'i Ifo

E le'i umi talu ona mavae atu le taimi na fai ai le miti a le tupu o Nepukanesa e faatatau i le faatagata, ona ia faia lea o se tupua telē mai i le auro. Na ia faatūina lenā tupua i le fanua laugatasi o Turu, ona valaauina lea o tagata faapitoa o le atunuu e aofia ai Sataraka, Mesako ma Apeteniko e faapotopoto i inā. Na avatu le faatonuga a le tupu e faapea: 'O le taimi lava tou te faalogo ai i leo o pū, kitara, ma meafaifaaili e fai lona taga, ona outou ifo lea i le tupua. O so o se tasi e lē ifo i le tupua o le a lafo i le ogaumu aasa.' Po o le a ifo talavou Eperu e to'atolu i le tupua, po o le a latou tapua'i tau lava o leova?

Ona faatonuina lea e le tupu ina ia tā le musika. Na faapa'u'ū faō tagata uma ma tapua'i atu i le tupua, se'i vaganā ai Sataraka, Mesako ma Apeteniko. Na iloa e nisi o tagata le mea na tupu ma faapea atu i le tupu: 'Na mumusu na tagata Eperu e to'atolu e tapua'i i lau tupua.' Na faatonuina e le tupu i latou e ō mai, ma na ia faapea atu: 'O le a toe tuu atu se isi avanoa e tou te tapua'i ai i le tupua. Pe afai e tou te lē faia faapea, o le a lafo outou i le ogaumu. E leai se atua e mafai ona faasaoina outou.' Na latou tali mai: 'E matou te lē mana'omia se isi avanoa. E mafai e lo matou Atua ona faasaoina i matou. Ae tusa fo'i pe e na te lē faasaoina i matou, le tupu e, e matou te lē tapua'i lava i le tupua.'

**"E tatau ona e tapua'i iā leova lou Atua, ma e na o ia fo'i e tatau ona e avatu i ai le auaunaga paia."**  
—Mataio 4:10

Na matuā ita Nepukanesa. Na ia faatonu ona tagata: 'Ia faafitu ona faaasa le ogaumu nai lo o le mea e masani ai.' Ona ia faatonu lea o ana fitafita: 'Ia saisai nei tagata ma lafo i latou i le ogaumu.' O le

mata'utia o le aasa o le ogaumu na feoti ai fitafita ina ua latalata atu i ai. Ona pa'u'ū lea o Eperu e to'atolu i le afi. Ae ina ua vaai atu Nepukanesa i totonu o le ogaumu, o loo savavali i totonu o le afi ni tagata e to'afā nai lo o le to'atolu. Na fefe Nepukanesa ma fesili atu i ona tagata maualuluga: 'Pe e tatou te le'i lafoina ea tane e to'atolu i totonu o le afi? Ua ou iloa atu tane e to'afā, ma o se tasi o i latou e foliga e pei o se agelu.'

Ona faalatalata atu lea o Nepukanesa i le ogaumu ma valaau atu: 'Inā ō mai ia i fafo, o outou o auaua a le Atua Silisili Ese!' Na maofa tagata uma i le ō mai i fafo o Sataraka, Mesako, ma Apeteniko ae e le'i mū o latou tino i le afi. E le'i mū fo'i o latou lauulu, o latou ofu ma e le'i namuasua fo'i i latou.

Na faapea atu Nepukanesa: 'E malosi le Atua o Sataraka, Mesako, ma Apeteniko. Na ia auina mai lana agelu ma na faasaoina ai i latou. E leai se atua e pei o ia.'

E pei o talavou Eperu e to'atolu, pe e te maumaua'i e faamaoni pea iā leova e tusa lava po o le ā e tupu?

**Fesili:** O le ā le mea e le'i manana'o Sataraka, Mesako, ma Apeteniko e fai? Na faapefea ona faasaoina i latou e leova?

**Tanielu 3:1-30**



## 62 Se Malo e Pei o se Laau Telē

I se tasi pō, na fai ai se miti a Nepukanesa ma na fefe ai. Na ia aami ana tagata atamamai ina ia faamatala atu iā te ia le uiga o le miti. Ae e leai se tasi o i latou na mafai ona faamatalaina lenā miti. Mulimuli ane, ona fesili atu lea o le tupu iā Tanielu.


Na faapea atu Nepukanesa iā Tanielu: ‘Na ou vaaia i la’u miti se laau. Ua tupu tele ma ua oo lona maua i le lagi. E mafai ona iloa atu lenei laau mai i so o se vaega lava o le lalolagi. E mananaia ona lau, ma e anoanoa’i ona fua. E ō mai i ai manu o le fanua i lona paolo, ma e ofaga mai i ai manulele o le lagi i ona lālā. Ona sau ai lea o se agelu mai i le lagi. Na ia alaga leotele mai: “Ia tātuu i lalo le laau, ia tipi ese ona lālā. Ae ia tuu pea i le eleele le tagutugutu o le pogati, ia fusi i se fusi u’amea ma le ‘apamemea. O le a liua lona loto mai i le loto o le tagata i le loto o se manu, ia tuu ai pea se’ia mavae atu taimi e fitu. O le a iloa ai e tagata uma o le Atua o le Pule, ma e mafai ona ia avatu se malo i lē ua ia finagalo i ai.”’

Na faailoa mai e leova iā Tanielu le uiga o le miti. Ina ua malamalama Tanielu i le uiga o le miti, ona fefe ai lea o ia. Na ia faapea atu: ‘Le tupu e, ma’imau pe ana faapea o le miti e faatatau i ou fili. Pagā lea, e faatatau atu le miti iā te oe. O oe le laau telē na tātuu i lalo. O le a aveesea lou malo mai iā te oe, ma o le a e ‘ai i vao e pei o se manu o le fanua. Ae talu ai na faapea mai le agelu e tuu ai pea le tagutugutu o le pogati, o lea o le a toe aveai ai oe ma tupu.’

I le tausaga na sosoo ai, na fesavalai’i ai Nepukanesa i le taua o lona maota ma vaavaai atu iā Papelonia. Na ia faapea ane: ‘Se’i vaai i le matagofie o lenei aai na ou fausia. Se’i vaai i lo’u silisili ese.’ A o ia faia na faamatalaga, ae ia faalogoia loa se si’ufofoga mai i le lagi: ‘Nepukanesa e, e lē toe iai sou malo.’

I lenā lava taimi, na faalētonu ai le mafaufau o Nepukanesa ma na pei ai o ia o se manufe’ai o le vao. Na tuliese o ia mai i lona maota, ma nofo i le mea sa iai manufe’ai o le vao. Na uumi lona lauulu e pei o fulufulu o aeto, ma ona atigivae ma atigilima e pei o matiuu o le manulele.





Ina ua mavae tausaga e fitu, ona toe lelei ai lea o le mafaufau o Nepukanesa ma toe faia ai o ia e leova ma tupu o Papeonia. Ona faapea ane lea o Nepukanesa: ‘Ou te vivii iā leova le Tupu o le lagi. O lea ua ou iloa nei o leova o le Pule. E na te faamaualoina o ē faamaualuluga, ma e mafai ona ia avatu se malo i so o se tasi e finagalo i ai o ia.’

**Fesili:** O le ā le uiga o le miti a Nepukanesa?  
O le ā le lesona na a’oa’oina mai ai e Nepukanesa?

**Tanielu 4:1-37**

“E muamua le faamaualuga i le pa’ū, e muamua fo’i le agaga faualuga i le tautevateva.”  
—Faataoto 16:18

## 63 Tusitusiga i le Puipui

Ina ua mavae sina taimi, ona avea lea o Pelesara ma tupu o Papelonia. I se tasi pō, na ia valaaulia ai le to'aafe o tagata e sili ona tāua i le atunuu mo se faiga'ai tele. Na ia faatonuina ana auauna e aumai ipu auro na aveesea e Nepukanesa mai i le malumalu o leova. Na feinu Pelesara ma ē na latou fai'aiga i na ipu, ma vivii atu i o latou atua. I lea lava taimi, na faafuase'i ona vaaia ai le lima o se tagata ua amata ona tusia ni faaupuga uigaese i le puipui o le potu'ai.

Na matuā fefe Pelesara. Na ia aami ana taulāitu ma faapea atu iā i latou: 'O so o se tasi e mafai ona ia faamatalaina le uiga o nei upu, o le a ou tofia o ia e avea ma tagata lona tolu e sili ona mauuluga i Papelonia.' Ua latou taumafai e faamatala le uiga o na faaupuga, ae e leai se tasi na mafai ona faamatalaina. Ona sau ai lea o le masiofo ma faapea atu: 'O loo iai se tagata e igoa iā Tanielu, sa masani ona ia faamatalaina le uiga o miti ma tupua iā Nepukanesa. E mafai ona ia faamatalaina iā te oe le uiga o na upu.'

Na alu atu Tanielu i le tupu. Na faapea atu Pelesara iā te ia: 'Afai e mafai ona e faitauina ma faamatala le uiga o le tusitusiga, o le a ou avatu iā te oe se filifili auro ma o le a avea oe ma tagata lona tolu e sili ona mauuluga i Papelonia.' Na tali mai Tanielu: 'Ou te lē mana'o i au meaalofo, ae o le a ou ta'uina atu le uiga o nei upu. Sa faamauluga lou tamā o Nepukanesa, ae na faamaulaloina o ia e leova. Na e iloa mea uma na tutupu iā te ia, ae e te le'i faaaloalo iā leova e ala i le inuina o uaina i ipu auro mai i Lona malumalu. O lea, ua tusia ai e le Atua upu nei:

Mene, Mene, Tekele ma Uperesa. O le uiga o nei upu e faapea, o le a faato'ilaloina Papelonia e tagata Metai ma Peresia, ma o le a lē toe avea oe ma tupu.'

Na foliga mai e leai se tasi na mafai ona faato'ilaloina Papelonia. Na puipuia lenei aai i pā tetele ma se vaitafe loloto. Ae i le pō lava lenā, na osofa'ia ai e tagata Metai


**“Ua pa’ū o ia! Ua pa’ū Papelonia le Aai Tele, ua avea ma mea e nonofo ai temoni.”**  
—Faaaliga 18:2

ma Peresia le aai o Papelonia. Na faatafe ese e Kuresa le tupu o Peresia le vaitafe, ina ia mafai ai e ana fitafita ona savavali se'ia oo i pā o le aai. Ina ua latou oo atu i inā, o loo matala faitoto'a o le aai. Na o atu faavave i totonu le 'autau, ua faato'ilalo le aai ma fasiotia le tupu. Ona avea ai lea o Kuresa ma tupu o Papelonia.

I totonu o le tasi tausaga, na faalauiloa atu ai e Kuresa le mea lenei: 'Na faatonuina a'u e leova e toe fausia lona malumalu i Ierusalem. O so o se tasi o ona tagata e mana'o e fesoasoani, e mafai ona toe fo'i.' O lea, e pei lava o le folafolaga a leova, o le to'atele o tagata lutaia na toe fo'i i Ierusalem ina ua mavae le 70 tausaga talu ona faaumatia. Na toe faafo'i e Kuresa ipu auro, ipu siliva ma isi mea na aveesea e Nepukanesa mai i le malumalu. Po o e mātauina le auala na faaaogā ai e leova Kuresa e fesoasoani i Ona tagata?

**Fesili:** O le ā le uiga o le tusitusiga sa tusia i luga o le pui-pui?  
O le ā na faatonuina e leova Kuresa e fai?

**Esera 1:1-11; Tanielu 5:1-30; Isaia 44:27-45:2;**  
Ieremia 25:11, 12



## 64 Tanielu i le Lua o Leona

O le isi tupu na sosoo ai o Papelonia o Tariu le Metai. Na mātāu e Tariu e faapitoa Tanielu. Na ia tofia Tanielu e vaavaaia tane e sili ona tāua o le atunuu. Na lotoleaga nei tane iā Tanielu ma manana’o e aveesea Tanielu. Na latou iloa e faatolu ona tatalo Tanielu iā leova i aso ta’itasi. O lea na latou fai atu ai iā Tariu: ‘Le tupu e, e tatau ona iai se tulafono e na o oe lava e tatau ona tatalo atu i ai tagata uma. O so o se tasi lava e lē usita’i i le tulafono, e tatau ona lafo i le lua o leona.’ Na fiafia Tariu i lea manatu, ma sainia ai loa lea tulafono.

O le taimi lava na faalogo ai Tanielu i le tulafono fou, ona alu lea o ia i lona fale. Ua ia tatala le faamalama, ona ia tootuli lea ma tatalo atu iā leova. Na lolofi atu tagata lotoleaga i le fale o Tanielu ma maua atu o ia o loo tatalo. Ona latou faanatinati atu lea iā Tariu ma faapea atu: ‘E lē o usiusita’i Tanielu iā te oe. E faatolu i le aso ona ia tatalo i lona Atua.’ Na fiafia Tariu iā Tanielu ma e le’i mana’o e fasiotia o ia. Na alu le aso atoa o taumafai o ia e mafaufau i se auala e faasaoina ai Tanielu. Ae e oo lava i le tupu, e lē mafai ona ia suia se tulafono ua uma ona ia sainia. Sa tatau ona ia avatu le poloa’iga e lafo Tanielu i le lua o leona fe’ai.



Na matuā popole Tariu iā Tanielu i lenā pō,  
ma e le'i mafai fo'i ona moe o ia. Ina ua oo i le  
taeao o le aso na sosoo ai, ona tamo'e atu lea o  
ia i le lua o leona ma valaau atu iā Tanielu: 'Pe na  
lavea'iina oe e lou Atua?'

Na faalogoina e Tariu se leo. O le leo o Tanielu.  
Na valaau mai Tanielu iā Tariu: 'Na punitia e le  
agelu a leova gutu o leona, ma ou te le'i afāina  
ai.' Na matuā fiafia Tariu. Na ia avatu le faatonuga e aveese  
Tanielu mai i le lua. E le'i iai se vaega o le tino o Tanielu na  
afāina. Ona avatu lea o le faatonuga a le tupu: 'Ia lafo i le lua  
o leona tagata na tuua'ia Tanielu.' O le taimi lava na lafo ai na  
tagata i le lua, na 'aina i latou e leona.

Na auina atu e Tariu le poloa'iga lenei i ona  
tagata: 'E tatau i tagata uma ona matata'u i le  
Atua o Tanielu. Na ia lavea'ia Tanielu mai i leona.'

Pe e te tatalo i aso ta'itasi iā leova e pei ona  
faia e Tanielu?

**"E moni lava e silafia  
e leova le auala e  
lavea'i ai tagata e  
faamaoni iā te ia mai  
i o latou puapuaga."  
—2 Peteru 2:9**

**Fesili:** O le ā le gaoioiga sa faatolu ona faia e Tanielu i aso ta'itasi?  
Na faapefea ona lavea'ia e leova Tanielu?

**Tanielu 6:1-28**



## 65 Lavea'iina e Eseta Ona Tagata

O Eseta o se tama'ita'i lutaia na nofo i Susana le aai o Peresia. I le tele o tausaga ua mavae, na aveese ai e Nepukanesa lona aiga mai i Ierusalem. Na tausi a'e o ia e lona tauusoga o Moretekai, o ia o se auauna a Asueru le tupu o Peresia.


Na mana'o le tupu o Asueru i se masiofo fou. Na avatu e ana auauna ia te ia tama'ita'i e sili ona lalelei o le atunuu e aofia ai ma Eseta. Ae mai i na tama'ita'i uma, na filifilia e le tupu Eseta e avea ma ana masiofo. Na fai atu Moretekai ia Eseta, ina ia aua ne'i faailoa atu i se tasi o ia o se lutaia.

Sa iai se tamāloa faamaualuga e igoa ia Hamanu, ma na ta'ita'i o ia i perenise uma. Na mana'o e ifo atu tagata uma ia te ia. Na musu Moretekai e faia faapea, ma na matuā ita ai Hamanu ma mana'o ai e fasioti Moretekai. Ina ua iloa e Hamanu o Moretekai o se lutaia, ona ia faia lea o se faufauga e fasiotia tagata lutaia uma i le atunuu. Na ia faapea atu i le tupu: 'E fouvale tagata lutaia, ma e mana'omia ona e fasiotia i latou.' Na tali mai Asueru: 'Ia e faia le mea ua lelei ia te oe.' Ona tuu atu lea e Asueru le pule ia Hamanu e faia ai se tulafono. Na faia e Hamanu se tulafono, ina ia fasiotia tagata lutaia uma i le aso 13 o le masina o Atara. Na silafia e leova nei mea uma.

E le'i iloa e Eseta le tulafono. O lea na auina atu ai e Moretekai se kopi o le tulafono ia te ia ma faapea atu: 'Ia e alu e talanoa atu i le tupu.' Na faapea atu Eseta: 'O so o se tasi e alu atu i le tupu e aunoa ma se valaaulia, e fasiotia o ia. Ua 30 aso e le'i valaauliaina a'u e le tupu. Ae o le a ou alu pea. Afai e na te faaloaloa mai lona tootoo, o le a ou ola. Ae afai e leai, o le a ou oti.'

Na alu atu Eseta i le lotoā o le maota o le tupu. Ina ua iloa mai o ia e le tupu, ona faaloaloa mai lea o lona tootoo. Na alu atu Eseta ia te ia, ma na fesili mai le tupu: 'O le ā se mea ou te faia mo oe Eseta?' Na tali atu o ia: 'Ou te mana'o e valaaulia oe ma Hamanu i se taumafataga.' I lenā





**‘O le a molia outou i luma o kovana ma tupu ona o a’u, e fai ma molimau iā i latou atoa ma atunuu.’—Mataio 10:18**

taumafataga, na toe valaaulia ai fo’i i la’ua e Eseta i se isi taumafataga. A o faia le taumafataga lona lua, na toe fesili atu le tupu: ‘O le ā se mea ou te faia mo oe?’ Na tali mai Eseta: ‘E iai se tasi o loo taumafai e fasiotia a’u ma o’u tagata. Faamolemole ia e lavea’i i matou.’ Na fesili le tupu: ‘O ai o loo mana’o e fasioti oe?’ Na tali atu Eseta: ‘O le tagata amioleaga lea o Hamanu.’ Na matuā ita Asueru, ma na ia faatonuina ai loa le fasiotia o Hamanu.

Ae e leai se tasi e mafai ona toe soloia le tulafono na faia e Hamanu, e oo lava i le tupu. O lea, na tofia ai loa e le tupu Moretekai ina ia avea ma ta’ita’i i perenise, ma tuuina atu iā te ia le pule e faia ai se tulafono fou. Na faia e Moretekai se tulafono na faatagaina ai tagata lutaia e puipuia i latou lava, pe a osofa’ia i latou. I le aso 13 o le masina o Atara, na faato’ilaloina ai e tagata lutaia o latou fili. Talu mai lenā taimi, na latou faamanatuina lea manumalo i tausaga ta’itasi.

**Fesili:** O le ā le faufauga sa faia faasaga i tagata lutaia? Na faapefea ona faaalua e Eseta le faatuatua iā leova?

**Eseta 2:5-20; 3:1-5:8; 7:1-8:14; 9:1-28**

## 66 A'oa'o Atu e Esera le Tulafono a le Atua

Ua pe ā ma le 70 tausaga talu ona toe fo'i i Ierusalemā toetoe o tagata Isaraelu uma, ae sa iai pea nisi sa nonofo i vaega eseese o le emepaea o Peresia. O se tasi o i latou o se ositaulaga e igoa iā Esera, o lē na a'oa'oina atu le Tulafono a leova. Na iloa e Esera e lē o tausia e tagata i Ierusalemā le Tulafono, ma na ia mana'o e fesoasoani iā i latou. Na faapea atu Aretaseta le tupu o Peresia iā Esera: 'Na foa'i atu e le Atua le atamai iā te oe ina ia mafai ona e a'oa'o atu lana Tulafono. Ia e alu ma ave so o se tasi e mana'o e lua te ō faatasi.' Na feiloa'i Esera ma i latou uma na manana'o e toe fo'i i Ierusalemā. Na latou tatalo iā leova ina ia puipuia i latou a o alu la latou faigāmalaga umi, ma latou ō ese loa.

Na latou taunuu i Ierusalemā i le fā masina mulimuli ane. Na faapea atu perenise i Ierusalemā iā Esera: 'Ua lē usiusita'i tagata Isaraelu iā leova, ma ua latou faaipoipo i fafine na tapua'i i atua sesē.' O le ā na faia e Esera? Na tootuli Esera i luma o tagata ma tatalo: 'leova e, e tele mea ua e faia mo i matou, ae ua matou agasala iā te oe.' Na salamō tagata, ae sa latou faia pea mea sesē. Na filifilia e Esera toeaina ma faamasino e iloilo nei mataupu. I le tolu masina na sosoo ai, na aveesea ai i latou e le'i tapua'i iā leova.

Ua mavae le 12 tausaga, ma ua mae'a ona toe fausia pā o Ierusalemā. O lea na faapotopoto ai e Esera tagata i le nofoaga faitele, ina ia faitauina atu iā i latou le Tulafono a le Atua. Ina ua tatala e Esera le tusi, ona tūtūla'i lea o tagata. Na vivii Esera iā leova, ma na ioe fo'i i ai tagata ma sisii i luga o latou lima. Ona faitau lea e Esera o le Tulafono ma faamatala atu, ma na faalogologo lelei tagata. Na latou ta'utino atu ua latou toe tuua fo'i leova, ma na latou fetagisi. I le aso na sosoo ai, na toe faitau atu e Esera isi vaega o le Tulafono iā i latou. Na latou iloaina ai e lē o toe umi ona faamanatuina lea o le Tausamiga o Fale Lauvao. O lea na amata ai loa a latou tapenapenaga mo le tausamiga.






A o faagasolo aso e fitu o le tausamiga, na olioli tagata ma faafetai iā leova mo le lelei o fua o le seleselega. E le'i faia faapea se Tausamiga o Fale Lauvao talu mai aso o Iosua. Ina ua mǎe'a le tausamiga, ona faapotopoto lea o tagata ma tatalo: 'leova e, ua e lavea'iina i matou mai i le nofo pologa, fafaga i matou i le toafa, ma aumai lenei laueleele matagofie mo i matou. Ae sa faaauau pea ona matou lē usiusita'i iā te oe. Na e auina mai perofeta e lapata'ia i matou, ae e matou te le'i faalogo. Peita'i sa e onosa'i mai pea. Na e tausia pea lau folafolaga sa faia iā Aperamo. O lea, e matou te ta'utino atu o le a matou usiusita'i iā te oe.' Na latou tusia la latou ta'utinoga, ma na faamaufailogaina e perenise, le 'au sa Levī, ma ositaulaga.

**Fesili:** O ā mea na a'oa'o atu e Esera i tagata Isaraelu sa potopoto i Ierusalemā? O le ā na ta'utino tagata o le a latou faia?

**Esera 7:1-28; 8:21-23, 31, 32; 9:1-10:19;  
Neemia 8:1-18; 9:1-38**

**“Amuia i latou e  
faalogo i le afioga a  
le Atua ma tausī i ai!”  
—Luka 11:28**



## 67 Pā o Ierusalemā

Se'i o tatou toe fo'i i ni nai tausaga ua mavae. Sa iai se auaua a le tupu o Aretaseta e igoa iā Neemia. O ia o se tagata Isaraelu sa nofo i le aai o Peresia o Susana. Na sau le uso o Neemia mai i luta ma se tala lē lelei: 'E lē o saogalemu tagata sa toe fo'i i Ierusalemā. E le'i toe fausia lava pā o le aai na faaleagaina e 'au a Papelonia.' Na lē fiafia Neemia. Na ia mana'o e alu i Ierusalemā e fesoasoani. O lea na ia tatalo ai ina ia faataga o ia e le tupu e alu.

Mulimuli ane, na mātauina e le tupu ua foliga faanoanoa Neemia. Na ia faapea atu: 'O le taimi muamua lea ua ou vaaia ai oe ua e foliga faanoanoa. O le ā le mea ua tupu?' Na tali mai Neemia: 'Aiseā o le a ou lē foliga faanoanoa ai, ina ua faatafunaina lo'u aai o Ierusalemā?' Na fesili atu le tupu: 'O le ā se mea e te mana'o ou te faia mo oe?' Na faia lea e Neemia o se tatalo lē leoa, ona ia faapea atu lea: 'Faamolemole ia tuu mai a'u ou te alu i Ierusalemā e toe fausia ona pā.' Na faataga o ia e le tupu e alu, ma na faamautinoa e le tupu e saogalemu o ia i lana faigāmalaga umi. Na ia tofia fo'i Neemia e aveā ma kovana o luta, ma avatu iā te ia laau e faaaogā mo le fausiaina o le pā o le aai.

Ina ua taunuu Neemia i Ierusalemā, ona ia siakiina lea o pā o le aai. Na ia faapotopoto le 'auositaulaga ma pule, ma fai atu iā i latou: 'Ua matuā leaga le tulaga o loo tatou iai. Ua mana'omia ona amata le galuega.' Na malilie tagata i lea manatu, ma amata loa ona toe fausia pā o le aai.

Ae na iai nisi fili o tagata Isaraelu sa taufaifai iā i latou, ma faapea atu: 'E mafai e se alope ona soloia i lalo le pā o loo outou fausiaina.' E le'i amana'ia e le 'aufaigaluega na taufaifaiga ma faaauau pea ona galulue. Na faasolosolo ina maualuga ma malosi le pā.

Na mafaufau nei fili e sui le itu e ō mai ai ma osofa'ia faafuase'i Ierusalemā. Ina ua faalogo tagata lutaia i lenā fuafuaga, ona latou fefefe ai lea. Ae na faapea atu Neemia: 'Aua tou te fefefe. O loo faatasi leova ma i tatou.' Na tofia e Neemia leoleo e puipuia le 'augalulue, ma e le'i mafai ai e fili ona osofa'ia i latou.




**“O so o se auupega ua  
faia e faasagatau iā te oe  
e lē manuia.”—Isaia 54:17**

E na o le 52 aso, ae mǎe‘a le fausiaina o pǎ o le aai. Na aumaia e Neemia le ‘au sa Levī uma i Ierusalemā mo le faapaiaga o le pǎ. Na ia tofia i latou i ni vaega se lua o tagata pepese. Na latou ō i luga o le pǎ e ui atu i fasitepu i le Faitoto‘a o le Vaipuna, ona savavali faataamilo lea i le aai, e ō le isi vaega i le itu taumatau ae ō le isi vaega i le itu agavale. Na latou iliina pū, tāina sumepalo ma kitara, ma pepese iā leova. Na ō Esera ma le isi vaega, ae ō Neemia ma le isi vaega se‘ia oo ina latou toe feiloa‘i i le malumalu. Na ofoina atu e tagata uma, o tamāloloa, fafine ma tamaiti taulaga iā leova ma fiafia faatasi. Na lagonaina lo latou pepese fiafia mai i nofoaga mamao.

**Fesili:** Aiseā na alu ai Neemia i Ierusalemā?  
O le ā le umi na toe fausia ai pǎ o Ierusalemā?

**Neemia 1:1-11; 2:1-20; 4:1-23; 5:14;  
6:1-19; 12:27-43**





# 11

O loo faamatalaina i lenei vaega Tusitusiga Paia Eleni. Sa ola a'e lesu i se aiga e lē tauloa i se nuu la'itiiti. Na ia galulue ma lona tamā o se kamuta. O lesu o lē o le a lavea'iina le fanau a tagata. Na filifilia o ia e leova e avea ma Tupu o le Malo i le lagi. Pe afai o oe o se matua, ia fesoasoani i lau tama e talisapaia le auala na filifili lelei ai e leova le aiga ma le si'omaga e ola a'e ai lesu. Iloilo auala na puipuia ai e leova lesu mai i le fasiotia e Herota, ma auala e lē mafai ai e se mea po o se tasi ona taofia le faataunuuina o le finagalo o leova. Ia iloilole le auala na tofia ai e leova loane e saunia le ala mo lesu. Faamatilatila auala na faaalina ai e lesu mai lava i lona la'itiiti, lona naunau i le atamai o leova.



## LESONA AUTŪ

- la faamaoni pea i le faatulagaga a leova
- Na lotomalie lesu le Alo malosi o le Atua, e fanau mai i le lalolagi o se pepe
- Na gaoioi ma le lotomaulalo loane le Papatiso e fesoasoani i tagata ina ia nofosauni mo le taunuu mai o le Mesia

## 68 Fanau se Pepe a Elisapeta

Na iai se ositaulaga e igoa iā Sakaria ma lana avā o Elisapeta, na nonofo latalata ane i le aai o Ierusalemā. O le taimi lea ua silia i le 400 tausaga talu ona mǎe’a le toe fausiaina o pā o Ierusalemā. Ua tele tausaga talu ona la faaipoipo ae e le’i iai lava se la fanau. I se tasi aso a o faamū e Sakaria mea manogi i totonu o le Mea Paia o le malumalu, na faaali mai ai iā te ia le agelu o Kaperielu. Na fefe Sakaria ae na faapea mai Kaperielu: ‘Aua e te fefe. Ua ou aumaia se tala lelei mo oe mai iā leova. O le a fanauina e lau avā o Elisapeta se tama tama, ma o le a faaigoa o ia iā loane. Ua tofia e leova loane e faia se galuega faapitoa.’ Na fesili atu Sakaria: ‘E faapefea ona ou iloa e moni lenei mea? Auā ua ou toeaina ma ua loomatua fo’i la’u avā.’ Na tali mai Kaperielu: ‘Ua auina mai a’u e le Atua e faailoa atu lenei tala. Ae talu ai e te lē talitonu iā te a’u, o le a lē mafai ona e tautala se’ia oo i le taimi e fanau mai ai le pepe.’

Sa iai Sakaria i totonu o le malumalu mo se taimi umi nai lo o le umi e masani ai. O lea ina ua sau o ia i fafo mai i le malumalu, na fia iloa e tagata sa faatali atu i fafo le mea na tupu. Peita’i, e na o taga sa mafai ona ia faia. O i inā na iloa ai e tagata na maua e Sakaria se fe’au mai i le Atua.

Mulimuli ane, ona tō lea o Elisapeta ma fanauina ai se tama tama e pei lava ona ta’ua e le agelu. Na asiasi atu ana uō ma ona tauaiga e vāai i le pepe, ma na matuā fialia i latou. Na faapea atu Elisapeta iā i latou: ‘O le a faaigoa o ia iā loane.’ Ae na latou tali mai: ‘E leai se tagata o lou aiga e igoa iā loane. Faaigoa o ia iā Sakaria lona tamā.’ Peita’i na tusi i lalo e Sakaria upu nei: ‘O loane lona igoa.’ O le taimi lava lenā na mafai ai ona toe tautala Sakaria. Ua salalau atu tala e faatatau i le pepe i vaipanoa uma o lutaia, ma ua faapea ane tagata: ‘O le ā le ituaiga o tagata o le a iai lenei tamaitiiti?’

Ona faatumulia lea o Sakaria i le agaga paia, ma na ia



valoia: ‘Ia viia leova. Na ia folafola mai iā Aperaaamo o le a ia auina mai se faaola, le Mesia e lavea’iina i tatou. O le a avea loane ma perofeta, ma o le a ia saunia le ala mo le Mesia.’

Na iai fo’i se mea mata’ina na tupu iā Maria le tauaiga o Elisapeta. Se’i o tatou talanoaina lenā mea i le lesona o loo sosoo mai.

**Fesili:** O le ā na ta’u atu e Kaperielu iā Sakaria? O le ā le galuega faapitoa o le a faia e loane?  
**Mataio 11:7-14; Luka 1:5-25, 57-79; Isaia 40:3; Malaki 3:1**

**“E lē mafaia e tagata lenei mea, ae e mafaia e le Atua mea uma lava.”—Mataio 19:26**



## 69 **Asiasi Atu Kaperielu iā Maria**

Sa iai se tauaiga talavou o Elisapeta e igoa iā Maria. Na nofo o ia i le aai o Nasareta i Kalilaia. Na faamau Maria ma Iosefa le kamuta. Ina ua ono masina le ma'itaga o Elisapeta, ona faaali mai lea o le agelu o Kaperielu iā Maria. Na ia faapea mai: 'Malo lava iā te oe Maria. Ua matuā alofateleina oe e leova.' E le'i malamalama Maria i le uiga o le faamatalaga a Kaperielu. Ona toe faapea mai lea o Kaperielu: 'O le a e tō ma e fanauina mai se tama tama, ma e tatau ona e faaigoa o ia iā Iesu. O le a pule o ia o se Tupu. E tumau e faavavau lona Malo.'

Na tali atu Maria: 'O a'u o se taupou. E faapefea ona ou fanauina se tama?' Na faapea mai Kaperielu: 'E leai se mea e faigatā iā leova. E iā te oe le agaga paia ma o le a e fanauina mai se tama tama. Ua tō fo'i lou tauaiga o Elisapeta e ui ua loomatua o ia.' Ona fai atu lea o Maria: 'O a'u o le teine pologa a leova. Ia faia iā te a'u le mea ua e folafolaina mai.'






**“Ua faia e leova mea uma  
ua ia finagalo i ai e faia  
i le lagi ma le lalolagi.”  
—Salamo 135:6**

Na alu Maria i se aai i luga o atumauga e asiasi iā Elisapeta. Ina ua faafeiloa’i e Maria Elisapeta, ona osooso ai lea o le pepe o loo i le manava o Elisapeta. Ua faatumuina Elisapeta i le agaga paia, o lea na ia faapea atu ai: ‘Maria, ua faamanuia oe e leova. O se faaeaga le iai o le tinā o lo’u Alii i lo’u fale.’ Na tali Maria: ‘Ou te vivii atu iā leova ma lo’u lotoatoa.’ Na nofo Maria iā Elisapeta mo masina e tolu, ona toe fo’i ai lea o ia i lona aiga i Nasareta.

Ina ua iloa e Iosefa ua tō Maria, na mana’o o ia e tatala le la faamau. Peita’i na faaali mai iā te ia se agelu e ala i se miti ma faapea mai: ‘Aua e te fefe e faaipoipo iā te ia. E na te le’i faia se mea sesē.’ O lea, na ave ai loa e Iosefa Maria i lona aiga ma fai ma ana avā.

**Fesili:** O le ā na ta’u atu e Kaperielu iā Maria e uiga i lana tama? O ā ni faalogona o Elisapeta ma Maria e faatatau i mea na tutupu iā i la’ua?

**Mataio 1:18-25; Luka 1:26-56; Isaia 7:14; 9:7; Tanielu 2:44; Kalatia 4:4**



## 70 Faalauiloa e Agelu le Fanau Mai o Iesu

Na faatonuina e Kaisara Aokuso le pule o le emepaea o Roma ia tagata lutaia uma, e toe fo'i i nuu na latou fananau ai mo le tusigāigoa. O lea na malaga ai loa Iosefa ma Maria i Peteleema, le nuu o le aiga o Iosefa. Ua toeitiiti oo i le taimi e fanau ai Maria.

Ina ua la taunuu i Peteleema, e na o le pau le nofoaga sa mafai ona la maua e nonofo ai o le fale o manu. O i inā na fanauina ai e Maria lana tama tama o Iesu. Na ia faapulupulu o ia i 'ie ma faataoto i le mea e tuu ai mea'ai a manu.

E latalata ane i Peteleema, sa nonofo ai i fafo i le pō nisi o leoleo mamoe ma vaavaai a latou lafu. Ona faafuase'i lea ona tū mai se agelu i luma o leoleo mamoe, ma ua pupula faataali'oli'o iā i latou le mamalu o leova. Na fefefe leoleo mamoe, ae na faapea mai le agelu iā i latou: 'Aua tou te fefefe. Ou te faailoa atu iā te outou se tala lelei. O le asō na

**“Ua ou sau mai i le Atua, ma ua ou i inei. Ou te le'i sau i lo'u lava loto, a o la na auina mai a'u.”—Ioane 8:42**



fanau ai le Mesia i Peteleema.’ O le taimi lava lenā na vaaia ai ni agelu se to’atele i le lagi o vivii e faapea: ‘Ia tuu atu le viiga i le Atua o i le lagi, ma le filemu i le lalolagi.’ Ona lē toe vaaia lea o agelu. O ā ni faalogona o leoleo mamoe i le mea na tupu?

Na fetalanoaa’i leoleo mamoe ma faapea ane: ‘Tatou ō loa i Peteleema.’ Na latou faanatinati atu ma maua ai i le fale o manu Iosefa ma Maria, faapea la la’ua pepe faato’ā fanau mai.

Na ofo i latou uma na faalogo i mea na faamatala atu e leoleo mamoe. Na manatunatu loloto Maria i upu a le agelu ma e le’i galo iā te ia. Na toe fo’i leoleo mamoe e vaavaai a latou lafuu, ma faafetaia leova mo mea uma na latou vāai ma faalogo i ai.

**Fesili:** O le ā le auala na faailoa mai ai e agelu le fanau mai o Iesu?  
O ai na maua atu e leoleo mamoe i Peteleema?

Luka 2:1-20; Isaia 9:6



## 71 Na Puipuia e leova Iesu

Sa iai i se nuu i le itu i sasa'e o Isaraelu ni tagata na talitonu e mafai e fetu ona ta'ita'ia i latou. I se tasi pō, na vaaia ai e ni tamāloloa mai i Sasa'e se mea i le lagi e pei o se fetu pupula ma na latou mulimuli i ai. Na ta'ita'ia i latou e lenā "fetu" i Ierusalem. Na latou fesilisili solo i tagata: 'O fea o iai le tamaitiiti lea o le a avea ma tupu o tagata lutaia? Ua matou ō mai e ifo iā te ia.'

Ina ua faalogo Herota le tupu o Ierusalem e faatatau i le tupu fou, ona matuā popole ai lea o ia. Na ia fesili atu i le 'aufaitaulaga sili: 'O fea e fanau ai lenei tupu?' Na latou faapea mai: 'Na fai mai le 'auperofeta o le a fanau o ia i Peteleema.' Ona aami ai lea e Herota o nei tagata mai i Sasa'e ma fai atu iā i latou: 'Ia ō i Peteleema ma sa'ili le tamaitiiti. Ia toe fo'i mai e ta'u mai iā te a'u. Ou te fia alu atu fo'i e ifo iā te ia.' Ae e lē o le mea moni lenā sa mana'o Herota e fai.

Na toe minoi le "fetu" ma na mulimuli atu i ai nei tagata mai i Sasa'e se'ia oo i Peteleema. Na tū tonu le "fetu" i luga a'e o se fale, ma na ō ai loa i totonu nei tamāloloa. Na latou maua ai Iesu ma lona tinā o Maria. Na latou ifo atu i le tamaitiiti ma avatu iā te ia meaalofa o auro, mea manogi, ma muro. Pe e moni na auina atu e leova nei tamāloloa e sa'ili iā Iesu? E leai.

I lenā pō, na fetalai mai ai leova iā Iosefa e ala i se miti: 'O loo mana'o Herota e fasiotia Iesu. Ia e ave lau avā ma lou atalii ma sosola i Aikupito. Ia nonofo ai i inā se'ia ou toe fai atu ua saogalemu mo le toe fo'i mai.' O le taimi lava lenā na ō ai loa Iosefa ma lona aiga i Aikupito.


Na fetalai leova i tamāloloa mai i le itu i Sasa'e, e lē tatau ona latou toe fo'i iā Herota. Ina ua iloa e Herota e lē toe fo'i mai nei tamāloloa, ona matuā ita ai lea o ia. Talu ai e le'i maua e Herota le mea o loo iai Iesu, ona ia faatonuina lea o le fasiotia o tamaiti uma i Peteleema e tutusa le matutua ma Iesu. Peita'i, sa saogalemu Iesu i Aikupito.

Mulimuli ane, ona maliu lea o Herota. Na faapea atu leova iā Iosefa:  
'Ua mafai nei ona e toe fo'i.' Ona toe fo'i ai lea i Isaraelu o Iosefa, Maria  
ma Iesu, ma nonofo i le aai o Nasareta.

**Fesili:** Aiseā sa lamatia ai le ola o Iesu? Na faapefea ona puipuia e leova Iesu?

**Mataio 2:1-23; Mika 5:2**

**“E faapea fo'i la'u upu e  
alu atu mai i lo'u gutu  
. . . , e taulau fo'i e tusa  
ma le mea na ou auina  
atu ai.”—Isaia 55:11**



## 72 A o La'itiiti Iesu

Sa nonofo Iosefa, Maria, Iesu ma isi a la fanau tama ma teine i Nasareta. Na tausia e Iosefa lona aiga e ala i le galue o se kamuta, ma na ia a'oa'oina i latou e faatatau iā leova ma lana Tulafono. Na masani ona o Iosefa ma lona aiga i le sunako e tapua'i ai, ma faimalaga atu fo'i i Ierusalem e faamanatu ai le Paseka i tausaga ta'itasi.

I le 12 o tausaga o Iesu, na alu ai se malaga umi a lo latou aiga i Ierusalem e pei ona masani ai. Na matuā faatumulia le aai i tagata na malaga atu e faamanatu le Paseka. Mulimuli ane, na toe fo'i Iosefa ma Maria ma le manatu o loo latou o faatasi ma Iesu. Ae ina ua la sa'ilia o ia i o la tauaiga, e la te le'i maua o ia.

Na la toe fo'i i Ierusalem, ma sa'ili le la tama mo aso e tolu. Na i'u ina la o atu i le malumalu. O i inā sa maua atu ai Iesu o loo nonofo faatasi ma a'oa'o, ma faalogologo lelei ma fai atu fesili tāua iā i latou. O le ofo tele o nei a'oa'o na latou tuufesili ai iā Iesu, ma na taufaifofo i latou i ana tali. Na latou iloa sa malamalama Iesu i le Tulafono a leova.



Na matuā popole Iosefa ma Maria. Na fesili atu Maria: ‘La’u tama e, ua ma fiu ma lou tamā e su’e oe. O fea sa e iai?’ Na tali mai Iesu: “Pe lua te lē iloa ea e tatau ona ou iai i le fale o lo’u Tamā?”

Na toe fo’i Iesu faatasi ma ona mātua i Nasareta. Na a’oa’oina e Iosefa Iesu i le auāla e faia ai galuega faakamuta. O le ā sou manatu, o le ā le ituaiga o tagata sa iai Iesu a o talavou? A o tuputupu a’e Iesu, na faateleina fo’i lona atamai ma ua alofaina o ia e le Atua atoa ma tagata.

**Fesili:** O fea na maua atu ai e Iosefa ma Maria Iesu?  
Aiseā na iai ai o ia i inā?

**Mataio 13:55, 56; Mareko 6:3; Luka 2:40-52; 4:16; Teuteronome 16:15, 16**

**“Lo’u Atua e, ou te fiafia  
e fai lou finagalo, ua i  
totonu fo’i iā te a’u lau  
tulafono.”—Salamo 40:8**



## 73 Ua Saunia e loane le Ala

Ina ua matua loane le tama a Sakaria ma Elisapeta, na avea o ia o se perofeta. Na faaaogā e leova loane e a’oa’o atu i tagata ua afio mai le Mesia. Ae nai lo o le a’oa’o atu i sunako po o nuu, na tala’i atu loane i le toafa. Na ō mai tagata mai Ierusalemā ma vaipanoa uma o lutaia ina ia faalogologo i a’oa’oga a loane. Na ia a’oa’o atu ina ia faafiafia le finagalo o le Atua, e mana’omia ona tuu mea leaga o loo latou faia. Ina ua uma ona latou faalogologo iā loane, na salamō le to’atele mai i a latou agasala, ma na papatisoina i latou e loane i le vaitafe o Ioritana.

Na ola loane i se olaga faigofie. O ona ofu na fai mai i le fulufulu kamela. O ana mea’ai o sē akerise ma le meli vao. Na fia iloa e tagata po o ai loane. E oo lava i le ‘au Faresaio ma le ‘au Satukaio faamauualuluga na ō atu e vaai o ia. Na faapea atu loane iā i latou: ‘E mana’omia ona suia o outou ala ma ia salamō. Aua ne’i outou manatu e faapitoa outou, ona ua outou fai mai o outou o fanau a Aperaamo. E lē faapea ai o outou o fanau a le Atua.’

Na ō mai le to’atele o tagata iā loane ma fesili atu: ‘O le ā e mana’omia ona fai ina ia faafiafia ai le finagalo o le Atua?’ Na faapea atu loane iā i latou: ‘Pe afai e lua ni ou ofutino, ia avatu le isi ofutino i lē e leai sona ofu.’ Pe e te iloa le māfuaaga na ia fai atu ai lenā tala? Na mana’o loane ina ia iloa e ona soo, e tataua ona latou alolofa i tagata ina ia faafiafia ai le finagalo o le Atua.

Na faapea atu loane i le ‘auaolafoga: ‘Ia outou faamaoni ma aua tou te tāpā se mea e sili atu nai lo o le lafoga ua totogi atu.’ Na ia fai atu i fitafita: ‘Aua tou te taliaina ni faiga faaalatua pe ta’u atu ni talapepelo.’

**“Na sau lenei tagata e molimau, ina ia molimau i le malamalama, ina ia talitonu ituaiga o tagata eseese e ala iā te ia.”—loane 1:7**




Na ō atu fo'i le 'auositulaga ma le 'au sa Levī iā loane ma fesili atu e faapea: 'O ai oe? O loo fia iloa e tagata po o ai oe.' Na tali mai loane: 'O a'u o le leo o lē e alaga i le toafa, lea e ta'ita'ia tagata iā leova e pei ona valoia e Isaia.'

Na matuā fiafia tagata i mea sa a'oa'o atu e loane. Na tuufesili isi po o loane o le Mesia. Ae na ia tali atu: 'E iai se tasi e sili atu iā te a'u o loo mulimuli mai. E lē aogā iā te a'u ona ou tatala i nonoa o ona seevae. Ou te papatiso iā te outou i le vai, ae e na te papatiso iā te outou i le agaga paia.'

**Fesili:** Aiseā na auina atu ai e leova loane i tagata?  
O le ā la latou tali mai i le fe'au na ta'u atu e loane?

**Mataio 3:1-11; Mareko 1:1-8; Luka 3:1-18;**  
**Ioane 1:19-28; Isaia 40:3**





# 12

Na a'oa'oina e lesu tagata e faatatau i le Malo o le lagi. Na ia a'oa'oina fo'i i latou e tatalo ina ia faapaiaina le suafa o le Atua, ia oo mai lona Malo, ma ia faia lona finagalo i le lalolagi. Pe afai o oe o se matua, ia faamatala i lau tama le uiga o lenei tatalo iā i tatou. E le'i faatagaina e lesu Satani e aveesea lona faamaoni. Na filifilia e lesu ona aposetolo, ma o i latou o sui muamua o le Malo. Ia mātāu le maelega o lesu mo le tapua'iga moni. Talu ai na mana'o lesu e fesoasoani i isi, o lea na ia faamālōlō ai ē e mama'i, fafaga ē fia aai, ma toe faatutūina mai ē ua maliliu. E ala i nei vavega uma, ua ia faata'ita'ia mai ai mea o le a faia e le Malo mo le fanau a tagata.



## LESONA AUTŪ

- Na tuuina atu e Iesu i ona soo le galuega o le tala'i atu e faatatau i le Malo ma fai isi ma soo
- Tatalo i mataupu e faatatau ia leova a o e le'i tatalo mo ou mana'oga
- la faamagalō ma le lotoatoa, ma feutaga'i ma isi i le auala e te mana'o e latou te feutaga'i ai ma oe

## 74 Avea lesu ma Mesia

Na tala'i e loane: 'E iai lē e sili atu nai lo o a'u o loo mulimuli mai.' I le pe tusa ma le 30 tausaga o lesu, na ia sau ai mai i Kalilaia e alu atu i le vaiata o loritana lea sa papatisoina ai e loane tagata. Na mana'o lesu e papatiso o ia e loane, ae na faapea atu loane: 'E lē tatau ona ou papatisoina oe. O oe e tatau ona papatisoina a'u.' Na faapea atu lesu iā loane: 'E finagalo leova e te papatisoina a'u.' Ona la o ai lea i le vaiata o loritana, lea na faatofu ai e loane lesu i le vai se'ia oo ina lilofia lona tino atoa i le vai.

Ina ua alu a'e lesu mai i le vai, ona ia tatalo lea. O le taimi lenā na matala ai le lagi ma alu ifo ai i ona luga le agaga o le Atua e pei o se lupe. Ona faapea mai lea o leova mai i le lagi: "O lo'u Atalii pele oe, ua malie lo'u loto iā te oe."

Ina ua alu ifo le agaga o leova i luga o lesu, ona avea ai lea o ia ma Keriso po o le Mesia. O lea, o le a amata nei ona ia faia le galuega na auina mai o ia e leova e fai i le lalolagi.

O le taimi lava na uma ai le papatisoga o lesu, ona alu lea o ia i le toafa ma nofo ai mo aso e 40. Ina ua toe fo'i mai o ia, ona ia alu atu lea iā loane. A o savali atu lesu iā te ia, na faapea mai loane: "O le Tama'i Mamoe a le Atua, o lē e na te aveeseina le agasala a le lalolagi!" O lenei faamatalaga, ua faailoa atu ai e loane i tagata o lesu o le Mesia. Pe e te iloa le mea na tupu iā lesu a o iai i le toafa? Se'i o tatou vaai.

**Fesili:** Aiseā na papatiso ai lesu?

Aiseā na faapea mai ai loane o lesu o le Tama'i Mamoe a le Atua?

**Mataio 3:13-17; Mareko 1:9-11; Luka 3:21-23; loane 1:29-34;**

Isaia 42:1; Eperu 10:7-9

**“Ona oo mai lea o le  
si’ufofoga mai i le lagi ua  
faapea mai: ‘O lo’u Atalii  
pele oe, ua malie lo’u loto ia  
te oe.’”—Mareko 1:11**



## 75 Tofotofoina e le Tiapolo Iesu

Ina ua uma ona papatisoina Iesu, ona ta'ita'ia lea o ia e le agaga paia i le toafa. E le'i 'ai o ia mo aso e 40, o lea na ia lagona ai le fia taumafa. Ona sau ai lea o le Tiapolo e faaosooso Iesu ma fai mai iā te ia: 'Pe afai o oe moni o le Atalii o le Atua, inā fetalai atu ia i nei maa ia liu falaoa.' Ae na tali atu Iesu e ala i le

sii atu o Tusitusiga Paia: 'Ua tusia e lē na o mea'ai e ola ai le tagata. E mana'omia ona e usiusita'i i upu uma e fetalai mai ai leova.'

Ona toe tofotofoina lea e le Tiapolo o Iesu e ala i le faapea mai: 'Pe afai o oe moni o le Atalii o le Atua, inā oso ia i lalo mai i lenei vaega maualuga o le malumalu. Ua tusia o le a auina mai e le Atua ana agelu e lavea'i iā te oe.' Ae na toe sii atu fo'i e Iesu Tusitusiga Paia: 'Ua tusia aua e te faia se mea e tofotofo ai iā leova.'


Ona faaali lea e Satani iā Iesu o malo uma o le lalolagi, o o latou 'oa ma o latou mamalu ma faapea mai: 'Ou te avatua iā te oe nei malo uma ma o latou mamalu, pe afai e tau lava ina e tapua'i mai iā te a'u.' Ae na tali atu Iesu: 'Alu ese ia oe Satani! Ua tusia e na o leova lava e tataua ona e tapua'i i ai.'

Ona alu ese ai lea o le Tiapolo, ma ua ō mai agelu ma avatu iā Iesu mea'ai e 'ai ai. Talu mai lenā taimi, na tala'i atu e Iesu le tala lelei o le Malo. O le galuega lea sa auina mai o ia i le lalolagi e fai. Na fiafia tagata i mea sa a'oa'o atu e Iesu iā i latou, ma na latou mulimuli iā te ia i so o se mea lava na alu i ai.

**Fesili:** O ā tofotofoga e tolu na faia e le Tiapolo? O le ā le tali atu a Iesu i le Tiapolo?

**Mataio 4:1-11; Mareko 1:12, 13; Luka 4:1-15;**  
Teuteronome 6:13, 16; 8:3; Iakopo 4:7





“Pe a tautala [le Tiapolo] i tala pepelo, e tautala o ia e tusa ma lona lava manatu, auā o ia o sē e pepelo ma le tamā o le pepelo.”  
—Ioane 8:44

## 76 Faamamā e Iesu le Malumalu

Atonu i le masina o Aperila i le 30 T.A., na alu atu ai Iesu i Ierusalem. E to'atele tagata na ō atu i le aai mo le Paseka. O se tasi o mea na faia i le Paseka, o le faaogā lea o manu e fai ai taulaga i le malumalu. Na ō mai isi tagata ma a latou lava manu e osi ai taulaga, ae o isi na faatau a latou manu i Ierusalem.

Ina ua alu atu Iesu i le malumalu, na ia vaaia ai tagata o loo faatau a latou manu i inā. Sa latou faia nei fefaataua'iga e maua ai a latou tupe i totonu o le fale tapua'i o leova. O le ā le auala na tali atu ai Iesu? Na ia faia se sasa i maea ma tutuli ese mamoe ma povi mai i le malumalu. Na ia sasaa tupe a tagata suitupe ma fuli a latou laulau.





Na ia faapea atu i ē e faatau lupe: “Aveese ia nei mea mai i inei! Aua ne’i toe faia le fale o lo’u Tamā ma fale faatau’oa!”


Na maofa tagata sa iai i le malumalu i le gaoioiga sa faia e Iesu. Na manatua ai e ona soo le valoaga e faatatau i le Mesia: ‘Ua tumu a’u i le maelega i le fale o leova.’

Mulimuli ane i le 33 T.A., na toe faamamā ai e Iesu le malumalu. E na te le’i faatagaina so o se tasi e faaalua le lē faaloalo mo le fale o lona Tamā.

**Fesili:** O le ā na faia e Iesu ina ua vaai atu o faatau e tagata manu i le malumalu? Aiseā na faia ai e Iesu lea gaoioiga?

**Mataio 21:12, 13; Mareko 11:15-17; Luka 19:45, 46; Ioane 2:13-17; Salamo 69:9**

“E lē mafai ona e pologa  
i le Atua atoa ma ‘Oa.”  
—Luka 16:13



## 77 Le Fafine i le Vaipuna

Ina ua mavae sina taimi talu ona uma le Paseka, na toe fo’i ai Iesu ma ona soo i Kalilaia e ui atu i Samaria. E latalata i le aai o Sukara, na mālōlō ai Iesu i se nofoaga e ta’ua o le vaipuna o lakopo. A o mālōlō o ia, na ō ona soo i le aai e faatau mai ni mea’ai.

Na alu atu se fafine i le vaipuna e asu mai ni vai. Na faapea atu Iesu iā te ia: “Aumai sina vai se’i o’u inu ai.” Na tali mai le fafine: ‘Aiseā ua e talanoa mai ai iā te a’u? O a’u o se fafine Samaria. E lē talanoa tagata lutaia ma tagata Samaria.’ Na faapea atu Iesu: ‘Ana e iloa a’u, semanū ua e ōle mai mo se vai ona ou avatu ai lea iā te oe o le vai o le ola.’ Na fesili le fafine: ‘O le ā le uiga o lau faamatalaga? E leai sau pakete.’ Na tali atu Iesu: ‘O i latou uma e feinu i le vai ou te foa’iina atu, e lē toe fia inu lava o ia.’ Na faapea mai le fafine: “Lau susuga e, aumai ia iā te a’u lenā vai.”

**“Inā sau ia!’ Ia sau fo’i so o se tasi e fia inu; ma o so o se tasi e mana’o i ai, ia ave fua le vai o le ola.”—Faaliga 22:17**

Ona faapea atu lea o Iesu iā te ia: ‘Ia alu e aumai lau tane.’ Na tali mai le fafine: “E leai sa’u tane.” Na fai atu Iesu: ‘Ua sa’o lau tali. Auā e to’alima au tane sa iai, ma o le tamāloa o loo lua nonofo nei, e lē o sau tane.’ Na faapea mai le fafine: ‘Ua ou iloa o oe o se perofeta. E talitonu o’u tagata e mafai ona tapua’i i le Atua i lenei mauga, ae na faapea mai tagata lutaia e na o Ierusalema e mafai ona matou tapua’i ai. Ou te talitonu pe a maliu mai le Mesia, o le a ia a’oa’o i matou i le auala e tapua’i ai.’ Ona faailoa atu lea e Iesu o se mea e na te le’i ta’uina lava i se tasi: ‘O a’u o le Mesia.’

Na alu atu faavave le fafine i




Iona aai ma faapea atu i tagata Samaria: 'Ou te talitonu ua ou maua le Mesia. E na te iloa mea uma e faatatau iā te a'u. Ō mai e vaai iā te ia.' Ona latou mulimuli atu lea i le fafine se'ia oo i le vaipuna, ma faalogologo ai a o a'oa'o mai Iesu.

Na valaaulia e tagata Samaria Iesu ina ia nofo i lo latou aai. E lua aso na a'oa'o ai Iesu i inā, ma e to'atele tagata na faatuatua iā te ia. Na latou fai atu i le fafine Samaria: 'Ua matou faalogo i lenei tagata, ma ua matou iloa ai o ia moni lava o le faaola o le lalolagi.'

**Fesili:** Aiseā na faate'ia ai le fafine Samaria ina ua talanoa atu Iesu iā te ia? O le ā na faailoa atu e Iesu iā te ia?

**Ioane 4:1-42**



## 78 Tala'i Atu e Iesu le Fe'au o le Malo

E le'i umi talu ona mae'a le papatisoga o Iesu, ae amata loa ona ia tala'i atu: 'Ua latalata mai le malo o le Atua.' A o ia femalagaa'i solo i Kalilaia ma lutaia, na mulimuli atu ona soo ia te ia. Ina ua ia toe fo'i i lona nuu o Nasareta, ona ia alu atu lea i le sunako, ua tatala le tusi ta'ai a Isaia ma faitau leotele: 'Ua foa'i mai e leova le agaga paia ina ia mafai ai ona ou tala'i atu le tala lelei.' O le a le uiga o lena mea? O lona uiga, e ui lava sa fia v'ai tagata o faia e Iesu vavega, ae o le mafuaaga autu na ia maua ai le agaga paia, ina ia mafai ai ona ia tala'i atu le tala lelei. Ona ia faapea atu lea i lana 'aufaalogologo: 'Ua faataunuuina i le aso lena valoaga.'

Ona sosoo ai lea ma le alu atu o Iesu i le sami o Kalilaia, lea na ia feiloa'i ai i ona soo e to'afā o ni tagata faifaiva. Na valaaulia i latou e Iesu: 'Inā mulimuli mai ia ia te a'u, ou te faia outou ma faifaiva i tagata.' O i latou nei e aofia ai Peteru, Aneterea, Iakopo ma Ioane. O le taimi lava lena na latou tuua ai a latou upega ae mulimuli atu ia Iesu. Na latou tala'i i Kalilaia atoa e faatatau i le Malo o leova. Na latou tala'i i sunako, maketi ma luga o auala. O so o se mea lava na latou o i ai, na mulimuli atu ia i latou se motu o tagata e to'atele. Na salalau solo tala e uiga ia Iesu, ma na oo atu lava i Suria.

A o faagasolo taimi, na tuuina atu e Iesu i nisi o ona soo le mana e faamālōlō ai tagata ma tutuliese ai temoni. Na o faatasi Iesu ma isi a o ia tala'i mai i lea aai i lea aai, ma lea nuu i lea nuu. Na tausia Iesu ma ona soo e le to'atele o fafine faamaoni e aofia ai Maria le Makatala, Ioana, Susana ma isi fafine.

Ina ua mae'a ona toleniina e Iesu ona soo, ona ia auina atu lea o i latou e tala'i. A o latou femalagaa'i i Kalilaia, e to'atele isi tagata na avea ma soo ma papatisoina. O le to'atele o i latou na manana'o e avea ma soo, na faatusaina ai i latou e Iesu i se fanua ua matua mo le seleselega. Na fetalai Iesu: 'Ia tatalo ia leova e auina mai nisi 'aufaigaluega e faia le galuega o le seleselega.' Mulimuli ane, na filifilia e Iesu le to'a 70 o ona soo ma auina atu i latou ta'ito'alua e



**“E tatau ona ou folafola atu le tala lelei o le malo o le Atua i isi fo’i aai, auā o le mea lea na auina mai ai a’u.”—Luka 4:43**

tala’i i lutaia atoa. Na latou a’oa’o atu i so o se tagata e faatatau i le Malo. Ina ua toe fo’i mai nei soo, sa latou naunau e faamatala atu iā Iesu mea na tutupu. E le’i mafai e le Tiapolo ona taofia le galuega tala’i.

Sa faamautinoa e Iesu e faaaauau pea ona faia e ona soo lenei galuega tāua pe a ia toe fo’i i le lagi. Na faapea atu Iesu iā i latou: ‘Ia tala’i le tala lelei i le lalolagi atoa. Ia a’oa’o tagata e faatatau i le Afioga a le Atua ma papatiso i latou.’

**Fesili:** O le ā le galuega na tuuina atu e Iesu i ona soo e fai?  
O ā lagona o le ‘ausoo e faatatau i la latou galuega?

**Mataio 4:17-25; 9:35-38; 28:19, 20;**  
**Mareko 1:14-20; Luka 4:14-21; 8:1-3; 10:1-22**



## 79 Faia e Iesu Vavega e Tele

Na afio mai Iesu i le lalolagi e faalauiloa le tala lelei o le Malo o le Atua. Ina ia faailoa mai mea o le a faia e Iesu pe a avea ma Tupu, na foa'i mai ai e leova iā te ia le agaga paia ina ia mafai ai ona ia faia vavega. Na mafai ona ia faamālōlō so o se ma'i. O so o se mea lava na alu i ai Iesu, na ō atu tagata mama'i iā te ia mo le fesoasoani, ma na ia faamālōlōina i latou uma. Na toe pupula ē tauaso, toe faalogo ē tutuli, toe savavali ē pipili, ma tuusa'oloto i latou sa pulea e temoni. E tusa pe na o le pa'i atu lava i le pito o lona ofu, sa faamālōlōina ai lava i latou. Na mulimuli tagata i so o se mea lava na alu i ai Iesu. E oo fo'i i taimi sa mana'o ai Iesu e iai na o ia, e na te le'i tutuliese tagata.

I se tasi taimi, na avatu ai e tagata i le fale o loo nofo ai Iesu se tamāloa ua pē lona tino. Ae o le to'atele o tagata i totonu o le fale, na lē mafai ai ona latou ō i totonu. O lea na latou faapū ai le fa'alo o le fale, ma tuutuu ifo ai i lalo iā Iesu le moega o loo taoto ai le tamāloa. Ona faapea atu lea o Iesu iā te ia: 'Ia tū i luga ma savali.' Na maofa tagata ina ua faia faapea e le tamāloa.

I le isi taimi, ina ua alu Iesu i se tasi nuu, na tutū mamao mai tamāloloa

**'Na faauuina e le Atua o ia i le agaga paia ma le mana. Na ia maliu atu i le nuu ma faia galuega lelei, ma faamālōlōina i latou uma sa mafatia ona o le Tiapolo; auā sa faatasi le Atua ma ia.'**  
—Galuega 10:38

lepela e to'asefulu ma valaau mai: 'Iesu, fesoasoani mai iā i matou.' I na aso, e lē faatagaina tagata lepela e faalatalata atu i isi tagata. Na faatonuina e Iesu tamāloloa lepela e to'asefulu ina ia ō i le malumalu. E pei ona faatonuina i le Tulafono a leova, o le mea lea e tatau ona faia e tagata lepela pe a mǎe'a ona faamālōlōina i latou. A o latou aga'i atu i le malumalu, na faamālōlōina i latou. Ina ua iloa e se tasi o lepela ua



faamālōlōina o ia, ona toe fo’i mai lea o ia iā Iesu e faafetai i ai ma viia le Atua. E mai i tamāloloa lepela e to’asefulu, e na o le to’atasi le tamāloa na faafetai iā Iesu.

Na iai se fafine na maua i se ma’i mo le 12 tausaga, ma na matuā naunau lava ina ia faamālōlōina o ia. Ua sau o ia i tua o Iesu faatasi ma le motu o tagata, ma pa’i atu i le pito o lona ofu tele. O le taimi lava lenā na faamālōlōina ai o ia. Ina ua tupu lenā mea, na fesili Iesu: “O ai na pa’i mai iā te a’u?” Na fefe le fafine, ae na alu atu pea ma faamatala atu iā Iesu le mea na tupu. Na faamāfanafanaina o ia e Iesu e ala i le fai atu: ‘Lo’u afafine e, alu ia ma le filemu.’

Na talosaga atu iā Iesu se alii pule e igoa iā Iairo: ‘Maliu mai i lo’u fale. Ua matuā ma’i tigāina lo’u afafine.’ Peita’i, na maliu le teineitiiti a o le’i taunuu atu Iesu i le fale o Iairo. Ina ua taunuu atu Iesu, na ia vaaia ai tagata e to’atele o loo faavauvau faatasi ma le aiga. Na faapea atu Iesu iā i latou: ‘Aua tou te fetagisi, o loo moe le teine.’ Ona tago atu lea o Iesu i le lima o le teineitiiti ma faapea atu: “Le tama’ita’i e, inā tū ia i luga!” Ona tū ai lea o ia i luga, ma ua fai atu Iesu i ona mātua e avatu se mea’ai mo ia. Se’i mafaufau i faalogona o mātua o le teineitiiti i lenā taimi!

**Fesili:** Aiseā na mafai ai e Iesu ona faamālōlōina ma’i uma?

O le ā na tupu i le afafine o Iairo?

**Mataio 9:18-26; 14:36; Mareko 2:1-12; 5:21-43; 6:55, 56; Luka 6:19; 8:41-56; 17:11-19**

## 80 Filifilia e Iesu Aposetolo e To'asefulu Lua

Pe tusa o le tausaga ma le 'afa talu ona tala'i Iesu, ae mana'omia loa ona ia faia se filifiliga tāua. O ai o le a filifilia e Iesu e latou te galulue vavalalata? O ai o le a ia toleniina e ta'imua i le faapotopotoga Kerisiano? Ina ia faia nei filifiliga, sa mana'omia e Iesu le ta'ita'iga a leova. O lea na ia alu ai na o ia i se mauga, ma tatalo i le pō atoa. I le taeao o le aso na sosoo ai, na ia valaauina ai nisi o ona soo e faapotopoto faatasi ma filifili ai ona aposetolo e to'a 12. O ai ni igoa e te manatuaina? O o latou igoa o Peteru, Aneterea, Iakopo, Ioane, Filipo, Patolomaio, Toma, Mataio, Iakopo le atalii o Alefaio, Tataio, Simona, ma Iuta le Sekara.

O le a faimalaga leni to'asefulu lua faatasi ma Iesu. Ina ua mae'a ona toleniina i latou e Iesu, ona ia auina atu lea o i latou e tala'i na o i latou. Na foa'i atu e leova iā i latou le mana e tutuliese ai temoni, ma faamālōlō tagata mama'i.

Na ta'ua e Iesu le to'asefulu lua o ana uō, ma na ia maufaatuatuaina i latou. Na manatu le 'au Faresaio i le

Aneterea



Peteru



Iakopo



Ioane



Filipo





‘auaposetolo, o ni ē e le’i lava ni a’oa’oga ma e faatauva. Ae na toleniina i latou e lesu mo la latou galuega. O le a latou faatasi ma lesu i taimi e sili ona tāua o lona olaga, e pei o le taimi ae e le’i oo i lona maliu ma pe a mavae lona toetū. E pei o lesu, e toetoe o i latou uma mai i lenā to’asefulu lua e mai i Kalilaia. O nisi o i latou ua faaipoipo.

O le ‘auaposetolo o ni tagata e lē lelei atoatoa ma na latou faia mea sesē. O nisi taimi na latou faia ai ni faamatalaga e aunoa ma le mafaufau muamua, ma faia filifiliga lē lelei. E iai taimi na latou lē onosa’i ai. Na latou finau fo’i po o ai e sili. Peita’i, o i latou o ni tagata lelei o ē alolofa iā leova. O le a avea i latou ma faavae o le faapotopotoga Kerisiano pe a mavae atu lesu.

**Fesili:** O ai na filifilia e lesu e avea ma ona aposetolo e to’a 12?  
O le ā le galuega na auina atu e lesu ona aposetolo e fai?

**Mataio 10:1-10; Mareko 3:13-19; 10:35-40; Luka 6:12-16; Ioane 15:15; 20:24, 25;**  
Galuega 2:7; 4:13; 1 Korinito 9:5; Efeso 2:20-22

**“Ua ou ta’ua outou o uō, auā ua ou faailoa atu iā te outou mea uma na ou faalogo ai i lo’u Tamā.”—Ioane 15:15**

Simona



Tataio



Patolomaio



Toma

Iuta le Sekara



Mataio



Iakopo le atalii o Alefaio



## 81 Le Lauga i Luga o le Mauga

Ina ua mǎe'a ona filifilia e lesu ona aposetolo e to'a 12, ona ia sau lea i lalo mai i le mauga ma alu atu i se nofoaga sa faapotopoto ai se motu o tagata e to'atele. Na o mai tagata mai i Kalilaia, lutaia, Turo, Saitonu, Suria, ma le isi itu o Ioritana. Na latou aumaia tagata sa mafatia i faama'i, ma o nisi sa faapuapuagatia e temoni. Na faamālōlō e lesu i latou uma. Ona nofo ai lea o ia i luga o le mauga ma amata lana lauga. Na ia faamatala le mea e tatau ona tatou faia, pe afai e tatou te manana'o e avea ma uō a le Atua. E tatau ona tatou iloa e tatou te mana'omia leova, ma a'oa'oina ina ia alolofa iā te ia. Ae e lē mafai ona tatou alolofa i le Atua pe afai e tatou te lē alolofa i isi tagata. E tatau ona tatou agalelei ma feutaga'i i se auala tonu ma tagata uma, e oo lava i o tatou fili.

Na fetalai lesu: 'E lē lava le alofa tau lava o au uō. E tatau fo'i ona e alofa i ou fili ma faamagalo mai i le loto. Pe afai e lē o fiafia se tasi iā te oe, ia alu atu iā te ia i le taimi lava lenā ma faatoese i ai.



la feutaga'i ma isi i le auala e te mana'o e latou te feutaga'i ai ma oe.'

Na avatu fo'i e Iesu le fautuaga aogā e faatatau i meafaitino. Na ia fetalai: 'E sili atu ona tāua le avea ma uō a leova nai lo o le maua o le tele o tupe. E mafai e le tagata gaioi ona aveesea au tupe, ae e lē mafai e se tasi ona aveesea le lua faauōga ma leova. Aua e te toe popole i mea e te 'ai ai, inu ai, ma ofu ai. Ia vaavaai i manufelegei. E faamautinoa e le Atua e lava a latou mea'ai i taimi uma. E lē mafai e le popole ona toe faapoo ai nisi aso o lou ola. Ia manatua, e silafia e leova mea e te mana'omia.'

E le'i faalogo muamua le motu o tagata i se tasi o a'oa'o atu e pei o Iesu. E le'i a'oa'oina i latou i nei mea e ta'ita'i lotu, e pei o le 'au Faresaio ma le 'autusiupu. Aiseā na avea ai Iesu ma faia'oga sili? Talu ai o mea uma na ia a'oa'o atu e mai iā leova.

**Fesili:** O le ā e tatau ona tatou faia ina ia avea ai ma uō a leova? O le ā le auala e finagalo leova e te feutaga'i ai ma isi?

**Mataio 4:24–5:48; 6:19–34; 7:28, 29; Luka 6:17–31**

**“Ia outou amoina la'u amo ma faaa'oa'o mai iā te a'u, auā o a'u o lē e agamalu ma lotomaulalo, ona faafouina ai lea o outou.”  
—Mataio 11:29**



## 82 A'oa'oa e Iesu Ona Soo i le Auala e Tatalo Ai

O mea uma sa faia e le 'au Faresaio, sa faia ina ia faafofo ai tagata. Pe afai e latou te faia se gaoioiga agalelei, sa faia ina ia iloa atu e isi tagata. Sa latou tatalo i nofoaga faitele ina ia iloa atu i latou e tagata uma. Na latou a'o faatauloto tatalo uumi ma faia i totonu o sunako ma magāala, ina ia lagona atu e isi tagata. O lea, na faate'ia tagata ina ua faapea atu Iesu iā i latou: 'Pe a outou tatalo, aua ne'i pei outou o le 'au Faresaio. E latou te manatu o le a faafogaina i latou e le Atua ona o le tele o upu o a latou tatalo, ae e lē o le tulaga lenā. O le tatalo o le va lea o oe ma leova. Aua le tausisi i upu masani. E finagalo leova ia e ta'u atu iā te ia mea o loo i lou loto.

'Ia faapea ona outou tatalo: "Lo matou Tamā e o i le lagi, ia faapaiaina lou suafa. Ia oo mai lou malo. Ia faia lou finagalo i le



lalolagi, e pei ona faia i le lagi.” Na fetalai atu fo’i Iesu, e ao ona tatalo mo a latou mea’ai mo le aso, ia faamagalō a latou agasala, ma isi mataupu e patino iā i latou.

Na fetalai Iesu: ‘Ia tatalo atu pea. Ia talosaga atu pea i lo outou Tamā o leova mo mea lelei. O so o se matua lava e mana’o e avatu mea lelei mo lana tama. Pe a talosaga atu lou atalii iā te oe mo se falaoa, po o le a e avatu iā te ia se maa? Pe a talosaga atu mo se i’a, po o le a e avatu iā te ia se gata?’

Ona faamatala atu lea e Iesu o le lesona: ‘Pe afai e tou te iloa avatu meaalofo lelei mo a outou fanau, pe e lē sili atu la ona foa’i mai e lo outou Tamā o leova le agaga paia iā te outou? E pau le mea e mana’omia ona e faia o le talosaga atu.’ Po o e usita’ia le fautuaga a Iesu? O ā mea e te ta’ua i au tatalo?

**Fesili:** O ā fetalaiga a Iesu i ona soo i le auala e tatalo ai?  
Pe e te tatalo e faatatau i mea e tāua iā te oe?

**Mataio 6:2-18; 7:7-11; Luka 11:13**

**“Ia talosaga atu pea, ona foa’iina mai ai lea iā te outou. Ia sa’ili atu pea, ona outou maua ai lea. Ia tu’itu’i atu pea ona tatalaina mai ai lea iā te outou.”  
—Mataio 7:7**



## 83 Fafaga e Iesu le Faitau Afe

A o lata i le taimi e amata ai le Paseka i le 32 T.A., na toe fo'i ane ai le 'auaposestolo mai i la latou tala'iga. Sa lē lavavā i latou. O lea na ave ai i latou e Iesu i se vaa e aga'i i Petesaita, ina ia mafai ai ona latou mālōlō. Ae ina ua lata le vaa i le matafaga, na iloa atu ai e Iesu le faitau afe o tagata na mulimuli atu iā i latou. E ui lava na mana'o Iesu e iai na o ia ma ona aposestolo, ae na ia faafeiloa'ia ma le agalelei tagata. Na ia faamālōlō o latou tagata mama'i, ma amata ona a'oa'o atu iā i latou. Na a'oa'o atu e Iesu iā i latou le Malo o le Atua i le aso atoa. Ina ua oo i le afiafi, na ō atu ona aposestolo iā te ia ma faapea atu: 'E mautinoa ua fia aai tagata. Ia tuu atu i latou e ō ina ia faatau mai ni a latou mea'ai.'

Na faapea atu Iesu: 'E lē tatau ona ō i latou, ae ia avatu iā i latou ni mea'ai e aai ai iinei.' Na fesili le 'auaposestolo: 'Pe e te mana'o e matou te ō ma faatau mai ni falaoa mo i latou?' Na faapea mai Filipo o se tasi o le 'auaposestolo: 'E tusa pe e tele ni a matou tupe, ae e lē lava e faatau mai ai ni falaoa e fafaga ai lenei motu o tagata.'

Na fesili atu Iesu: 'O le ā le tele o mea'ai o loo iai?' Na tali mai Aneterea: 'E na o falaoa e lima ma tama'i i'a e lua. E lē taitai lava na mea'ai.' Na faapea atu Iesu: 'Aumai falaoa ma i'a iā te a'u.' Na ia fetalai atu i tagata ina ia nonofo i luga o le vao ma faapotopoto i vaega e ta'i 50 ma ta'i 100. Ona tago lea o Iesu i falaoa ma i'a, ua tepa a'e i le



lagi ma faafetai. Na ia tuu atu mea'ai i ona aposetolo, ma na latou tufatufaina atu i tagata. Ua aai ma ua maona tagata uma, o tane e to'a 5,000 faatasi ai ma fafine ma tamaiti. Ina ua uma, ona faaputu lea e le 'auaposetolo o mea na totoe ina ia aua ne'i ma'imaui se mea'ai. Sa tutumu ato e sefulu lua. E ese le ofoofogia o lenei vavega, a ea?

O le ofo tele o tagata, na latou manana'o ai e fai lesu ma o latou tupu. Ae na silafia e lesu e le'i oo i le taimi e tofia ai o ia e leova e avea ma tupu. O lea na ia auina ese atu ai le motu o tagata, ma faatonu ona aposetolo e o'i le isi itu o le sami o Kalilaia. Na latou o'i le vaa, ma na alu na o lesu i luga o le mauga. Aisea? Talu ai sa ia mana'o i se taimi paganoa e tatalo atu ai i lona Tamā. Po o le ā lava le pisi o lesu, ae sa ia faaavanoa le taimi e tatalo ai.

**Fesili:** Na faapefea ona faaalua e lesu sa ia naunau moni i tagata?  
O le ā e tatou te a'oa'oina mai ai e faatatau iā leova?

**Mataio 14:14-22; Luka 9:10-17; Ioane 6:1-15**

**“Aua tou te galulue mo mea'ai e pala, a o le mea'ai e tumau ai i le ola e faavavau, lea e tuuina atu e le Atalii o le tagata iā te outou.”  
—Ioane 6:27**



## 84 Savali Iesu i Luga o le Vai

E lē gata sa mafai e Iesu ona faamālōlō ē mama’i ma toe faatutū ē ua maliliu, ae sa mafai fo’i ona ia faatonutonu le matagi ma le timu. Ina ua mǎe’a ona tatalo Iesu i luga o se mauga, na ia vaai atu ai i lalo i le sami o Kalilaia ma iloa ai se matagi o loo agi malosi. Sa i totonu o le vaa ona aposetolo, ma o loo taumafai malosi e alo lo latou vaa a o agi malosi le matagi. Na alu ifo Iesu mai i le mauga ma amata ona savali i luga o le sami aga’i i le vaa. Ina ua iloa atu e le ‘auaposeologo o loo savali mai se tasi i luga o le vai, ona latou fefefe ai lea. Peita’i na faapea atu Iesu iā i latou: ‘O a’u lenei. Aua tou te fefefe.’

Na tali atu Peteru: “Le Alii e, afai o oe, ia e fai mai iā te a’u ou te alu atu iā te oe.” Na faapea atu Iesu iā Peteru: “Inā sau ia!” O lea a o agi malosi le matagi, na oso ese ai Peteru mai i le vaa ma savali atu iā Iesu i luga o le vai. Ae a o latalata atu o ia iā Iesu, na ia vaai atu i le matagi ma fefe ai. Na ia lagona ua amata ona magoto ifo. Na alaga atu Peteru: “Le Alii e, ta fia ola!” Ona faaloaloa atu lea e Iesu o lona aao ma taofi iā te ia ma faapea atu: ‘Aiseā ua e masalosalo ai? O fea lou faatuatua?’

Ua ō atu Iesu ma Peteru i le vaa, ma o le taimi lava lenā na uma ai le matagi. Se’i mafaufau i faalogona o le ‘auaposeologo i lenā taimi. Na latou faapea atu: “E moni o oe lava o le Alo o le Atua.”


E lē na o le pau lea o le taimi na faatonutonu ai e Iesu le tau. I se isi taimi, a o folau atu Iesu ma le ‘auaposeologo i le isi itu o le sami, na alu ai Iesu ma tofā i le taumuli o le vaa. A o moe o ia, na agi malosi mai se matagi. Na fafati mai galu i le vaa, ma ua amata ona tumu le vaa i vai. Na fafagu e le ‘auaposeologo Iesu ma alalaga: ‘Le A’oa’o e, o le a matou feiti. Ia fesoasoani mai!’ Ona nofo lea i luga o Iesu ma fetalai atu i le sami: “Ia malū!” O le taimi lava lenā na to’a ai le matagi ma malū ai le sami. Na fesili atu Iesu i le ‘auaposeologo: ‘O fea ea lo outou faatuatua?’ Ua faapea ane le tasi i le isi: “E oo lava i le matagi ma le vai, ua usiusita’i iā te ia.” O lenā mea na a’oa’oina ai e le ‘auaposeologo, pe afai e latou te maufaatuatua ina atoatoa Iesu, e lē mana’omia la ona latou fefefe i so o se mea.



Fesili: Aiseā na amata ai ona magoto ifo Peteru?  
O le ā na a'oa'oina e le 'auaposeolo mai iā Iesu?

Mataio 8:23-27; 14:23-34; Mareko 4:35-41; 6:45-52; Luka 8:22-25;  
Ioane 6:16-21

**“Pe ana ou lē faatuatua i le vaai  
atu i le lelei o leova i le nuu o  
tagata ola, semanū ua leai so’u  
faamoemoe!”—Salamo 27:13**



## 85 Faamālōlō e Iesu Tagata i le Sapati

Na matuā feita le ‘au Faresaio iā Iesu, ma taumafai e sa’ili se māfuaaga e pu’e ai o ia. Na latou faapea atu e lē tatau ona ia faamālōlōina tagata mama’i i le Sapati. I se tasi aso Sapati, na maua atu ai e Iesu se tamāloa ‘aisi i le auala. Na ia faapea atu i ona soo: ‘Se’i vāai i le auala o le a fesoasoani ai le mana o le Atua i lenei tamāloa.’ Na palu e Iesu le palapala i ona fāua, ona ia nini ai lea o mata o le tamāloa. Na fai atu Iesu iā te ia: ‘Inā alu ia e fufulu ou mata i le vai tā’ele o Selo.’ Na faia faapea e le tamāloa, ma o le taimi muamua lea i lona olaga ua mafai ai ona ia vaai.

**“E sesē outou, auā tou te lē iloa Tususiga Paia po o le mana o le Atua.”—Mataio 22:29**

Na ofo tagata ma faapea ane: ‘Pe e lē o le tamāloa ea lenei na masani ona nofo ma ‘aisi, po o se tasi e foliga e pei o ia?’ Na tali mai le tamāloa: “O a’u lenei o ia.” Na fesili atu tagata: “Na faapefea ona pupula ou mata?” Ina ua ia faamatala atu le mea na tupu, ona latou ave ai lea o ia i le ‘au Faresaio.

Na fai atu le tamāloa i le ‘au Faresaio: ‘Na palu e Iesu le palapala ma nini ai o’u mata. Ona ia faatonuina lea o a’u e alu e fufulu o’u mata. Ona ou alu lea ma fufulu, ma ua ou pupula ai.’ Na faapea mai le ‘au Faresaio: ‘Pe afai e faamālōlō e Iesu tagata i le Sapati, e lē mai i le Atua la lona mana.’ Ae na faapea ane isi tagata: ‘Pe ana faapea e lē mai i le Atua lona mana, e lē mafai lava ona ia faia so o se faamālōlōga.’

Na valaauina e le ‘au Faresaio mātua o le tamāloa tauaso ma fesili atu: ‘Ua faapefea ona pupula la



oulua tama?’ Na fefefe ona mātua, talu ai na faapea atu le ‘au Faresaio o so o se tasi e faatuatua iā Iesu e faate‘aina mai i le sunako. O lea na la tali mai ai: ‘E ma te lē iloa. Ia outou fesili atu iā te ia.’ E tele fesili ua toe fai atu e le ‘au Faresaio i le tamāloa, ma na i‘u ai ina faapea atu o ia: ‘Ua uma ona ou ta‘uina atu iā te outou mea ua ou iloa. Aiseā ua faaauau ai ona outou fesili mai?’ Na feita le ‘au Faresaio ma tuliese o ia.

Na alu Iesu e sa‘ili le tamāloa ma fesili atu: ‘Pe e te faatuatua i le Mesia?’ Na tali mai le tamāloa: ‘Ou te faatuatua pe afai ou te iloa po o ai o ia.’ Na faapea atu Iesu: ‘O a‘u le Mesia.’ Pe e lē o se gaoioiga agalelei ea lenā sa faia e Iesu? E lē gata sa ia faamālōlōina le tamāloa, ae sa ia fesoasoani fo‘i iā te ia ina ia maua le faatuatua.

**Fesili:** Na faapefea ona fesoasoani Iesu i le tamāloa tauaso?  
Aiseā na matuā feita ai le ‘au Faresaio iā Iesu?  
**Ioane 9:1-41**



## 86 Faatūina e Iesu Lasalo

Na iai ni uō vavalalata e to'atolu a Iesu na nonofo i Petania. O i latou o Lasalo ma ona tuafāfine e to'alua o Maria ma Mareta. I se tasi aso, a o iai Iesu i le isi itu o Ioritana, na auina atu ai e Maria ma Mareta se fe'au faanatinati iā te ia e faapea: 'Ua ma'i tigāina Lasalo. Ia sau faavave faamolemole.' Ae e le'i alu Iesu i le taimi lenā. Na ia faatalitali mo isi aso e lua, ona faapea atu lea i ona soo: 'Se'i o tatou ō i Petania. O loo moe Lasalo, ma o le a ou alu e fafagu iā te ia.' Na fai atu le 'auapose-tolo: 'Pe afai o loo moe Lasalo, o le a fesoasoani lenā iā te ia e toe malosi ai.' Ona fetalai sa'o atu lea o Iesu: "Ua oti Lasalo."

Ua taunuu Iesu i Petania, ma ua fā aso talu ona maliu Lasalo. E to'atele tagata na ō atu e faamāfanafana iā Mareta ma Maria. Ina ua faalogo Mareta ua afio atu Iesu, ona ia faanatinati atu lea e faafeiloa'i o ia. Na ia faapea atu: "Le Alii e, ana e iai iinei, semanū e lē oti lo'u tuagane." Na fetalai atu Iesu iā te ia: 'O le a toetū lou tuagane. Pe e te talitonu i lenā mea Mareta?' Na tali mai Mareta: 'Ou te talitonu e toetū mai o ia i le lumana'i.' Na faapea atu Iesu iā te ia: "O a'u o le toetū ma le ola."

Ona alu atu lea o Mareta iā Maria ma faapea atu: 'O loo iinei Iesu.' Ua tamo'e atu Maria iā Iesu, ma na mulimuli atu i ai le motu o tagata. Na faapa'ū o ia i vae o Iesu ma tagi masūsū. Na ia faapea atu: 'Le Alii e, ana e iai iinei, semanū o loo ola pea lo ma tuagane.' Na vaaia e Iesu le matuā mafatia o Maria, ma na amata ai ona tagi o ia. Ina ua vaai atu le motu o tagata ua tagi Iesu, ona latou faapea ane lea: 'Vaai fo'i i le alofa faapelepele o Iesu iā Lasalo!' Ae na tuufesili nisi: 'Aiseā na ia lē taofia ai le oo o le oti i lana uō?' O le ā le gaoioiga o le a faia e Iesu?

Ua alu atu Iesu i le tuugamau, o se ana sa taatia ai se maa telē. Na fetalai atu o ia: "Ia aveese le maa." Ae ua fai mai Mareta: 'Ua tatau ona manogi lona tino, auā o le lona fā lenei o aso.' Peita'i na aveese pea le maa, ma na tatalo Iesu: 'Lo'u Tamā e, ou te faafetai

atu ona ua e faafofoga mai iā te a’u. Ua ou iloa, e te faafofoga mai pea iā te a’u. Ae ua ou tautala atu ina ia iloa ai e nei tagata na e auina mai a’u.’ Ona alaga atu lea ma le leotele lesu:

“Lasalo e, inā sau ia i fafo!” Na tupu se mea ofoofogia: Na sau i fafo Lasalo mai i le tuugamau, o loo fusi lona tino i ‘ie lino. Na faapea atu lesu: “Ia tatala o ia ma tuu atu e alu.”

Na faatuatua le to’atele iā lesu ona o le mea na latou vāai i ai. Ae na iai nisi na ō ma faamatala atu i le ‘au Faresaio. Talu mai lenā taimi, na taupulepule ai le ‘au Faresaio e fasioti Lasalo ma lesu. Na alu faalilolilo i le ‘au Faresaio ia luta le Sekara, o ia o se tasi o aposetolo e to’a 12 ma fesili atu: ‘E fia se tupe tou te totogiina ai a’u pe afai ou te fesoasoani iā te outou i le sa’ilia o lesu?’ Na latou malilie e avatu iā te ia tupe siliva e 30, ma na amata ona su’e e luta se avanoa e tuuina atu ai lesu i le ‘au Faresaio.

**Fesili:** Faamatala le toe faatūina o Lasalo.

O le ā na manana’o le ‘au Faresaio e fai ina ua latou iloa le mea na tupu iā Lasalo?

**Mataio 26:14-16; Ioane 11:1-53; 12:10**

**“O le Atua moni, o le Atua e na te faaolaina i tatou; ma o leova le Alii Pule Silisili Ese, o ia e faasaoina le tagata mai i le oti.”—Salamo 68:20**





# 13

Na afio mai Iesu i le lalolagi e foa'i lona ola mo tagata lē lelei atoatoa. E ui lava na maliu o ia, ae na ia manumalo i le lalolagi. Na faamaoni leova i lona Alo ma toe faatūina o ia mai i le oti. I le olaga o Iesu se'ia oo lava i le taimi na maliu ai, sa ia auauna ma le lotomaulalo i isi ma faamagalo a latou mea sesē. Ina ua toe faatūina mai Iesu, na faaali atu o ia i ona soo. Na ia a'oa'oina i latou i le auala e faia ai le galuega tāua na ia tuuina atu iā i latou. Afai o oe o se matua, ia fesoasoani i lau tama e talisapaia e iai la tatou vaega i lenā galuega i aso nei.



## LESONA AUTŪ

- E leai se mea e faigatā iā leova
- la lotomalie e auauna ma fesoasoani i isi e pei ona faia e lesu
- E iloa Kerisiano moni i le alofa o le tasi i le isi



## 87 Talisuaga Mulimuli a Iesu

Na faamanatuina e tagata lutaia le Paseka i tausaga ta'itasi i le aso 14 o le masina o Nisani. Na faamanatu atu ai iā i latou le auāla na faasa'olotoina ai i latou mai i le nofo pologa i Aikupito, ma ta'ita'ia atu ai i le Nuū Folafoalaina. I le 33 T.A., na faamanatuina ai e Iesu ma ona aposetolo le Paseka i se potu pito i luga o se fale i Ierusalemā. Ina ua māe'a le taumafataga, na fetalai atu Iesu: "E iai se tasi o outou e na te faalataina a'u." Na faate'ia le 'auaposetolo ma fesili atu iā Iesu: 'O ai?' Na tali mai Iesu: 'O lē o le a ou avatu i ai lenei falaoa.' Ona ia avatu lea o le falaoa iā luta le Sekara. O le taimi lava lenā na tū ai i luga luta ma alu ese mai le potu.

Ona faia lea e Iesu o se tatalo, ua vaevae falaoa ma avatu i ona aposetolo o loo totoe. Na ia faapea atu: 'Ia outou aai i lenei falaoa. O le faatusa lea o lo'u tino.' Ona ia faia lea o se tatalo mo le uaina, ma avatu i ona aposetolo. Na ia faapea atu: 'Ia outou inu i lenei uaina. O le faatusa lea o lo'u toto, lea o le a faamagaloina ai agasala. Ou te folafola atu o le a avea outou ma tupu faatasi ma a'u i le lagi. Ia faia lenei mea i tausaga uma ina ia manatua ai a'u.' O loo faaauau pea ona faapotopoto faatasi soo o Iesu i lenā afiafi i tausaga ta'itasi. Ua ta'ua lenā sauniga i aso nei o le Talisuaga Afiafi a le Alii.





**“Aua le fefefe le lafu mamoe itiiti e, auā ua finagalo malie lo outou Tamā e tuuina atu le malo iā te outou.”—Luka 12:32**

Ina ua mǎe‘a lenā talisuaga, ona finau lea o aporetolo po o ai o i latou e sili. Ae na faapea atu lesu: ‘O lē sili iā te outou, e tatau ona manatu iā te ia o sē aupito itiiti pe faatauva.

‘O outou o a‘u uō. Ou te ta‘uina atu mea uma e finagalo lo‘u Tamā e faailoa atu iā te outou. Ua toetiiti ona ou alu lea i lo‘u Tamā i le lagi. O le a tuua na o outou, ma o le a iloa e tagata o o‘u soo outou ona o lo outou alolofa o le tasi i le isi. E tatau ona alofa le tasi i le isi e pei ona ou alofa iā te outou.’

Mulimuli ane, ona tatalo lea o lesu iā leova e puipui ona soo uma. Na ia talosaga iā leova e fesoasoani iā i latou e galulue faatasi ma le filemu. Na ia tatalo ina ia faapaia le suafa o leova. Ona usuina lea e lesu ma ona aporetolo o viiga iā leova ma ō i fafo mai i le fale. Ua lata i le taimi e pu‘ea ai lesu.

**Fesili:** O le ā na folafola atu e lesu i le ‘auposetolo? O ā lesona aogā na a‘oa’o atu e lesu i le ‘auposetolo, i lana talisuaga mulimuli ma i latou?

**Mataio 26:20-30; Luka 22:14-26; Ioane 13:1, 2, 26, 30, 34, 35; 15:12-19; 17:3-26**

## 88 Ua Pu'ea Iesu

Na savavali Iesu ma le 'auaposetolo i le ālia o Ketarono ma aga'i atu i le mauga o Olive. O le taimi lea ua te'a le 12 i le pō ma o loo atoa le masina. Ina ua latou taunuu atu i le togālaau o Ketesemane, na faapea atu Iesu iā i latou: "Ia outou nonofo iinei ma ia faaauau ona mataala." Ona alu atu lea o Iesu i le togālaau, ma ua tootuli. A o matuā mafatia o ia, na ia tatalo atu iā leova: "Ia faia lou finagalo." Ona auina mai lea e leova o se agelu e faalaeiau iā Iesu. Ina ua toe alu atu Iesu i le mea sa iai ona aposetolo, na ia maua ai ua momoe le to'atolu o i latou. Na fetalai atu o ia: 'Nonofo ia i luga. E lē o le taimi lenei e momoe ai. Ua oo mai le itula e tuuina atu ai a'u i lima o o'u fili.'

E le'i umi ae taunuu atu Iuta, o loo ia ta'ita'ia atu se motu o tagata, ua iā i latou pelu ma pouvai. Na ia iloa le nofoaga e maua ai Iesu, auā e masani ona latou ō atu i lea togālaau. Na fai atu Iuta i fitafita e mafai ona ia faasino atu Iesu iā i latou. Ona savali sa'o atu lea o ia iā Iesu ma faapea atu: 'Talofa le A'oa'o e,' ma sogi atu iā te ia. Na tali mai Iesu: 'Iuta, ua e faalataina a'u i le sogi?'

Ua savali atu Iesu ma fesili i le motu o tagata: "O ai o loo outou sa'ilia?" Ua latou tali mai: "O Iesu le Nasareta." Ona ia fetalai atu lea iā i latou: "O a'u lenei o ia," ona solomuli ai lea o tagata ma ua pa'u'ū i le eleele. Ua toe fesili atu Iesu: "O ai o loo outou sa'ilia?" Ua latou toe tali mai: "O Iesu le Nasareta." Na faapea atu Iesu: 'Na ou fai atu o a'u lenei. Ia tuu atu nei tamāloloa e ō.'

Ina ua iloa e Peteru le mea o loo tupu, ona ia se'i a'e lea o le pelu ma tipiese ai le taliga o Maliko, o se pologa a le ositaulaga sili. Ae ua pa'i atu Iesu i le taliga o le tamāloa ma faamālōlō o ia. Ona ia faapea atu lea iā Peteru: 'Tuu ese lau pelu. Pe afai e te faaogā le pelu e tau ai, o le a e oti i




le pelu.’ Na pu’e e fitafita lesu ma saisai ona lima, ae na sosola ese le ‘auapose-tolo. Ona ave ai lea o ia e le motu o tagata iā Ana le faitaulaga sili. Ona tu’ifesili lea e Ana o lesu ma auina atu o ia i le fale o Kaiafa le ositaulaga sili. Ae o le ā ua tupu i le ‘auapose-tolo?

**Fesili:** O le ā na tupu i le togālaau o Ketese-mane?  
O le ā e te a’oa’oina mai i le gaioiga sa faia e lesu i lenā pō?

**Mataio 26:36-57; Mareko 14:32-50;**  
**Luka 22:39-54; Ioane 18:1-14, 19-24**

**“Ua puapuagatia outou i le lalolagi, ae ia lototetele! Ua ou manumalo i le lalolagi.”—Ioane 16:33**



## 89 Faafitia e Peteru Iesu

A o iai Iesu ma ona aposetolo i le potu pito i luga, na ia faapea atu iā i latou: “Tou te tuua a’u i lenei pō.” Na tali mai Peteru: ‘E tusa pe tuua oe e i latou uma, ae ou te lē tuua lava oe.’ Ae na faapea atu Iesu iā Peteru: ‘A o le’i vivini le moa, o le a faatolu ona e faafiti e te lē iloa a’u.’

Ina ua ave e fitafita Iesu i le fale o Kaiafa, o le to’atele o le ‘auaposetolo ua sosola i le taimi lea. Ae e to’alua aposetolo na mulimuli atu i tagata. O se tasi o na aposetolo o Peteru. Na ia alu atu i le lotoā o le fale o Kaiafa, ma nofo i autafa o se afi ma faamāfanafana ai o ia. O le malamalama o le afi na iloa atu ai e se auauna teine ona foliga ma faapea atu: ‘Ou te iloa oe. Sa e faatasi ma Iesu.’

Na tali mai Peteru: ‘E leai. Ou te lē iloa le mea o loo e fai mai ai.’ Na

**‘Ua oo mai le itula e ta’itasi outou ma sola i lona lava aiga, ae tuua na o a’u. Peita’i, e lē na o a’u auā o loo ma faatasi ma le Tamā.’—Ioane 16:32**

alu atu o ia i le faitoto’a, ma e le’i umi ae iloa atu o ia e se isi auauna teine ma faapea atu i tagata: “Sa faatasi lenei tagata ma Iesu.” Na tali mai Peteru: ‘Ou te lē iloa Iesu.’ Na faapea atu se tasi tamāloa: ‘O oe o se tasi na faatasi ma ia. Ou te iloa i le auala e te tautala ai o oe o se tagata Kalilaia e pei o Iesu.’ Ae na tautō atu Peteru: ‘Ou te lē iloa o ia.’

O le taimi lava lenā na vivini ai se moa. Na iloa e Peteru le faliu atu o Iesu ma tilotilo atu iā te ia. Na ia manatua ai upu a Iesu, ona alu lea o ia i fafo ma ua tagi masūsū.

O le taimi lea o loo fono alii uma o le Faamasinoga Sili ina ia molia Iesu i le faamasinoga i le fale o Kaiafa. Ua uma ona latou filifili e fasioti Iesu, a o lea ua latou sa’ilia se māfuaaga e fasioti ai o ia. Ae e latou te le’i maua se mea e molia ai o ia. O lea, na fesili sa’o atu ai Kaiafa iā Iesu: ‘Po o oe o le Alo o le Atua?’ Na tali mai Iesu: “O lea lava.” Na fai atu Kaiafa: ‘E lē toe mana’omia nisi faamaoniga. Ua upuleaga o ia i le Atua.’ Na lagolagoina e le faamasinoga lenei faai’uga: ‘E tatau ona oti lenei tagata.’ Na latou tapō Iesu, tuufeanu iā te ia, ufiufi ona fofoga ma tatu’i iā te ia ma faapea atu: ‘Pe afai o oe o se perofeta, ta’u mai po o ai na pōina oe.’

I le taeao o le aso na sosoo ai, ona latou ave lea o Iesu i le maota o le Faamasinoga Sili ma toe fesili atu iā te ia: “Po o oe o le Alo o le Atua?” Na tali mai Iesu: ‘O lenā ua outou fai mai ai.’ Ona latou molia lea o ia i le upuleaga ma ave o ia i le maota o Ponotio Pilato le kovana o Roma. O le ā le mea na sosoo ai? Se’i o tatou vaai.

**Fesili:** O le ā le mea na tupu i le lotoā o le fale o Kaiafa?  
O le ā le māfuaaga na faasalaina ai e le faamasinoga Iesu i le oti?

**Mataio 26:31-35, 57-27:2; Mareko 14:27-31, 53-15:1; Luka 22:55-71; Ioane 13:36-38; 18:15-18, 25-28**



## 90 Maliu Iesu i Kolokota

Na ave e le ‘aufaitaulaga sili Iesu i le maota o le kovana. Na fesili atu Pilato iā i latou: ‘O le ā le mea ua outou molia ai lenei tagata?’ Na latou tali mai: ‘Ua ia faapea mai o ia o se tupu.’ Na fesili atu Pilato iā Iesu: “Po o oe ea o le tupu o tagata lutaia?” Na tali mai Iesu: “O lo’u malo e lē mai le lalolagi lenei.”

Ona auina atu lea e Pilato o Iesu iā Herota le pule o Kalilaia, pe e maua e Herota se māfuaaga e molia ai Iesu. E le’i maua e Herota se mea sesē faasaga iā Iesu, o lea na ia toe auina atu ai Iesu iā Pilato. Ona fai atu lea o Pilato i tagata: ‘E leai se mea ua ma maua ma Herota e molia ai lenei tagata. O le a ou faasa’olotoina o ia.’ Na alalaga atu tagata: ‘Ia fasioti iā te ia! Ia fasioti iā te ia!’ Na sasa e fitafita Iesu, tuufeanu iā te ia ma tapō o ia. Na latou tuu se pale tuitui i lona ao ma toē faa’amu’amu iā te ia: “Talofa le Tupu o tagata lutaia!” Na toe fai atu Pilato i le motu o tagata: ‘Ou te lē iloa se mea sesē ua faia e lenei tagata.’ Ae na latou alalaga atu: “Ia tutu’i o ia i luga o le laau!” O lea, na tuuina atu ai loa e Pilato Iesu ina ia fasiotia.

Na latou ave Iesu i se nofoaga e ta’ua o Kolokota, ua tutu’i o ia i luga o le laau ma faatū i luga le laau. Na tatalo Iesu: “Lo’u Tamā e, ia e faamagalō iā i latou, auā ua latou lē iloa le mea ua latou faia.” Na tauemu tagata iā Iesu ma faapea atu: ‘Pe afai o oe o le Alo o le Atua, sau i lalo mai i lenā laau. Ia e faaola iā te oe.’

Na faapea atu se tasi o tagata solitulafono sa faatautau i autafa o Iesu: “Ia e manatua mai a’u pe a e oo i lou malo.” Na folafola atu e Iesu: “O le a ta faatasi ma oe i le Parataiso.” Ina ua oo i le aoauli, ona pogisa ai lea o le nuu atoa mo itula e tolu. Sa tutū e latalata i le laau sa faatautau ai Iesu nisi o le ‘ausoo, e aofia ai ma Maria le tinā o Iesu. Na faapea atu Iesu iā loane, ia tausi iā Maria e pei o lona lava tinā.


Mulimuli ane, ona fetalai lea o Iesu: “Ua taunuu!” Ua faagaugau lona ao, ona tō ai lea o lana mānava. O le taimi lava lenā na lūlū ai se mafui’e malosi. I totonu o le malumalu, sa saeluaina ai le ‘ie puipui lea

sa vaeluaina ai le Mea Paia ma le Mea e Sili Ona Paia. Na faapea ane se ta'ita'i'au: 'E moni lava o le Alo lenei o le Atua.'

“Po o le ā lava le tele o folafolaga a le Atua, a ua loe uma ona o ia.”  
—2 Korinito 1:20

**Fesili:** Aiseā na tuuina atu ai e Pilato lesu ina ia fasiotia? Na faapefea ona faaalua e lesu sa sili atu lona alofa i isi nai lo o ia lava?

**Mataio 27:11-14, 22-31, 38-56; Mareko 15:2-5, 12-18, 25, 29-33, 37-39; Luka 23:1-25, 32-49; Ioane 18:28-19:30**



## 91 Ua Toetū Iesu

Ina ua mavae le maliu o Iesu, ona talosaga atu ai lea o se tamāloa mau'oa e igoa iā Iosefa iā Pilato, pe mafai ona ia aveeseina le tino o Iesu mai i le laau. Na tā'ai e Iosefa le tino i le 'ie lino lelei faatasi ai ma mea manogi, ona ave lea ma tuu i se tuugamau fou. Ona ia tuu lea o se maa telē i le gutu o le tuugamau. Na faapea atu le 'aufaitaulaga sili iā Pilato: 'E matou te popole ina ne'i ave e nisi o soo o Iesu lona tino ma faapea atu i tagata, ua toe faatūina o ia mai i le oti.' Na faapea atu Pilato iā i latou: 'Ia faamau le tuugamau ma ia leoleoina lelei.'

I le tolu aso mulimuli ane i le taeaopō, na ō atu ai ni fafine i le tuugamau ma vaaia ai ua fuliese le maa. I totonu o le tuugamau sa iai se agelu, ma na ia faapea atu i na fafine: 'Aua lua te fefefe. Ua toe faatūina Iesu. Ia ō ma ta'u atu i ona soo ina ia feiloa'i ma ia i Kalilaia.'

Ua faanatinati atu Maria le Makatala e su'e Peteru ma loane. Na ia faapea atu iā i la'ua: 'Ua aveese le tino o Iesu!' Ona tamomo'e atu lea o Peteru ma loane i le mea o loo iai le tuugamau. Ina ua latou vaaia ua leai se tino o Iesu i le tuugamau, ona latou toe fo'i ai lea i o latou aiga.

Ina ua toe alu Maria i le tuugamau, na ia vaaia ai ni agelu e to'alua i totonu ma faapea atu iā i la'ua: 'Ou te lē iloa le mea ua latou ave i ai le tino o lo'u Alii.' Ona ia vaaia lea o se tamāloa ma manatu o le tagata faitogālaau lea. Na ia fai atu i le tamāloa: 'Lau susuga e, ia ta'u mai faamolemole le mea ua e tuuina i ai o ia.' Ae ina ua faapea atu le tamāloa: "Maria e!," ona iloa ai lea e Maria o Iesu lea. Na faapea atu Maria: "Le A'oa'o e!" ma pipii atu iā te ia. Na faapea atu Iesu iā te ia: 'Ia e alu ma ta'u atu i o'u uso ua e vaai iā te a'u.' O le taimi lava lenā na tamō'e ai Maria i le 'ausoo, ma fai atu na ia vaai iā Iesu.

Mulimuli ane i le aso lava lenā, na savavali ai ni soo se to'alua mai i Ierusalemā e aga'i atu i Emau. Na faatasi atu iā i la'ua se isi tamāloa a o la savavali i le auala, ma fesili atu po o le ā le mea o loo la talanoa ai. Na la tali mai: 'Pe e te le'i faalogo i le tala? I le tolu aso ua mavae, na fasiotia ai e le 'aufaitaulaga sili Iesu. Ae o lea ua faapea mai nisi fafine ua toe




faatūina o ia.’ Na fesili atu le tamāloa: ‘E lua te lē talitonu i perofeta? Na latou valoia o le a maliu le Keriso ona toe faatūina lea o ia.’ Na faaauau ona ia faamatala atu iā i la’ua Tususiga Paia. Ina ua latou taunuu i Emau, na fai atu soo e to’alua i le tamāloa e latou te nonofo. Ina ua mae’a le tatalo na faia e le tamāloa mo le taumafataga, na faato’ā iloa ai e soo nei o Iesu lea. Mulimuli ane ona lē toe vaaia lea o ia.

Na faanatinati atu nei soo i le fale i Ierusalem lea sa faapotopoto ai le ‘auapose-tolo, ma faamatala atu iā i latou le mea na tupu. A o latou iai i totonu o le fale, na faaali atu Iesu iā i latou uma. I le taimi muamua, e le’i talitonu le ‘auapose-tolo o Iesu lea. Peita’i na ia faapea atu: ‘Ia vaavaai mai i o’u lima, ia pa’i mai. Ua tusia o le a toe faatūina le Keriso mai i le oti.’

**Fesili:** O le ā le mea na tupu ina ua o’ atu ni fafine i le tuugamau o Iesu?  
O le ā na tupu i le auala i Emau?

Mataio 27:57–28:10; Mareko 15:42–16:8;  
Luka 23:50–24:43; Ioane 19:38–20:23

**“O a’u o le ala, o le upu  
moni ma le ola. E leai se  
tasi e alu atu i le Tamā  
pe a lē ui mai iā te a’u.”  
—Ioane 14:6**



## 92 Ua Faaali Atu Iesu i le ‘Aufaifaiva

E le'i umi talu ona mǎe'a ona faaali atu Iesu i le 'auapose'olo, ae filifili loa Peteru e alu e fagota i le sami o Kalilaia. Na latou ō faatasi ma Toma, Iakopo, Ioane ma isi soo. Na latou fagogota i le pō atoa ae e le'i maua se i'a.

I le taeaopō o le aso na sosoo ai, na latou iloa atu ai se tamāloa o loo tū mai i le matafaga. Na valaau mai le tamāloa iā i latou: 'Na outou maua ni i'a?' Na latou tali atu: "E leai!" Na faapea mai le tamāloa: "Ia lafo le upega i le itu taumatau o le vaa." Ina ua latou faia lenā mea, ona tumu ai lea o le upega i i'a e tele, ma ua lē mafai ai ona latou tosoina mai i luga. Na vave ona iloa e Ioane o Iesu le tamāloa lea, ma faapea atu: "O le Alii!" O le taimi lava lenā na oso ai Peteru i le sami ma aau atu i le matafaga, ae mulimuli atu isi soo i le vaa.

Ina ua latou oo i le matafaga, ona latou iloa atu lea o ni falaoa faatasi ma i'a o loo i luga o se afi ua mālala. Na fai mai Iesu iā i latou e avatu





**“Ona fetalai atu lea o [Iesu] iā i la’ua: ‘Inā mulimuli mai ia iā te a’u, ou te faia oulua ma faifaiva i tagata.’ Ona la tuua loa lea o lo la upega, ae mulimuli atu iā te ia.”—Mataio 4:19, 20**

nisi i’a na latou mauaina e fai ai la latou mālū taeao. Ona ia faapea atu lea: “Ō mai loa e aai.”

Ina ua uma ona latou aai, ona fesili lea o Iesu iā Peteru: ‘Pe e sili lou alofa iā te a’u nai lo o le faifaiva?’ Na tali mai Peteru: ‘Ioe le Alii e, ua e silafia ou te alofa iā te oe.’ Na faapea atu Iesu: “Ia e fafaga i a’u tama’i mamoe.” Na toe fesili Iesu: ‘Peteru, pe e te alofa iā te a’u?’ Na tali mai Peteru: ‘Le Alii e, ua e silafia ou te alofa iā te oe.’ Na faapea atu Iesu: “Ia e leoleo i a’u tama’i mamoe.” Na toe fesili faatolu atu Iesu, ma na matuā faanoanoa ai Peteru. Na tali mai Peteru: ‘Le Alii e, ua e silafia mea uma. Ua e silafia fo’i ou te alofa iā te oe.’ Na faapea atu Iesu: “Ia fafaga i a’u tama’i mamoe.” Ona ia toe fetalai atu lea iā Peteru: “Ia e mulimuli mai pea iā te a’u.”

**Fesili:** O le ā le vavega na faia e Iesu i le ‘aufaifaiva? O le ā sou manatu, aiseā na fesili faatolu ai Iesu iā Peteru: “Pe e te alofa iā te a’u?”

**Ioane 21:1-19, 25; Galuega 1:1-3**

## 93 Toe Afio Iesu i le Lagi

Na feiloa'i Iesu ma ona soo i Kalilaia. Na ia tuuina atu ia i latou se faatonuga tāua: 'Ia outou o atu e fai tagata o nuu uma lava ma soo. Ia a'oa'o i latou i mea na ou a'oa'oina ai outou, ma papatiso i latou.' Ona ia folafola atu lea: 'Ia manatua, ou te faatasi pea ma outou.'

A o faagasolo aso e 40 talu ona toe faatūina mai Iesu, na faaali atu o ia i le faitau selau o ona soo i Kalilaia ma Ierusalemā. Na ia a'oa'o atu ia i latou lesona tāua ma faia vavega e tele. Ona feiloa'i lea o Iesu ma ona aposetolo mo le taimi mulimuli i luga o le mauga o Olive. Na ia faapea atu: 'Ia aua ne'i outou o ese mai i Ierusalemā. Ia faatalitali pea i le mea na folafola mai e le Tamā.'

E le'i malamalama ona aposetolo i le uiga o lana faamatalaga. Na latou fesili atu ia te ia: 'Po o le a avea nei oe ma tupu o Isaraelu?' Na tali mai Iesu: 'E le'i oo i le taimi a leova e tofia ai a'u e avea ma Tupu. E lē o toe umi ona outou maua lea o le mana mai i le agaga paia, ma o le a fai outou ma molimau ia te a'u. Ia tala'i atu i Ierusalemā, lutaia, Samaria, ma tulu'iga uma o le lalolagi.'

Ona aveina a'e lea o Iesu i le lagi, ma ua ufitia o ia e se ao. Na vaavaai atu pea ona soo i le lagi, ae ua lē toe iloa atu o ia.

Na o ese le 'ausoo mai i le mauga o Olive ma o atu i Ierusalemā. E masani ona latou faapotopoto i se potu i luga ma tatalo ai. Sa latou faatalitali ia Iesu mo nisi faatonuga.

**Fesili:** O le ā le faatonuga na tuuina atu e Iesu i ona soo?

O le ā na tupu i luga o le mauga o Olive?

**Mataio 28:16-20; Luka 24:49-53; Ioane 20:30, 31; Galuega 1:2-14; 1 Korinito 15:3-6**

**“O le a tala'iina atu leni tala lelei o le malo i le lalolagi atoa e fai ma molimau i atunuu uma; ona oo mai ai lea o le i'uga.”  
—Mataio 24:14**





# 14

Na folafola atu e ulua'i Kerisiano le tala lelei o le Malo i tulu'iga uma o le lalolagi. Na faasino i latou e Iesu i le oganuu e tala'i ai, ma faia se vavega ina ia mafai ai ona latou a'oa'oina tagata i a latou lava gagana. Na foa'i atu e leova ia i latou le lototele ma le mana e fesaga'ia ai sauāga ogaoga.

Na faaali atu e Iesu i le aposetolo o loane se vaaiga o le mamalu o leova. I se isi vaaiga, na vaaia ai e loane le faato'ilaloina e le Malo o le lagi o Satani, ma faai'uina lana pulega e faavavau. Na vaaia e loane Iesu o loo pule o se Tupu faatasi ai ma le 144,000. Na ia vaaia fo'i le lalolagi atoa ua avea o se parataiso, lea e tapua'i uma ai tagata ia leova i le filemu ma le autasi.



## LESONA AUTŪ

- E faamamaluina leova i le galuega ua ia tuuina mai iā i tatou e fai
- la tuuina atu lou ola iā leova, ma faailoa atu e te mana’o e pulea oe e Iona Malo
- la avea leova ma au Uō sili



## 94 Ua Maua e Soo le Agaga Paia

Ina ua mavae aso e sefulu talu ona toe afio lesu i le lagi, ona maua lea e ona soo o le agaga paia. I le Penetekoso 33 T.A., na ō atu i Ierusalem tagata mai i le tele o vaipanoa e faamanatu le Penetekoso. E pe ā ma le 120 soo o lesu na faapotopoto i le potu pito i luga o se fale. Na faafuase'i ona tupu ai o se mea ofoofogia. Na vaaia se mea e pei o se afi i luga a'e o ulu o soo ta'itasi, ma na amata ona latou tautatala i gagana eseese. Na tumu le fale atoa i se leo e pei o se matagi malosi.

Na faalogoina e tagata na faimalaga atu i Ierusalem lenā leo, ma tamomo'e atu i le fale e vaai po o le ā le mea ua tupu. Na taufaiofo i latou ina ua faalogo atu o tautatala le 'ausoo i gagana eseese. Na latou faapea ane: 'O nei tagata e mai i Kalilaia. E faapefea ona latou iloa tautatala i a tatou gagana?'

Ona tutū lea o Peteru ma isi aposetolo i luma o tagata. Na faamatala atu e Peteru le auala na fasiotia ai lesu, ma na toe faatūina





o ia e leova mai i le oti. Na faapea atu Peteru: ‘O loo i le lagi lesu i le itu taumatau o le Atua, ma ua ia liligiina mai le agaga paia lea na ia folafolaina mai. O le māfuaaga lea ua outou vāai ma faalogo ai i nei vavega.’

Na matuā pā’ia loto o tagata i upu a Peteru, ma na latou fesili atu: “O le ā se mea e ao ona matou faia?” Na tali mai Peteru: ‘Ia salamō mai i a outou agasala, ma ia papatiso i le suafa o lesu. O le a outou maua fo’i le meaalofa o le agaga paia.’ I lenā aso, pe tusa ma le 3,000 tagata na papatisoina. Talu mai lenā taimi, na vave ona faato’ateleina le ‘ausoo i Ierusalem. O le fesoasoani a le agaga paia, na amataina ai e le ‘auaposeitolo le tele o faapotopotoga, ina ia mafai ai ona latou a’oa’oina le ‘ausoo i mea uma na faatonuina ai i latou e lesu.

**Fesili:** O le ā na tupu i le Penetekoso 33 T.A.? Aiseā na to’atele ai tagata na papatisoina?  
**Galuega 1:15; 2:1-42; 4:4; Ioane 15:26**

**“Afai e te faalauiloa atu i luma o tagata ‘lenā upu i lou lava gutu’ o lesu o le Alii, ma faatuatua i lou lava loto ua faatūina o ia e le Atua mai i le oti, e faolaina ai oe.”**  
**—Roma 10:9**


## 95 E Le'i Mafai Ona Taofia i Latou

Sa iai se tamāloa pipili na nofo i tafatafa o le faitoto'a o le malumalu i aso uma ma 'aisi i tagata. I se tasi aoauli, na ia iloa atu ai Peteru ma loane o loo o i totonu o le malumalu. Na ia faapea atu iā i la'ua: 'Faamolemole aumai se meaalofo mo a'u.' Na tali mai Peteru: 'E iai se mea e sili atu nai lo o tupe ou te avatua mo oe. I le suafa o Iesu, inā tula'i ia ma savali!' Ona fesoasoani lea o Peteru i le tamāloa ina ia tū i luga, ma na amata ona savali le tamāloa. O le fiafia tele o tagata i lea vavega, na talitonu ai fo'i ma le to'atele o isi tagata.

Peita'i na feita le 'aufaitaulaga sili ma le 'au Satukaio. Na latou pu'eina aposetolo ma ave i le faamasinoga, ma fesili atu iā i la'ua: 'O ai na tuuina atu iā te oulua le mana e faamālōlōina ai lenei tamāloa?' Na tali mai Peteru: 'Na ma maua le mana mai iā Iesu Keriso, o lē na outou fasiotia.' Ua faapea atu ma le leotetele ta'ita'i lotu: 'Ua sā ona toe tautala se tagata e faatatau iā Iesu.' Ae na faapea atu aposetolo: 'E tatau ona ma faamatala atu mea e faatatau iā te ia. E lē mafai ona ma lē ta'uina atu na mea.'

O le taimi lava na tatala ai Peteru ma loane, na la o atu i isi soo ma faamatala atu iā i latou le mea na tupu. Na latou tatalo faatasi ma talosaga atu iā leova e faapea: 'Faamolemole, fesoasoani mai ina ia o matou lototetele e faia pea lau galuega.' Na foa'i mai e leova iā i latou le agaga paia, ma na faaauau ai ona latou tala'i ma faia pea faamālōlōga. Na atili ona to'atele ē na avea ma tagata talitonu. Na matuā lotoleaga le 'au Satukaio, ma o le māfuaaga lea na latou pu'ea ai aposetolo ma ave i le falepuipui. Ae ina ua pō, na auina mai ai e leova se agelu na tatalaina faitoto'a o le falepuipui ma faapea atu i aposetolo: 'Inā o ia i le malumalu ma a'oa'o atu i inā.'

I le taeao na sosoo ai, na maua ai e le Faamasinoga Sili se faamatalaga e faapea: 'O loo loka le falepuipui, ae ua leai tamāloloa sa lokaina ai. O loo iai i latou i le malumalu ma o loo a'oa'o atu i tagata.' Na toe pu'e fo'i nei aposetolo ma ave i le Faamasinoga Sili. Na faapea atu le




ositaulaga sili: ‘Na matou faatonuina outou e sã ona toe a’oa’o atu e faatatau iã Iesu!’ Ae na tali mai Peteru: “E tatau ona matou usiusita’i i le Atua o le pule, nai lo o tagata.”

**“E tatau ona matou usiusita’i i le Atua o le pule, nai lo o tagata.”  
—Galuega 5:29**

Na matuã feita ta’ita’i lotu, ma na latou manana’o e fasioti le ‘auaposeitolo. Peita’i, na tula’i mai se Faresaio e igoa iã Kamalielu ma faapea atu: ‘Ia faaeteete. Atonu o loo faatasi le Atua ma nei tagata. Pe tou te manana’o e tau faasaga i le Atua?’ Na latou faalogo i lana fautuaga. Ina ua uma ona sasa le ‘auaposeitolo i tootoo, ona toe faatonuina lea o i latou e sã ona toe tala’i ma faasa’oloto i latou. Ae e le’i taofia ai le ‘auaposeitolo mai i le tala’i atu. Na faaauau pea ona latou tala’i atu ma le lototetele le tala lelei, i totonu o le malumalu ma i lea fale i lea fale.

**Fesili:** Aiseã e le’i taofia ai le galuega tala’i a le ‘ausoo? Na faapefea ona fesoasoani leova iã i latou?

**Galuega 3:1–4:31; 5:12–42**



## 96 Filifilia e Iesu Saulo

O Saulo o se tagatānuu o Roma sa fanau i Taso. O ia o se Faresaio e tomai i le Tulafono a Lutaia, ma na 'ino'ino o ia i Kerisiano. Na ia toso i fafo tane ma fafine Kerisiano mai i o latou fale, ma tuuina i latou i falepuipui. Na tū fo'i ma matamata a o fetogi Setefano i maa e se vaega o tagata na matuā feita iā te ia, se'ia oo ina oti ai.

Peita'i, e le'i faamalieina Saulo i le faafalepuipuiina na o Kerisiano i Ierusalem. Na ia talosaga atu i le ositaulaga sili ina ia auina atu o ia i le aai o Tamaseko, ina ia mafai ai ona ia pu'eina Kerisiano o loo iai i inā. A o latalata atu Saulo i le aai, na faafuase'i ona suluia faataali'oli'o o ia i se malamalama, ma pa'ū ai o ia i le eleele. Na ia faalogoina se leo o faapea mai: "Saulo e, aiseā ua e faasauā mai ai iā te a'u?" Na fai atu Saulo: "O ai ea oe?" Ua faapea mai le leo: 'O a'u o Iesu. Inā alu ia i Tamaseko, ma o le a e iloa ai le mea e tatau ona e faia.' Na faafuase'i lava ona tauaso Saulo, ma sa tatau ona ta'ita'i atu o ia i le aai.

Sa iai i Tamaseko se Kerisiano faamaoni e igoa iā Anania. Na fetalai atu Iesu iā te ia i se vaaiga e faapea: 'Ia e alu i le fale o Luta i le auala e igoa o Sa'o, ma sa'ili ai le tagata e igoa iā Saulo.' Na tali mai Anania: 'Le Alii e, ua ou faalogo i tala e faatatau i lenā tagata. Ua ia tuuina ou soo i falepuipui.' Ae na faapea atu Iesu: 'Ia e alu iā te ia. Ua ou filifilia Saulo e tala'i atu le tala lelei i nuu e tele.'

O lea ina ua maua atu e Anania o Saulo, ona ia faapea atu lea: 'Lo'u uso e, Saulo, ua auina mai a'u e Iesu e faapupula ou mata.' O le taimi lava lenā na mafai ai ona toe vaai Saulo. Na ia a'oa'oina e faatatau iā Iesu ma avea ma ona soo. I le avea ai o Saulo o se Kerisiano ua papatisoina, na amata ona ia tala'i i sunako faatasi ma ona uso Kerisiano. Se'i mafaufau i le faate'ia o tagata lutaia i le vaai o a'oa'o atu



Saulo i tagata e faatatau iā Iesu! Na latou faapea ane: ‘Pe e lē o le tagata ea lenei na ia pu’eina soo o Iesu?’


E tolu tausaga sa tala’i ai Saulo i tagata sa nonofo i Tamaseko. Na ‘ino’ino tagata lutaia iā Saulo ma taupulepule e fasioti o ia. Peita’i na iloa e le ‘auuso lenā faufauga, ma fesoasoani iā Saulo ina ia sola ese mai i le aai. Na latou tuuina o ia i se ato ma tuutuu ifo o ia mai i se faamalama i le pā o le aai.

Ina ua alu Saulo i Ierusalem, na taumafai o ia e afaatasi atu i le ‘auuso i inā, ae na latou fefefe iā te ia. Sa iai se soo agalelei e igoa iā Panapa, na ia avatu Saulo i le ‘auaposestolo, ma faatalitonu i latou ua suia le olaga o Saulo. Na amata ona tala’i atu ma le maelega e Saulo le tala lelei faatasi ma le faapotopotoga i Ierusalem. Na mulimuli ane suia lona igoa iā Paulo.

**Fesili:** Aiseā na fefefe ai Kerisiano iā Saulo? Aiseā na suia ai lona olaga?

**Galuega 7:54–8:3; 9:1-28; 13:9; 21:40–22:15; Roma 1:1; Kalatia 1:11-18**

**“Na maliu mai Keriso Iesu i le lalolagi ina ia faaolaina o ē e agasala, ma na sili lava ona ou agasala i lo o i latou.”  
—1 Timoteo 1:15**



## 97 Ua Maua e Konelio le Agaga Paia

Sa iai i Kaisareia se ta'ita'i'au Roma maualuga e igoa iā Konelio. E ui lava e lē o ia o se lutaia, ae sa faaaloalo tagata lutaia iā te ia. Na ia fesoasoani i tagata matitiva ma lē tagolima. Na talitonu Konelio iā leova ma tatalo e lē aunoa iā te ia. I se tasi aso na faaali mai ai se agelu iā Konelio ma faapea mai: 'Ua faafogaina e le Atua au tatalo. Ia e aauina atu ni tagata i le aai o lopa lea o loo nofo ai Peteru, ma talosaga i ai ina ia sau iā te oe.' O le taimi lava lea na aauina atu ai e Konelio ni tamāloloa se to'atolu i lopa, lea e pe ā ma le 30 maila le mamao i saute.

Peita'i o le taimi lea na vaaia ai e Peteru se vaaiga i lopa. Na ia vaaia ni manu sa faasā ona aai ai tagata lutaia, ma na ia faalogoina se leo o loo faapea mai iā te ia ina ia 'ai. Na musu Peteru ma faapea atu: 'Ou te le'i 'ai lava i se manu ua lē mamā i lo'u olaga atoa.' Ae na faapea mai le leo: 'Aua e te ta'ua nei manu e lē mamā. Ua faamamāina e le Atua.' Na faatonuina fo'i Peteru: 'O loo tutū i lou faitoto'a ni tamāloloa se to'atolu. Ia outou ō ma i latou.' Na alu Peteru i le faitoto'a ma fesili i tamāloloa pe aiseā ua latou ō mai ai. Na latou tali mai: 'Na auina mai i matou e Konelio, o se ta'ita'i'au Roma. E tatau ona e alu atu i lona fale i Kaisareia.' Na valaaulia e Peteru nei tamāloloa e nonofo i lona fale ma talimālō iā i



**“O lē e mata’u [i le Atua] i nuu uma lava, ma fai le amiotonu, e talia e ia.”—Galuega 10:35**

latou. I le aso na sosoo ai, na latou ō faatasi ma nei tamāloloa i Kaisareia, faatasi ma nisi o le ‘auuso mai i lopa.

Ina ua vaai Konelio iā Peteru, ona ia faapa’ū ai lea i ona vae. Ae na faapea atu Peteru: ‘Tū ia i luga, o a’u fo’i o se tagata e pei o oe. Na faatonuina a’u e le Atua ou te sau i lou fale, e ui lava e lē asiasi ni tagata lutaia i fale o tagata o Nuu Ese. O lea, faamolemole ta’u mai pe aiseā ua e aami mai ai a’u.’

Na faapea atu Konelio iā Peteru: ‘I le fā aso ua mavae na ou tatalo ai i le Atua, ma na faapea mai ai se agelu ina ia aami mai oe. Faamolemole, ia a’oa’o i matou i afioga a leova.’ Na tali atu Peteru: ‘Ua ou iloa e lē faailogatagata le Atua. E na te talia so o se tasi e mana’o e tapua’i atu iā te ia.’ Na a’oa’o atu e Peteru iā i latou le tele o mea e uiga iā Iesu. Ona liligi ifo ai lea o le agaga paia i luga o Konelio ma i latou na faatasi ma ia, ma na papatisoina i latou uma.

**Fesili:** Aiseā na musu ai Peteru e ‘ai i manu e lē mamā?  
Aiseā na faatonuina ai e leova Peteru e alu i le fale o se tagata o Nuu Ese?

**Galuega 10:1-48**





## 98 Ua Oo Atu le Faa-Kerisiano i le Tele o Atunuu

Na usita'ia e le 'auapose-tolo le faatonuga a Iesu ina ia folafola atu le tala lelei i le lalolagi atoa. I le 47 T.A., na auina atu ai e uso i Anetioka ia Paulo ma Panapa i se tala'iga faataamilo. Na faimalaga nei tagata tala'i maelega e to'aluva i vaipanoa uma o Asia Itiiti e pei o Teipe, Lusa, ma Ikonio.

Na tala'i atu Paulo ma Panapa i tagata uma e tusa pe matitiva pe mau'oa, matutua pe la'iti. Na talia e le to'atele le a'oa'oga moni e faatatau i le Keriso. Ina ua tala'i atu Paulo ma Panapa ia Sekio Paulo le kovana o Kuperu, na taumafai se tamaloa faataulaitu e taofi i la'ua. Na faapea atu Paulo i le faataulaitu: 'E matua tetee leova ia te oe.' Na faafuase'i lava ona tauaso le faataulaitu. Ina ua vaai atu le kovana o Sekio i le mea ua tupu, ona talitonu ai lea o ia.

Na tala'i Paulo ma Panapa i so o se vaipanoa, mai i lea fale i lea fale, i maketi, i luga o auala, ma i sunako. Ina ua la faamaloloina se tamaloa pipili mai i Lusa, na manatu e na vai i le vavega o i la'ua o ni atua ma taumafai e tapua'i atu ia i la'ua. Ae na taofi i latou e Paulo ma Panapa ma faapea atu: 'Ia tapua'i atu tau lava o le Atua! O i ma'ua fo'i o ni tagata.' Ona taunuu ane lea o ni tagata lutaia ma faaoso le motu o tagata e tetee ia Paulo. O lea na latou fetogi ai Paulo i maa, toso o ia i tua o le aai, ma le manatu ua oti o ia. Peita'i e le'i oti Paulo. O le taimi lava lena na o atu ai le 'auuso e fesoasoani ia Paulo ma toe aumai o ia i totonu o le aai. Mulimuli ane, na toe fo'i Paulo i Anetioka.

I le 49 T.A., na toe alu ai fo'i se isi tala'iga faataamilo a Paulo. Ina ua fo'i mai Paulo mai i lana asiasiga i uso i Asia Itiiti, ona ia faalauiloa atu lea o le tala lelei i atunuu mamao se'ia oo lava i Europa. Na malaga atu o



“O le mea lea, ia outou ò atu e fai tagata o nuu uma lava ma soo.”—Mataio 28:19


ia i Atenai, Efeso, Filipi, Tesalonia, ma isi nofoaga. Na faatasi atu i le faigāmalaga a Paulo ia Sila,

Luka, ma le alii talavou o Timoteo. Na latou galulue faatasi ina ia faavae faapotopotoga, ma fesoasoani ina ia faamalosia na faapotopotoga. Na nofo Paulo i Korinito mo le tausaga ma le ‘afa, ma faamalosi i le ‘auso i inā. Na ia tala’i, a’oa’o atu, ma tusia ni tusi mo le tele o faapotopotoga. Na galue Paulo o sē e faia fale’ie. Mulimuli ane, na toe fo’i Paulo i Anetioka.

Mulimuli ane i le 52 T.A., na alu ai le tala’iga faataamilo lona tolu a Paulo, ma na amata atu i Asia Itiiti. Na oo atu lana malaga i le itu i mātū i Filipi, ma faauau atu ai i Korinito. Na faaalu e Paulo le tele o tausaga i Efeso e a’oa’o atu ai, faia faamālōlōga, ma fesoasoani i le faapotopotoga. Na ia lauga fo’i i aso uma i se falea’oga. E to’atele tagata na faalogo ma suia o latou ala. Ina ua mǎe’a ona tala’i atu e Paulo le tala lelei i le tele o atunuu, ona malaga atu ai lea o ia i Ierusalem.

**Fesili:** Pe e mafai ona e faamatalaina tala’iga faataamilo a Paulo, e faaogā ai le faafanua o loo i le faavaa pito i tua o le Tusi Paia o le *Faaliliuga a le Lalolagi Fou*?

**Galuega 13:1–23:35**



## 99 A'oa'oina e se Leoleo o le Falepuipui le Upu Moni

Sa iai i Filipi se auauna teine na uluitinoina e se temoni. Na faaaogā e le temoni le teine e faia ni valovaloga, ma na maua ai e ona matai le tele o tupe. Ina ua taunuu Paulo ma Sila i Filipi, na mulimuli solo iā i la'ua le teine mo le tele o aso. Na faapogaia o ia e le temoni e alaga atu: “O nei tane o pologa a le Atua Silisili Ese.” O lea na faapea atu ai Paulo i le temoni: ‘Ou te faatonu iā te oe i le suafa o Iesu, inā alu ia i fafo mai iā te ia.’ Ona alu ese ai lea o le temoni mai i le teine.

Ina ua iloa e matai o le auauna teine ua latou lē toe maua ni tupe mai iā te ia, ona matuā feita ai lea o i latou. Na latou pu'ea Paulo ma Sila ma avatu i alii faamasino ma faapea atu: ‘Ua solia e nei tagata le tulafono ma ua matuā faalavelave i le aai atoa.’ Na faatonu e alii faamasino ina ia sasa Paulo ma Sila ma tuu i le falepuipui. Na tuu i la'ua e le leoleo o le falepuipui i le potu e sili ona pogisa o le falepuipui, ma faamau o la vae i laau.

Na faalogologo ane isi pagota a o usu e Paulo ma Sila viiga iā leova. Ina ua oo i le vaeluapō, na faafuase'i ona lūlū se mafui'e malosi ma na lūlūina ai le falepuipui atoa. Na matalatala faitoto'a o le falepuipui, ma mamulu ese filifili ma laau faamau na lokaina ai pagota. Na tamo'e atu le leoleo o le falepuipui i le potu pito i totonu o le falepuipui, ma na ia vaaia ai ua matalatala faitoto'a. Na manatu o ia ua sosola uma pagota, o lea na ia se'i a'e ai loa le pelu o le a pule i lona ola.

Peita'i ua alaga atu Paulo: “Aua ne'i e faia lenā mea iā te oe, o loo matou iai uma lava i inei!” Ua tamo'e atu le leoleo o le falepuipui ua faapa'ū i luma o Paulo ma Sila ma faapea atu: “O le ā se mea e ao ona ou faia ina ia faaolaina ai a'u?” Ua la tali mai: ‘E tatau ona e talitonu ma lou aiga iā Iesu.’ Ona a'oa'o atu lea e Paulo ma Sila o le afioga a leova iā i latou, ma na papatisoina le leoleo o le falepuipui ma lona aiga atoa.

**Fesili:** Aiseā na ave ai Paulo ma Sila i le falepuipui? Na faapefea ona maua e le leoleo o le falepuipui le upu moni?

**Galuega 16:16-34**

**“O le a pu’ea ma sauāina outou e tagata,  
e tuuina atu outou i sunako ma falepuipui,  
e molia fo’i outou i luma o tupu ma kovana  
ona o lo’u igoa. E fai lea ma avanoa tou te  
molimau atu ai.”—Luka 21:12, 13**



## 100 Paulo ma Timoteo



O Timoteo o se uso talavou i le faapotopotoga i Lusa. O lona tamā o se Eleni, ae o lona tinā o se lutaia. Na a'oa'oina o ia mai lava i lona la'itiiti e faatatau iā leova, e Eunike lona tinā ma Loi le tinā o lona tinā.

I le taimi na asiasi atu ai Paulo i Lusa i lana tala'iga faataamilo lona lua, na ia mātauina ai le alofa moni o Timoteo i le 'auuso ma sa naunau e fesoasoani iā i latou. Na valaaulia e Paulo Timoteo ina ia faatasi atu i lana malaga. A o faagasolo taimi, na toleniina ai e Paulo Timoteo ina ia avea o se tagata tala'i ma o se faia'oga tomai o le tala lelei.

O so o se mea lava na faimalaga i ai Paulo ma Timoteo, na ta'ita'ia i la'ua e le agaga paia. I se tasi pō na vaaia ai e Paulo i se faaaliga se tamāloa na faapea mai iā te ia, ina ia alu atu i Maketonia ma fesoasoani iā i latou. O lea na ō ai Paulo, Timoteo, Sila ma Luka e tala'i i inā ma faavae ai faapotopotoga.

I le aai o Tesalonia i Maketonia, e to'atele tane ma fafine na avea ma Kerisiano. Ae na iai nisi tagata lutaia sa lotoleaga iā Paulo ma ē na malaga faatasi ma ia. Na latou faapotopoto mai ni tagata ma fetoso le 'auuso i alii pule o le nuu ma alalaga atu: 'O tagata nei o fili o le malo o Roma!' Na lamatia ola o Paulo ma Timoteo, o lea na la sosola ai loa i Perea i le pō.

Sa naunau tagata Perea e a'oa'oina le tala lelei, ma na avea tagata Eleni ma lutaia sa iai i inā o ni tagata talitonu. Ae ina ua ō atu nisi tagata lutaia mai i Tesalonia ma faatupu le vevesi i inā, na alu ese ai Paulo ae alu atu i Atenai. Na nonofo Timoteo ma Sila i Perea e faamalosia i le 'auuso. A o faagasolo taimi, na toe auina atu ai e Paulo Timoteo i Tesalonia e fesoasoani i le 'auuso a o feagai ai ma



“E lē o iā te a’u se tasi e mafaufau lelei e pei o ia o lē e manatu mamafa iā te outou. Ua sa’ili e isi uma o latou lava lelei, ae lē o mea e faatatau iā Keriso Iesu.”  
—Filipi 2:20, 21

sauāga ogaoga i inā. Mulimuli ane, na auina atu e Paulo Timoteo e asiasi i le tele o faapotopotoga ma faalaeiau iā i latou.

Na faapea atu Paulo iā Timoteo: ‘E sauāina i latou e manana’o e auauna iā leova.’ Na sauāina ma tuuina Timoteo i le falepuipui ona o lona faatuatua. Sa fiafia o ia ona o lenā avanoa na mafai ai ona faamaonia atu lona faamaoni iā leova.

Na faapea atu Paulo i uso i Filipi: ‘Ua ou auina atu Timoteo iā te outou. O le a ia a’oa’oina outou i le auala e ola ai o se auauna a leova, ma o le a ia toleniina outou i le faiva.’ Na iloa e Paulo e mafai ona ia maufaatuatuaina Timoteo. Na la galulue faatasi o ni uō ma o se ‘auuso mo tausaga e tele.

**Fesili:** O ai Timoteo? Aiseā na māfana ai le faauōga a Paulo ma Timoteo?

**Galuega** 16:1-12; 17:1-15; **Filipi** 2:19-22; **2 Timoteo** 1:1-5; 3:12, 14, 15; **Eperu** 13:23



## 101 Auina Atu Paulo i Roma

Na faai'uina le tala'iga faataamilo lona tolu a Paulo i Ierusalemā. O i inā na pu'ea ai o ia ma tuuina i le falepuipui. I le pō, na ia vaaia ai se faaaliga lea na faapea mai ai Iesu iā te ia: 'O le a e alu i Roma ma tala'i ai i inā.' Na aveese Paulo mai i Ierusalemā ae ave i Kaisareia, lea na faafalepuipuiina ai mo le lua tausaga. Ina ua ia tula'i i le faamasinoga i luma o le kovana o Feso, na faapea atu Paulo: 'Ia faamasinoina a'u e Kaisara i Roma.' Na tali mai Feso: "Ona ua e tagi atu iā Kaisara; e te alu lava iā Kaisara." Na tuu Paulo i se vaa e aga'i atu i Roma, ma na latou ō faatasi ma uso Kerisiano e to'alua o Luka ma Aritako.

A o latou iai i le sami, na agi ai se matagi malosi mo aso e tele. Na manatu tagata uma o le a latou feoti. Ae na faapea atu Paulo: 'Alii e, na faapea mai se agelu iā te a'u e ala i se miti: "Paulo e, aua e te fefe. E te taunuu lava i Roma, ma o le a saogalemu tagata uma o loo i luga o le vaa." Ia lototetele! E tatou te lē feoti.'

E 14 aso na agi ai le matagi. Mulimuli ane ona latou iloa atu lea o le laueleele, o le motu o Melita. Ua tau le vaa i le faga oneone ma malepe ai, ae na taunuu lava ma le saogalemu i le motu tagata e to'a 276 sa iai i luga o le vaa. O isi na fe'ausi, a o isi na pipii i laupapa ma isi mea mai i le vaa ma ō ai i uta. Na tausia i latou e tagata Melita, ma tafu se afi ina ia latou maua ai le māfanafana.

I le tolu masina mulimuli ane, na ave ai e fitafita Paulo i Roma e ala i se isi vaa. Ina ua taunuu Paulo, na ō mai le 'ausinga e faafeiloa'i o ia. Ina ua vaai atu Paulo iā i latou, ona ia lototele lea ma faafetai iā leova. E ui lava sa avea Paulo o se pagota, ae na faataga o ia e nofo i se fale mautotogi lea na leoleoina e se fitafita. E lua tausaga na nofo ai Paulo i lenā fale. Na ō atu tagata e vaai o ia, ma na ia tala'i atu iā i latou e faatatau i le Malo o le Atua ma a'oa'oina i latou e faatatau iā Iesu. Na tusi atu fo'i Paulo i faapotopotoga i Asia Itiiti ma lutaia. O le mea moni, na faaogā e leova Paulo e faalauiloa atu le tala lelei i atunuu.

Fesili: Aiseā na auina atu ai e Feso Paulo i Roma?  
O le ā na tupu iā Paulo a o folau atu i Roma?  
Galuega 21:30; 23:11; 25:8-12; 27:1-28:31; Roma 15:25, 26

**“I mea uma lava ua matou faailoa atu ai i matou o ni auauna a le Atua, e ala i le tumau i le tele o mea, i puapuaga, i le leai o ni mea, i faigatā.”—2 Korinito 6:4**



## 102 Le Faaaliga na Vaaia e loane

A o faafalepuipuiina le aposetolo o loane i le motu o Patamo, na faaali ai e lesu iā te ia se faasologa o vaaiga po o ata e 16 e faatatau i le lumana'i. O nei vaaiga na faaalina ai le auala o le a faapaiaina ai le suafa o leova, le oo mai o lona Malo, ma le faia o lona finagalo i le lalolagi e pei ona faia i le lagi.

I se tasi o vaaiga, ua vaaia ai e loane o loo afio leova i lona nofoālii mamalu i le lagi, o loo si'omia e toeaina e 24 o loo oofu i ofu papa'e ma ua i o latou ulu o pale auro. Ua sau mai i le nofoālii o uila ma leo o faititili. Ua ifo atu toeaina e 24 iā leova ma tapua'i atu iā te ia. I se isi vaaiga, ua vaaia ai e loane se motu o tagata e to'atele mai i atunuu, ituaiga, ma gagana uma o loo tapua'i iā leova. O loo leoleoina i latou e lesu le Tama'i Mamoe, ma ta'ita'iina atu i latou i vai o le ola. Mulimuli ane i se isi vaaiga, ua amata ona pule lesu o se Tupu i le lagi faatasi ai ma toeaina e 24. I le vaaiga na sosoo ai, ua vaaia ai e loane lesu o loo tau ma Satani le tarako ma ana temoni. Ua lafoina ese i latou e lesu mai i le lagi i le lalolagi.







**“Ou te faatupuina le feitaga’i i le va o oe ma le fafine, ma i le va o lau fanau ma lana fanau. O le a ia tu’imomoina oe i le ulu, ae o le a e tu’imomoina o ia i le mulivae.”  
—Kenese 3:15**

Ona vaaia lea e loane o se vaaiga matagofie o le Tama’i Mamoe ma le 144,000 o loo tutū i luga o le mauga o Siona. Ua ia vaaia fo’i se agelu o loo felelea’i i le lalolagi atoa, ma faailoa atu i tagata ina ia matata’u i le Atua ma avatu iā te la le mamalu.

I le isi vaaiga, ua amata le taua o Amaketo. I lenā taua, ua faato’ilalo ai e Iesu ma lana ‘autau ia Satani ma lana faiga amioleaga o mea. I le vaaiga mulimuli, ua vaaia ai e loane le matagofie o le autasi i le lagi ma le lalolagi. Ua faaumatia atoatoa Satani ma lana fanau. Ua faapaia e i latou uma i le lagi ma le lalolagi le suafa o leova, ma tapua’i atu tau lava o ia.

**Fesili:** E fia vaaiga na vaaia e loane?

O le ā o le a faia e Iesu i le taua o Amaketo?

**Faaaliga 1:1-3; 4:1-11; 7:4, 9-17; 11:15-18; 12:5-12; 14:1, 6, 7; 16:14, 16; 21:5**

## 103 “Ia Oo Mai Lou Malo”


Na folafola mai e leova: ‘E lē toe iai se tagiaue, tigā, ma’i, po o le oti. Ou te soloiesea loimata uma i o latou mata. E lē toe manatua mea leaga uma sa iai.’

Na tuu e leova Atamu ma Eva i le faato’aga o Etena e nonofo ai ma le filemu ma le fiafia. Sa tatau ona la tapua’i atu i lo la Tamā i le lagi ma faatumu le lalolagi i a la fanau. Na lē usiusita’i Atamu ma Eva iā leova, ae e le’i suia ai lona finagalo. Ua tatou a’oa’oina mai i lenei tusi o mea uma e folafola mai e le Atua e taunuu. O le a aumaia e lona Malo faamanuiaga matagofie i le lalolagi, e pei ona ia folafola mai iā Aperamo.

E lē o toe umi ona aveesea lea o Satani, ana temoni, ma tagata leaga uma. O i latou uma o le a faasaoina o le a tapua’i iā leova. O le a tatou lē toe mama’i pe toe feoti. Nai lo o lea, o le a tatou feala a’e i aso ta’itasi ma lagona le malosi o le tino, faapea le fiafia ona

“leova e, lo matou Atua, ua tatau lava oe ona e mauaina le viiga, ma le mamalu, ma le mana, auā na e foafoaina mea uma lava.”

—Faaaliga 4:11




ua tatou maua le ola. O le a avea le lalolagi ma parataiso. O le a maua e tagata uma taumafa lelei ma fale saogalemu. O le a agalelei tagata, ae e lē toe sauā pe amioleaga. O le a lalata manufe'ai iā i tatou, ma e tatou te lē toe fefefe fo'i i manufe'ai.

E tatou te lagona le fiafia i le taimi e amata ai ona toe faatutū e leova tagata. O le a tatou faafeiloa'ia tagata mai i aso ua mavae, e pei o Apelu, Noa, Aperamo, Sara, Mose, Ruta, Eseta, ma Tavita. O le a latou galulue faatasi ma i tatou i le galuea'iina o le lalolagi paneta ina ia avea o se parataiso. O le a tele pea galuega mananaia e fai.

E finagalo leova ina ia e iai i inā. O le a e iloa ai leova i ni auala e te le'i mafaufau i ai muamua. Se'i o tatou mafuta vavalalata atu pea iā leova i aso ta'itasi, i le taimi nei se'ia oo i le faavavau!

**Fesili:** O ā auala o le a suia ai e le Malo o le Atua le olaga i le lalolagi? E mai i tagata uma na e faitau i ai i lenei tusi, o ai e te fia feiloa'i i ai i le Parataiso?

**Faaliga 21:3, 4;** Iopu 33:25; Faataoto 2:21, 22; Isaia 11:2-10; 33:24; 65:21; Mataio 6:9, 10; Ioane 5:28, 29; 17:3



# Lesona e te a'oa'oina mai i le Tusi Paia

## NUMERA O LESONA

|   |   |
|---|---|
| Aua le faavaivai pe a e mafatia _____                             | 16, 47, 51, 57, 64, 75, 90, 95, 99, 101     |
| Aua le faia mea leaga _____                                       | 14, 27, 49, 53, 58, 88, 89                  |
| Aumaia e le Malo o le Atua le fiafia i tagata uma _____           | 1, 48, 62, 79, 81, 83, 85, 86               |
| Avea ē fouvale ma fili o le Atua _____                            | 7, 17, 26, 27, 28, 88                       |
| E alofa leova i tagata o atunuu uma _____                         | 30, 33, 48, 54, 77, 94, 97, 98, 99          |
| E lē mafai ona e tapua'i i le Atua ma auauna i 'Oa _____          | 10, 17, 44, 59, 75, 76                      |
| E lē talapepelo leova _____                                       | 3, 10, 16, 63, 68, 70, 102, 103             |
| E lē toe iai tagata amioleaga _____                               | 5, 10, 32, 46, 102                          |
| E manatua pea e leova mea e tatou te faia mo ia _____             | 16, 29, 32, 48, 65, 69, 77, 100             |
| E mata'utia le ita _____  | 4, 12, 41, 45, 49, 65, 89                   |
| E puipuia e leova i latou e alolofa iā te ia _____                | 6, 22, 40, 50, 52, 55, 64, 71, 84           |
| E ta'ita'ia e leova ona tagata _____                              | 18, 25, 26, 27, 29, 34, 39, 44, 73, 80      |
| E tāua tagata uma iā leova _____                                  | 8, 9, 11, 21, 23, 68, 70, 74, 87, 90        |
| E tatau ona tatou tala'i atu le tala lelei o le Malo _____        | 73, 76, 94, 95, 96, 97, 98                  |
| Ia faafetai atu pea iā leova _____                                | 2, 6, 67, 103                               |
| Ia lototele, e fesoasoani mai pea leova iā te oe _____            | 40, 47, 51, 53, 57, 61, 64, 65, 76, 88, 101 |
| O leova e ona le malosi uma lava _____                            | 1, 7, 18, 19, 20, 21, 22, 26, 55, 60        |
| O Iesu o le Tupu o le Malo o le Atua—ia usiusita'i iā te ia _____ | 74, 78, 79, 83, 84, 85, 91, 92, 99          |
| O uō e alolofa iā leova o uō ia e sili ona lelei _____            | 16, 33, 42, 80, 87, 100, 103                |
| O le a iai le toetū _____   | 48, 86, 91, 93                              |
| O le manatu faapito e oo mai ai tigā iā i tatou faapea isi _____  | 3, 4, 12, 27, 28, 39, 49, 88                |
| Faaū ma leova _____   | 11, 30, 33, 51, 56, 59, 69, 81, 82          |
| Faafofoga mai leova pe a tatou tatalo atu mai i le loto _____     | 35, 38, 50, 64, 82                          |
| Faaleagaina e le lotoleaga faaūga _____                           | 4, 14, 41                                   |
| Faalogo ma usita'i—e faalagolago i ai lou ola _____               | 3, 5, 10, 37, 39, 54, 59, 65, 72            |
| Faamagalo i isi e pei ona faamagalo leova iā te oe _____          | 13, 15, 31, 43, 92                          |
| Faia e leova lo tatou lalolagi _____                              | 1, 2, 102, 103                              |
| Faia le finagalo o le Atua i le lagi ma le lalolagi _____         | 25, 55, 60, 62, 63, 71, 96, 102             |
| Fanau, ia tuu atu o outou loto iā leova _____                     | 37, 51, 59, 61, 72, 100                     |
| Foa'i mai e le Atua le Tusi Paia ina ia tatou atamamai ai _____   | 56, 66, 72, 75, 81                          |
| Pe a e lē alofa i lou uso, e lē mafai ona e alofa i le Atua _____ | 4, 13, 15, 41                               |
| Puipuia e leova tagata lotomaulalo _____                          | 43, 45, 65, 67, 69                          |
| Puipui mea ua foa'i mai e leova iā te oe _____                    | 12, 13, 24, 35, 36, 56, 75, 95, 100         |
| Tausisi i au folafolaga—e faia faapea e leova _____               | 8, 9, 11, 23, 24, 31, 34, 35, 36, 66, 93    |
| Tupuga mai i le Tiapolo tapua'iga sesē _____                      | 19, 20, 22, 38, 46, 49, 52, 58              |